

ሉቃስ ፩ ዓፊዳ ዮሱስ ኪሪስቶስ ዎንጌላ ጋሳ ቆፋ

ዮሱስ ዶሪዳ ታማኔ ናምዑ ሃዋሬታ ጊዶን ሉቃስ ዴና። ሉቃስ ዎንጌላይ፤ ዮሱስ ኮይሮ ናቤታ ዶናን ያና ጌቴቲዲ አዴቲዳይሳ፤ ኢስራዔሌቲ ካሴፕ ናጊሼ ዴዒዳ «ኪሪስቶስ» ጊዴይሳኔ አሳ ዜሬሲ ኡባ አሼይሳ ጊዴይሳ ቆንጨሴስ። ሉቃስ፤ ባ ማፃፋን ዮሱስ፤ «ማንቆታስ ዎንጌላ ሳባካናው» ባ አዋፕ ኪቴቲዳይሳ ጊዴይሳኔ ሄ ዎንጌላይ አሳስ ዴዒያ ዱማ ዱማ ሜቱዋፕ ኬሴይሳ ጊዴይሳ አዴስ። ሉቃስ ዎንጌላ ጊዶን፤ ዮሱስ ዩሳባ አዲያ ኮይሮ ሼምፖታኒኔ ዮሱስ ፑዴ ሳሎ ኬዩዳይሳ አዲያ ወርሴሳ ሼምፖታን ቆንጨዲ አዴቲዳይ ኡፋይሳባ። ዮሱስ ሳሎ ኬዩዳፕ ጉዩ አማኖይ ዋኒዲ ዲጨዳኮኔ ዳልጊዳኮ አዲያ ታሪኪያ ሃ ዎንጌላ ፶፭ ዓፊይ ሃዋሬታ አሶ ማፃፋን ፶፭።

ኪታንቾታ ማዘውሪያባ፤ ዮሱስ ዮሌቲዳ ዎዴ ሄንሳቾቲ ቢዲ ቤዒዳይሳ አዲያ ታሪኪይ፤ ዮሱስ ናዓቲሳን ዎሳ ኬሲ ቤዳይሳ፤ ቃዴቲያ ሳማሬ አዲያባኔ ዳዩዲ ቤንቲዳ ናዓባ አዲያ ታሪኪይ፤ ሉቃስ ዎንጌላ ፶፯፻፺፯ ቤንቲያ ታሪኪ። ሉቃስ ዎንጌላን ጋፑፕ ጋ፶ ጋካናው ዴዒያ ዋና ቆፋቲ ዎሳባ፤ ጌሻ አያናባ፤ ዮሱስ አሱዋ ጊዶን ማጫሳታስ ዴዒያ ቤሳኔ ዎሳይ ናጋራ ማሬይሳ።

ሉቃስ ዎንጌላ አይፌ ቆፋታ

ጌሎ ቆፋ 1:1-4

ፆማቂያ ዮሃኒሳኔ ዮሱስ ዮሌቴሳ 1:5-2:52

ፆማቂያ ዮሃኒሳ አሱዋ 3:1-20

ዮሱስ ፯ንቃቲያኔ ፓጩቴሳ 3:21-4:13

ዮሱስ ጋሊላን አሲዳ አሱዋ 4:14-9:50

ጋሊላፕ ዮሩሳላሜ ጋካናው 9:51-19:27

ወርሴሳ ሳሚንታ ዮሩሳላሜ ሄራን 19:28-23:56

ሃይቆፕ ዴንዶ፤ ቆንጨሳኔ ሳሎ ኬሳ 24:1-53

1 ቦንቾ ቴዎፊሎሳ፤ ኑ ጊዶን ፖሌቲዳባስ ዳሮቲ፤ ባንታው ዳንዳዔቲዳ ሜላ ፶፭ዶሶና። 2 ሄ ታሪኪያ ኤንቲ ፶፭ዳይ ኮይሮፕ ዶሚዲ አይፌ ማርካቲኔ ቃላ ሃጋዜይሳቲ ኑስ አዲዳይሳ። 3 ታካ ታ ባጋራ ኮይሮፕ አኬካ ፶ሊዳፕ ጉዩ ሄ ታሪኪያ ሃኖታ ማራያዳ ኔው ፶፭ይ ታው ሎፆ ጊዲ ቤንቲስ። 4 ሄሲካ፤ ኔ ታማሪዳባይ ቱማ ጊዴይሳ ኤሪሳናሳ።

ገማቂያ የሃረጎች ድምጽ

5 ደሀው ካወቀ ሄሮዲስ ወይም አቢያ ያራቴ ጊዲያ ማሪያን ጊያ አይሁድ ካሂኔይ ደዘነ። ኢያ ማቼያካ አሮና ሼሻቴ። ኢሱንሳይካ ኤልሳቤዳ። 6 ናምዓይካ ጎዳ ወጋኔ ኪታ ኡባ ናጊዲ ቦሬይ ባይና ያሳ ሲንሳን ጊሎቱሳን ደዲደሶና። 7 ሃኖቴ አቲን ኤልሳቤዳ ማይንሱ ጊዲያ ጊሾ ኤንታው ናዲ ባዋ። ናምዓይካ ቃሲ ጨሚደሶና።

8 ኢሲ ጋላስ ማሪያሲ ባ ጊሾዋ ማራን ያሳ ሲንሳን ካሂኔቱሳን ሃጋዜስ። 9 ካሂኔቱሳ ወጋን ያሳ ኪሱ ጊሊዲ ኢፃኔ ጨዩሳናው ኢያ ሳሚ ጋኪስ። 10 ኢፃኔይ ጨያ ወዴ አሳይ ካሬን ወሴስ።

11 ጎዳ ኪታንቾይ ያርሹዋ ያርሹያ ቤሳፌ ኡሻቻ ባጋራ ኤቂዲ ቤንቲስ። 12 ማሪያሲ ኢያ ቤዲዳ ወዴ ዳጋሚዲ ዳሮ ያዩስ። 13 ሺን ኪታንቾይ ኢያኮ፣ «ማሪያሳ ያዮፋ፤ ኔ ወሳይ ሲዔቲስ። ኔ ማቼያ ኤልሳቤዳ አዴ ናዓ ዩላና፣ ኢያ የሃረጎ ጋዳ ኔ ሱንሳና።

14 ኢ ኔው ኢንጄኔ ኡፋይሲ ጊዳና፤ ዳሮቲ ኢያ ዩሎቱሳን ኡፋይታና። 15 ጎዳ ሲንሳን ኢ ጊታ ጊዳና፤ ወይኔ ኡሻ ጊዲን ሃራ ማሶያ ኡሻ ኡዮና። ባ አዩ ኡሎን ደዲጌ ጊሻ አያናን ኩማና።

16 ኢስራዔል አሳታቴ ዳሮታ ባንታ ጎዳ፣ ያሳኮ ዛራና። 17 አዋታ ወዛና ናይታኮ ዛራና፣ ኪቱቶናይሳታ ጊሎታ ጨንጫቱሳኮ ዛራና ሜላ፣ ጎዳስ ቤሲያ ደሬ ጊጊሳናው ኤሊያሳ አያናኔ ወልቃን ጎዳ ሲንሳን ባና» ያገስ።

18 ማሪያሲ ኪታንቾዋኮ፣ «ታ ሄሳ አይቢን ኤራኔ? ታራኔ ታ ማቼራ ጨሚዳ» ያገስ።

19 ኪታንቾይ ዛራዲ፣ «ታኒ ያሳ ሲንሳን ኤቂያ ጋብሬሌ። ሃ ሚሺራቾዋ ኔው አዳናው ያሳፌ ኪቱታስ። 20 ሄኮ፣ ወዲያ ናጊዲ ፖሌቲያ ታ ቃላ ኔ አማኖና ኢዲያ ጊሾ ሃይሲ ፖሌታና ጋካናው ኔኔ ሙሜ ጊዳና፣ አዴታናወካ ዳንዳዳካ» ያገስ።

21 ሄ ወዴ ማሪያሲ ያሳ ኪሱ ጊሊዲ ጋምዲዳ ጊሾ አይቢ ሃኔዴ ጊዲ አሳይ ካሬን ናጊጌ ጋምዲስ። 22 ኢ ካሬ ኪዩዲ ኤንታና አዲሳናው ዳንዳዲቤና። ማሊ ቤሶቴ አቲን አዴታናው ዳንዳዳናይሳ ቤዲዳ ወዴ ቆንጨሱ ቤዲዳይሳ ኤሪደሶና።

23 ማሪያሲ ሃጋዜ ወዲያ ፖሊዲ ባ ሶ ሲሚስ። 24 ሄሳፌ ጉዮ፣ ኢያ ማቼያ ኤልሳቤዳ ቃንሳታሱ። ኢቻሹ አጌና ኩሜሲ ባና ጊንሳዳ ጋምዳሱ። 25 ኢያ፣ «ጎዳይ ባ ማሮታን ታ ቦሪያ አሳ ጊደፌ ዲጋናው ቤዲዲ ሃ ወዲያን ሃይሳ አሲስ» ያጋሱ።

የሱሳ ዩሎቱሳይ ኮይሮቲዲ አዴቲስ

1:5 1ታሪ 24:10 1:15 ታይ 6:3 1:17 ሚሊ 4:5-6 1:19 ዳኔ 8:16፤ 9:21

26 ኤልሳቤጥ ቃንሳቲን ኡሱፑንሳ አጌናን፤ ያሳይ ኪታንቸዋ ጋብሬሌ ጋሊሳ ቢታን ዴዲያ ናዚሬቴ ካታማ ኪቲስ። 27 ካዉዋ ዳዊቴ ሼሻፕ ጊዲዳ ዮሴፋ ጊያ ኡራስ አይሼቲዳ ጌላዌኮ ኪቲስ። ሄ ጌላዲያ ማይራዋ ጌቴታዉሱ። 28 ኪታንቸይ ኢኮ ቢዲ፤ «ዳሮ ዶሴቲዳሪ፤ ሳሮይ ኔው ጊዶ፤ ያሳይ ኔራ ዴዲስ» ያጊስ።

29 ማይራማ ኢያ አዳን ዳሮ ዳጋማዳ፤ «ሃይሲ አይቢ ሳሮሶ» ጋዳ ሄታሱ። 30 ኪታንቸይ ዛሪዲ፤ «ማይራሜ፤ ባቦፋ፤ ኔኒ ያሳ ሲንሳን ሳባ ዴማዳሳ። 31 ሄኮ ኔኒ ቃንሳታና አዴ ናዓ ዮላና፤ ኢያ ሱንሳካ ዮሱሳ ጋዳ ሱንሳና። 32 ኢ ጊታ ጊዳና፤ ኡባፌ ባላ ያሳ ናዓ ጌቴቲ ያጌታና። ጎዳ ያሳይ ኢያ አዋ ዳዊቴ አራታ ኢያው ኢማና። 33 ኢ ያይቆባ ሼሻ ባላ ሜሪናው ካዎታና፤ ኢያ ካዎቴሳስ ዛዊ ባዋ» ያጊስ።

34 ማይራማ ኪታንቸዋኮ፤ «ሄሲ ዋኒዲ ሃናኔ? ታ አዴ ኡሪኬ» ያጋሱ።

35 ኪታንቸይ ዛሪዲ፤ «ጌሻ አያናይ ኔ ባላ ዎዳና፤ ኡባፌ ባላ ያሳ ዎልቃይ ኔ ባላ ኩያታና። ሄሳ ጊሾ፤ ዮሌቲያ ጌሻ ናዓይ ያሳ ናዓ ጌቴታና። 36 ሄኮ፤ ኔ ዳቢያ ኤልሳቤጥ ባ ጨማቴሳ ላይሳን አዴ ናዓ ቃንሳታሱ። ኢያ ማይንሲ ጌቴቲዳሮ፤ ሺን ሃዲ ኡሱፑንሳ አጌና አይካሱ። 37 ያሳ ያኒያባይ ባዋ» ያጊስ።

38 ማይራማ፤ «ሄኮ፤ ታኒ ጎዳ አይሲው፤ ኔ ቃላዳ ታው ሃና» ያጋሱ። ሄሳፌ ጉዮ፤ ኪታንቸይ ኢፔ ሻኬቲስ።

39 ማይራማ ሄ ሳሚንታን ዴንዳዳ ዩሁዳ ቢታን ዴዲያ ኢሲ ጌኬ ካታማ ባሱ። 40 ዛካሪያሳ ሶ ጌላዳ ኤልሳቤጥ ሳሮሳሱ። 41 ኤልሳቤጥ ማይራሚ ሳሮሱዋ ሲዲዳ ዎዴ ኢ ኡሉዋን ዴዲያ ናዓይ ኡፋይሳን ጉፒስ። ኤልሳቤጥ ጌሻ አያናን ኩማዳ፤ 42 ባ ቃላ ዶቁ አሳዳ፤ «ኔኒ ማጫሳ ጊዶፌ አንጄቲዳሮ፤ ኔ ቃንሳቲዳ ናዓይካ አንጄቲዳይሳ። 43 ሃናሺን፤ ታ ጎዳ አዬ፤ ኔኒ ታኮ ያና ሜላ ታኒ አኔ? 44 ሄኮ ኔ ሳሮሱዋ ታ ሲዲዳ ዎዴ ታ ኡሉዋን ዴዲያ ናዓይ ኡፋይሳን ጉፒስ። 45 ጎዳይ ፖላና ጊዲ ኢሚዳ ቃላ አማኒዳሪ፤ ኢያ አንጄቲዳሮ» ያጋሱ።

ማይራሚ ማዘሙሪያ

46 ማይራማ ሃይሳዳ ያጋሱ፡
«ታ ሼምፒያ ጎዳ ቦንቻዉሱ፤
47 ታ አያናይ ዳሊያ ያሳን ኡፋይቴስ።
48 ኢ ባ አይሌ ካዉሻቴሳ ቢዲስ።
ሃቺፌ ዶሚዲ ዮሌቴሲ ኡባይ ታና አንጄቲዳሮ ጋና።

1:27 ማቶ 1:18 1:31 ማቶ 1:21 1:32 2ሳሙ 7:12-13፤ 16፤ ኢሳ 9:7
1:37 ሜዴ 18:14 1:46 1ሳሙ 2:1-10 1:48 1ሳሙ 1:11

49 አይስ ጊኮ፥ ዎልቃማ ጊዲዳ ኢ፥ ታው ጊታባ አሲስ።
 ኢያ ሱንሳይ ጌሻ።
 50 ኢያ ቦንቹይሳታ ቦላ፥
 ኢያ ማሮቴሳይ ሜሪናፕ ሜሪና ጋካናሳ።
 51 ባ ቄሲያን ሚኖባ አሲስ፥
 ባንታ ዎዛናን አቶርቴይሳታ ላሊስ።
 52 ዎልቃማ ካዎታ አራታፕ ካዉሺስ፤
 ባንታና ካዉሺዳይሳታ ካቦይስ።
 53 ኮሻቲዳይሳታ ሎዎባን ካልሲስ፥
 ሺን ዱሬታ ሜላ ኩሼ ዩዲስ።
 54 ባ ማሮታ ቆፒዲ፥
 ባ አይሊያ ኢስራዔል ማዲስ።
 55 ሄሲካ ኑ አዎታስ አዲዳ ቃላ፥
 አብራሃሜሲኔ ኢያ ሼሻስ ጊዳይሳ ሜሪናው ፖላናሳ»
 ያጋሱ።
 56 ማይራማ ኤልሳቤጊ ማታን ሄዥ አጌና ሜላ ጋምዳዳ ባ ሶ
 ሲማሱ።

ፃማቂያ ዮሃንሳ ዩሌቴሳ

57 ኤልሳቤጊስ ዩሎ ቃማይ ጋኪን አዴ ናዓ ዩላሱ። 58 ኢ
 ሾሮቲኔ ኢ ዳቦቲ ጎዳይ ጊታ ማሮታ አሲዳይሳ ሲዲዲ፥ አራ
 ኢሲፌ ኡፋይቲዶሶና። 59 ሆስፑንሳ ጋላሳን ዮጋ ናዓ ቃፃራናው
 ዩዶሶና። ኢያ አዎ ሱንሳን ዛካሪያሳ ጊዲ ሱንሳናው ኮዩዶሶና።
 60 ሺን አያ፥ «አካይ፥ ዮሃንሳ ጌቲታናው ቤሴስ» ያጋሱ።
 61 ኤንቲካ፥ «ኔ ዳቦታፕ ሃ ሱንሳን ዌጌቲዳይ አኒካ ባዎ» ያጊዶሶና።
 62 ኢያ አዎይ እና ጊዲ ሱንሳኔኮ ኤራናው ኮዩዲ ኢያ ማላ
 አይቺዶሶና። 63 ኢ ፃፊያባ አይቺ ኤኪዲ፥ «ኢያ ሱንሳይ ዮሃንሳ»
 ጊዲ ፃፊስ። ኡባይ ኢ ፃፊዳይሳ ቤዲዲ ማላሌቲዶሶና። 64 አራ
 ዛካሪያሳ ኢንፃርሳይ ቤሌቲስ፥ ዶሳ ጋላቲሼ አዴቴሲ አይኪስ።
 65 ሾሮቲ ኡባይ ያሻን ኩሚዶሶና፥ ሃ ሃኒዳባይ ጊዜ ዩሁዳ ቤታን
 አዴቲስ። 66 ሄሳ ሲዲዳ ኡባይ፥ «ሃ ናዓይ አይ ሃናንዴሻ» ጊዲ
 ባንታ ጊዶን አዴቲዶሶና፥ ጎዳ ኩሼይ ኢያራ ዴዔስ።

ዛካሪያሳ ማዝሙሪያ

67 ዮሃንሳ አዎይ ዛካሪያሲ ጌሻ አያናን ኩሚዲ ሃይሳዳ ያጊዲ
 ቲንቤቴ አዲስ።
 68 «ኢስራዔሊያ ጎዳይ ጋላቴቶ፥
 ዩዲ ባ አሳ ዎዚስ።

1:52 ኢዮ 5:11፤ 12:19 1:55 1ሳሙ 2:1-10 1:55 ሜዴ 17:7 1:59
 ሌዌ 12:3

- 69 ባ አይሊያ ዳዊቱ ከላን
አቶቴሳ ካጪያ ዴንሲስ።
- 70 ሄሲካ ቤኒ ዎዴ ጌሻ ናቤታ ዶናን አዴቲዳይሳ ሜላ፥
- 71 ኢያ አሾይ ኑ ሞርኬታፔኔ
ኑራ ኤቁቲያ ኡባ ኩሺያፔ።
- 72 ሄሳ ኢ አሲዳይ ኑ አዋታስ ባ ማሮታ ቤሳናሲኔ፥
ባ ጌሻ ጫቁዋ ናጋናሳ።
- 73 ኑ አዋ አብራሃሜስ ጫቁዳ
ጫቁዋ ቆጋናሲኔ
- 74 ኑ ሞርኬታ ኩሼፔ ኬሲዲ
ያሺ ባይና ኢያ ሃጋዛና ሜላሳ።
- 75 ኑ ላይሳ ኡባን ጌሻቴሳኒኔ ጊሎቴሳን
ባ ሲንሳን ኑና ኤሳናሳ።
- 76 ቃሲ ላ ናዓው፥ ኔኒ ኡባፌ ቦላ ዎሳ ናቤ ጌቲታና፥
ጎዳ አጊያ ሎይሳናው ኔ ኢያ ሲንሳን ባና።
- 77 ኤንታ ናጋራይ ቁሼቲን፥
ኤንቲ አቶቴሲ ዴማናይሳ ኔ ጎዳ ዴሪያስ አዳና።
- 78 ኑ ዎሳ ሎዎ ማሮቴሳፌ ዴንዶይሳን
ዎንታ ገልቁይ ኑስ ሳሉዋፔ ኬዩስ።
- 79 ሄሲካ ጳማኒኔ፥
ሃይቆ ኩያ ጋርሳን ዴዔይሳታስ ፖዒሳናሳ፥
ኑ ቶሁዋካ ሳሮ አጊያኮ ዛራናሳ»

ያጊስ።

⁸⁰ ናዓይ ዲጪስ፥ አያናን ሚኒስ፥ ኢስራዔል አሳስ ቆንጫና ጋካናው ባዞ ቢታን ዴዒስ።

2

ዮሱሳ ዮሌቴሳ
(ማቶ 1:18-25)

¹ ሄ ዎዴ ሮሜ ቢታን ዴዒያ አሳ ኡባይ ታይቤታና ሜላኔ ሱንሳይ ገፌታና ሜላ ካዎይ አውጊስዎሲ ኪቲስ። ² ሄሲካ ቁሬኖሲ ሶሬ ቢታ አይሲያ ዎዴ አሴቲዳ ኮይሮ ታይቡዋ። ³ ሄሳ ጊሾ፥ ኢሲ ኢሲ አሲ ባ ሱንሳ ገፌታናው ባ ዮሌቴዳ ቢታ ቢስ።

⁴ ዮሴፊካ ዳዊቱ ከሳፊኔ ያራፔ ጊዲዳ ጊሾ ጋሊላ ናዚሬቴ ካታማፔ ዴንዲዲ ዳዊቱ ካታማ ጊዲዳ ዩሁዳ ቤቴሌሜ ቢስ።

⁵ ቢሼ፥ ዮላናው ዎዴይ ዉሪዳ ኢ አይቺ ዎሲዳ፥ ማይራሚራ ዎላ ገፌታናው ቢስ። ⁶ ኤንቲ ያን ዴዒሺን ኢው ዮሎ ዎዴይ

ጋኪስ። 7 ባ ባይራ ናዓ ዩላሱ። ጩርቃራ ገገዳ ኢማሲ አቂያሶን ቤሲ ዳዩዳ ጊሾ ዳራን ሜሄ ሙዚያ ጎንጌን ዜንዒሳሱ።

ሄንሳንቾታኔ ኪታንቾታ

8 ሄ ጋዲያን ቃማ ዶርሳ ወዲያ ናጊሼ ካሬን አቂያ ሄንሳንቾታ ዴዎሶና። 9 ጎዳ ኪታንቾታ ሃሳዮና ዩዲ ኤንታ ማታን ኤቂስ። ጎዳ ቦንቾይ ኤንታ ዩሹዋን ፖዒስ፤ ኤንቲካ ዎልቃማ ያሺ ያዩዶሶና። 10 ሺን ኪታንቾታ፡ «ያዮፊቱ! ሄኮ፣ አሳ ኡባስ ጊዲያ ጊታ ኡፋይሳ ሚሺራቸዋ ኤካዳ ያስ። 11 ሄሲካ፣ ዳዊቱ ካታማን አሺይሲ ሂንቴው ሃቺ ዩሌቲስ። ኢ ጎዳ ኪሪስቶሳ። 12 ዞቃሌ ናዓይ ጩርቃራ ገገቲዲ ጎንጌን ዜንዒዳይሳ ሂንቴ ዴማና፤ ሄሲካ ሂንቴው ማላ ጊዶ» ያጊስ።

13 ቆፖና ዳሮ ሳሎ ኪታንቾታ ኪታንቾውራ ኢሲፌ ቆንጨዲ፣ 14 «ቦንቾይ ያሳስ ጶቃ ሳሉዋን፣

ሳሮይ ቢታ ቦላ ያሳይ ዶሲያ አሳስ ጊዶ»

ያጊዲ ጋላቲዶሶና።

15 ኪታንቾታ ኤንታፌ ሻኬቲዲ ሳሉዋ ኬዩዳፔ ጉዩ ሄንሳንቾታ፣ «አኔ ጎዳይ ኑስ ቆንጨሲዳባኔ ሃኒዳባ ቤዓናው ቤቴሌሜ ቦስ» ያጊዶሶና።

16 ኤንቲካ ኤሌሲዲ ቢዶሶና። ማይራዎ፣ ዮሴፋኔ ዞቃሌ ናዓ ጎንጌን ዜንዒዳይሳ ቤዒዶሶና። 17 ቤዒ ሲሚዲ ናዓባ ኤንታው አዴቶይሳ፣ ቆንጨሲዲ ሄ ቤሳን ዴዒያ አሳስ ማርካቲዶሶና። 18 ሄሳ ሲዒዳ ኡባይ ሄንሳንቾታ ኦዲዳይሳን ማላሌቲዶሶና። 19 ማይራማ ሃኒዳባ ኡባ ባ ዎዛናን ቆፓሼ ዴዓሱ። 20 ሄንሳንቾታ ኤንታው አዴቲዳይሳ ሃኒን ቤዒዶሶና። ሄሳ ጊሾ፣ ባንታ ሲዒዳባሲኔ ቤዒዳባ ኡባስ ያሳ ቦንቾሼኔ ጋላቲሼ ሲሚዶሶና።

ዮሱሳ ያሳ ኬሲ ኤፊዶሶና

21 ሆስፑንሳ ቃማን፣ ቃፃሮ ዎዴይ ጋኪን፣ ኢ ቃንሳታናፔ ሲንሴ ኪታንቾይ ዎሲዳ ሱንሳን ዮሱሳ ጌቲቲስ። 22 ሙሴ ዎጋ ሜላ ኤንታ ጌሻቴላ ዎዴይ ፖሌቲዳፔ ጉዩ ዮሴፋራኔ ማይራሚራ ዮጋ ናዓ ባንታ ጎዳስ ኢማናው ዩሩሳላሜ ቢዶሶና። 23 ሄሲካ፣ ጎዳ ዎጋን፣ «አዴ ጊዲዳ ባይራ ናዒ ኡባይ ጎዳስ ዱማቲዳይሳ ጊዶ» ጌቲቲዲ ገፌቲዳይሳ ፖላናሳ። 24 ቃሲ ጎዳ ዎጋን፣ ናምቡ ኩራቾ ዎይኮ ሆሌ ያርሻናው ኤፊዶሶና። 25 ሄ ዎዴ ጊሺኔ አማኖራ ሚኖ ጊዲዳ ሲሞና ጌቲቲያ አሲ ዩሩሳላሜን ዴዔስ። ኢ ኢስራዔሌታ አቶቴላ ናጊሼ ዴዔስ። ጌሻ አያናይካ ኢያ ቦላ ዴዔስ። 26 ቃሲ ኪሪስቶሳ ቤያና ሃይቆናይሳ ጌሻ አያናይ ኢያው ቆንጨሲን ኤራዲ

2:21 ሉዌ 12:3፣ ሉቃ 1:3 2:22 ሉዌ 12:6-8 2:23 ኬሳ 13:2፣ 12

ዴዔስ።²⁷ ኢሄ ጋላስ አያናይ ካሌሲን ያሳ ኬሲ ቢስ። ናዓ አዩራኔ አዋራ ዎጋ ፖላናው ዮጋ ናዓ ዩሱሳ ኤኪዲ ጌሊዳ ዎዴ

²⁸ ሲሞኒ ሞኪ ኤኪዲ ናዓ ኢዲሚዲ።

²⁹ «ጎዳው ኔ ታው ጌሊዳ ቃላ ሜላ።
ሃዲ ኔ አይሊያ ሳሮን ሞይዛ።

³⁰ ታ አይፌይ አሳ ኡባ ሲንሳን ኔ ጊጊሲዳ።

³¹ ኔ አሹዋ ቤዒስ።

³² ሄሲካ ካዎቴሳታ ኡባስ።

ያሳ አጊያ ቆንጨሲያ ፖያ።

ኔ አሳ ኢስራዔልስካ ቦንቾ»

ያጊዲ ያሳ ጋላቲስ።

³³ ዮሴፋራኔ ማይራሚራ ኢያው አዴቲዳባን ማላሌቲዶሶና።

³⁴ ሲሞኒ ኤንታ አንጂስ። አዩ ማይራሚኮ። «ሄኮ ዳሮ አሳ ዎዛና ቆፋይ ቆንጫና ሜላ። ኢስራዔልን ዴዒያ ዳሮታስ ኤንታ ኩንዴሳሲኔ ዴንዱዋስ ያሳን ዶራቲስ።³⁵ ቃሲ ኤቁቴይሳታስ ማላ ጊዳና። ኔ ሼምፑዋራካ ቃሲ ማሺ አዳና» ያጊስ።³⁶ ቃሲ አሴራ ያራፔ ጊዲዳ ፋኑዔላ ናዒያ ሃና ጌቴቲያ ናቤይ ዴዓዉሱ። ኢያ ዳሮ ጨማሱ፤ ኢያ ባ ኮይሮ አዚናራ ላፑን ላይሲ ዴዓሱ።³⁷ ኢ አዚናይ ሃይቂን ሆስፑን ታማኔ አይዱ ላይሲ ጊዳና ጋካናው ቃማኔ

ጋላስ ፓጩይ ባይና ዎሳኒኔ ዎማን ያሳ ኬሳን ሃጋዛሱ።³⁸ ኢያ ሄ ሳቲያን ባዳ ያሳ ጋላታሱ፤ ዩሩሳላሜ ዎዜቴሳ ናጊያ ኡባስ ዮጋ ናዓባ ማርካታሱ።³⁹ ዮሴፋራኔ ማይራሚራ ጎዳ ሂጊያን ኪቴቲዳ ዎጋ ኡባ ፖሊዳፔ ጉዩ ጋሊላ ቢታን ዴዒያ ባንታ ካታማ ናዚሬቴ ሲሚዶሶና።⁴⁰ ናዓይ ዲጨሼኔ ሚኒሼ ቢስ።

ጨንጫቴሳን ኩሚስ፤ ያሳ አዶ ኬሃቴሳይ ኢያ ቦላ ዴዔስ።

ዮሱሲ ያሳ ኬሲ ቢስ

⁴¹ ዮሴፋራኔ ማይራሚራ ፋሲካ ባሌ ቦንቻናው ላይሳን ላይሳን ዩሩሳላሜ ቦሶና።⁴² ዮሱሳስ ታማኔ ናምዑ ላይሲ ጊዲያ ዎዴ ካሴ ሜዜቲዳይሳዳ ባሊያ ቦንቻናው ቢዶሶና።⁴³ ባሊያ ቦንቻዳፔ ጉዩ ሶ ሲሚያ ዎዴ ናዓይ ዮሱሲ ዩሩሳላሜን አቲስ። ሺን ዮሴፋራኔ ማይራሚራ ኢ ዩሩሳላሜን አቶይሳ ኤሪቦኮና።⁴⁴ ኢ ሶ ሲሚያ አሳራ ዎላ ዴዒያ ዳኒን ኤንቲ ኢሲ ጋላሳ አጌ ቢዶሶና። ኢ ባይናይሳ ኤሪዳፔ ጉዩ ባንታ ዳቦታኔ ላጌታ ማታን ኮዩዶሶና።⁴⁵ ኢ ያን ዳዩን ኮዩሼ ጉዩ ዩሩሳላሜ ጋካናው ቢዶሶና።

2:32 ኢሳ 42:6፤ 49:6፤ 52:10 2:39 ማቶ 2:23 2:41 ኬሳ 12:1-27፤ ዛሬ 16:1-8

46 ሄዡ ጋላሳ፤ ጉዩ ያሳ ከላን አስታማሪታ ጊደን ኡቲዲ ኤንታባ ሲዲሼኔ ኤንታ አይቺሼ ዴዲሺን ዴሚዶሶና። 47 ኢያ ሲዲያ ኡባይ ኢያ አከካኒኔ ዛሩዋን ማላሌቲዶሶና።

48 ሶ አሳይ ኢያ ዴሚዳ ዎዴ ማላሌቲዶሶና። ኢያ አያካ፥ «ታ ናዓው፥ አይስ ኑና ሃይሳዳ አሳዲ? ኔ አዋራኔ ታራ ኔና ኮዬሼ ኡንዔቲዳ» ያጋሱ።

49 ዩሱሲ ኤንታኮ፥ «ታና አይስ ኮዬቲ? ታ፥ ታ አዋ ከላን ዳናው ቤሴይሳ ኤሬኪቲ» ያጊሰ። 50 ሺን ኢ ኤንታኮ ጊዳባ ኤንቲ አከኪቦኮና።

51 ሄሳፌ ጉዩ፥ ኤንታራ ኢሲፌ ናዚሬቴ ካታማ ቢስ። ኤንታው ኪቴቲሼ ዴዲስ። ኢያ አያ ሄ ኡባ ባ ዎዛናን ዎሳዳ ናጋሱ።

52 ዩሱሲ፥ ጨንጫቴላን፥ ጌሳኒኔ ቴማን ያሳ ሲንሳኒኔ አሳ ሲንሳን ዲጨሰ።

3

ፃግቂያ ዮሃንሳ ቲሚርቲያ (ማቶ 3:1-12፤ ማር 1:1-8፤ ዮሃ 1:19-28)

1 ካዎይ ዒባርዮሲ ሮሜ ቢታን ካዎቲን፥ ታማኔ ኢቻሻንሶ ላይላን፥ ጳጉዜ ጲላዮሲ ዩሁዳ ሃሪያ ዎዴ ሄሮዲሲ ጋሊላ ሃሪያ ዎዴ ኢያ ኢሻ ፊልጶስ ኢጮሪያሳኔ ዒራኮንዶሳ ሃሪያ ዎዴ ሊሳኒዮሲ አብላኒሳ ሃሪያ ዎዴ 2 ሃናራኔ ቃያፋራ ካሂኔ ሃላቃ ጊዲ ዴዲሺን፥ ያሳ ቃላይ ዛካሪያሳ ናዓ ዮሃንሳኮ ባዞ ቢታ ዩስ።

3 ዮሃንሲ፥ «ሂንቴ ናጋራ፤ ሲሚቴኔ ፃግቂቲቴ። ያሳይ ሂንቴ ናጋራ አቶ ጋና» ያጊዲ ታማርሲሼ ዮርዳኖሴ ሻፋ ሄራን ዴዲያ ቢታ ኡባ ቢስ። 4 ሄሲካ ናቤይ ኢሳያሲ ባ ማፃፋን፥

«ባዞ ጊደን ባ ቃላ ጶቁ አሲዲ፥

ዋሲያ ኡራ ቃላይ፥

ጎዳ አጊያ ጊጊሲቴ፥

ሆሮጋካ ፒዲ አሲቴ።

5 አፎ ኡባይ ኩማና፥

ዙማይኔ ዴሬይ ዚቂ ጋና።

ዎቤ አጊይ ሉላና፥

ጊጎና ሆሮጋይ ቂንዒ ጋና።

6 አሾ ማዲዳ ኡባይ፥

ያሳ አሾዋ ቤዓና»

ጊዲ ፃፊዳይሳዳ ሃኒስ።

7 የሃረሲ፡ ባ ኩሼን ገማቁታናው ዩዳ አሳኮ፡ «ሂንቴኖ፡ ሾሻ ናይቶ ያናው ዴዲያ ሃንቁዋፌ አታና ሚላ ሂንቴና ዞሪዳይ አኔ? 8 ሂዛ፡ ሂንቴ ሲሙዋ ቆንጨሲያ ሎዎ አሶ አሲቴ፡ ሂንቴ ዎዛናን፡ ሱስ፡ ኑ አዋይ አብራሃሜይ ዴዴስ ጊዲ ጩቁቶፊቴ።» ሃ ሲዲቴ፡ ሃ ሹቻታፕ ያሳይ አብራሃሜስ ናዓ ኬሳናው ዳንዳዴስ። 9 ሄኮ፡ ቤዴይ ሚላ ሃጸን ዴዴስ። ሂዛ፡ ሎዎ አይፌ አይፎና ሚላ ኡባይ ቃንጻቲዲ ታማን ዩጌታና» ያጊስ።

10 አሳይ፡ «ያቲን ኑኒ አይ አሲኖ?» ያጊዲ አይቺዶሶና።

11 የሃረሲ ዛሪዲ፡ «ናምው አፊሊ ዴዲያ አሲ ባይናይሳስ ኢሞ። ካሲ ዴዴይሲ ባይናይሳስ ኢሞ» ያጊስ።

12 ቃራፃ ቃንጻሲይሳቲ ገማቁታናው ዩዲ፡ «አስታማሪያው፡ ኑኒ አይ አሲኖ?» ያጊዶሶና።

13 ኢ ዛሪዲ፡ «ሂንቴ ቃንጻሳናው ኪቴቶይሳፌ አሲዲ ኤኮፊቴ» ያጊስ። 14 ቃሲ ዎታዳሬቲ ዩዲ፡ «ኑኒ አይ አሲኖ» ያጊዲ አይቺዶሶና።

የሃረሲ፡ «አዴባካ ዎልቃን ዳፊዲ ኤኮፊቴ፡ አናካ ዎርዶን ሞቶፒቴ፡ ሂንቴ ዳሞዜይ ሂንቴው ጊዶ፤ ኡፋይቲዲ ዴዴቴ» ያጊስ።

15 አሳይ ኪሪስቶሳ ናጊሼ ዴዲያ ጊሾ የሃረሳ፡ «ኢ ኪሪስቶሳ ጊዳንዴሻ?» ጊዲ ቆፒዶሶና። 16 የሃረሲ ኡባስ ዛሪዲ፡ «ታኒ ሂንቴና ሃሳን ገማቃይስ፡ ሺን ታፕ አዲዲ ዎልቃሜይሲ ያና። ታኒ ኢያ ጫማ ዎዶናዋ ቢላናው ቤሶና አሲ። ኢ ሂንቴና ጊሻ አያናኒኔ ታማን ገማቃና። 17 ወዱማን ዴዲያ ካሳ ፖሎ ጊሻናው ፒሴይ ኢያ ኩሼን ዴዴስ። ጊሻ ካሳ ባ ሻሊያን ቆላና፤ ካሊያ ዳዮና ታማን ፀጋና» ያጊስ።

18 ቃሲ የሃረሲ አሳ ዳሮ ዞሬ ዞሪዲ ዎንጌላ * አዲስ።

19 ሺን የሃረሲ ሄሮዲሲ ባ ኢሻ ማቺው፡ ሄሮዲያዳ፡ ኤኪዳ ጊሾኔ ሃራ ኢታ አሶታ ጊሾ ካጨዳ ዎዴ 20 ሄሮዲሲ ካሴይሳ ቦላ ሃራባ ኡባ ጉጂዲ የሃረሳ ዎይኔ ጌልሲስ።

ዮሱሳ ገማቁታሳ
(ማቶ 1:1-17፤ 3:13-17፤ ማር 1:9-11)

21 የሃረሲ ቃሼታናፕ ሲንሴ አሳ ኡባ ገማቁዲ ሲሚን፡ ዮሱሲካ ቃሲ ገማቁቲስ። ኢ ዎሲሺን ሳሎይ ዶዩቲስ። 22 ጊሻ አያናይ

3:7 ማቶ 12:34፤ 23:33 3:8 ዮሃ 8:33 3:9 ማቶ 7:19 3:12 ሉቃ 7:29 * 3:18 ዎንጌላ፡ ጊሪኬ ዶናን ዎንጌላ ጊያ ቃላይ ዳሮ ኡፋይሲያ አዳ ዎይኮ ሚሺራቾ ጉሱ። ሄ ሚሺራቾይካ ኪሪስቶሲ አሳ ዜሬሲ ኡባ ሜሪና ፒርዳሬ አሻናው ኪቴቲዲ ዩዳ ጊታ ኡፋይሳ (ሉቃ 1:19፤ 2:10)። 3:19 ማቶ 14:3-4፤ ማር 6:17-18

ሆሎዳ ቤንጉሼ ኢያ ቦላ ኡቴስ። ሳሎፕ «ታኒ ዶሲያ ናዓይ ኔና፤ ኔ ታና ኡፋይሳሳ ያጊያ» ቃላይ ዩስ።

23 ዩሱሲ ታማርሶ አይኪያ ዎዴ ኢያው ሃስታሙ ላይሲ ጊዲሺን፣ አሳይ ኢያ ዮሴፋ ናዓ ጊዲ ቆፒስ።

ዮሴፊ ኤሌ ናዓ፣ 24 ኤሌይ ማቴ ናዓ፣

ማቴይ ሌዌ ናዓ፣ ሌዌይ ማልካ ናዓ፣

ማልኪይ ዮና ናዓ፣ ዮኒ ዮሴፋ ናዓ፣

25 ዮሴፊ ማታቴ ናዓ፣ ማታቴይ አሞዌ ናዓ፣

አሞዌይ ናሆሜ ናዓ፣ ናሆሜይ አሲሊሜ ናዓ፣

አሲሊሜይ ናጌ ናዓ፣ 26 ናጌይ ማዓቴ ናዓ፣

ማዓቴይ ማታቴዮ ናዓ፣ ማታቴዮይ ሳማዮ ናዓ፣

27 ሳማዮይ ዩሁዳ ናዓ፣ ዩሁዲ ዮናኔ ናዓ፣ ዮናኔይ ራሴ ናዓ፣

ራሴይ ዜፋባቤላ ናዓ፣ ዜፋባቤሌይ ሳላቴያሌ ናዓ፣

ሳላቴያሌይ ኔሬ ናዓ፣ 28 ኔሬይ ማልካ ናዓ፣

ማልኪይ ሃዴ ናዓ፣ ሃዴይ ቆሳሜ ናዓ፣

ቆሳሜይ ኤልሞዳኔ ናዓ፣ ኤልሞዳኔይ ኤሬ ናዓ፣

29 ኤሬይ ዮሴዔ ናዓ፣ ዮሴዔይ አላዛራ ናዓ፣

አላዛሪ ዮራሜ ናዓ፣ ዮራሜይ ማቴ ናዓ፣

ማቴይ ሌዌ ናዓ፣ 30 ሌዌይ ሲሞና ናዓ፣

ሲሞኒ ዩሁዳ ናዓ፣ ዩሁዲ ዮሴፋ ናዓ፣

ዮሴፊ ዮናኔ ናዓ፣ ዮናኔይ ኤሊያቄሜ ናዓ፣

31 ኤሊያቄሜይ ማሊዮ ናዓ፣ ማሊዮይ ማይናኔ ናዓ፣

ማይናኔይ ማቴ ናዓ፣ ማቴይ ናታኔ ናዓ፣

ናታኔይ ዳዊቴ ናዓ፣ 32 ዳዊቴይ ኢሴዮ ናዓ፣

ኢሴዮይ ኢዮቤዴ ናዓ፣ ኢዮቤዴይ ቦዔዛ ናዓ፣

ቦዔዚ ሳልሞና ናዓ፣ ሳልሞኔይ ናዓሶና ናዓ፣

33 ናዓሶኔይ አሚናዳቤ ናዓ፣ አሚናዳቤይ ራሜ ናዓ፣ ራሜይ

አርኔ ናዓ፣

አርኔይ አስሮሜ ናዓ፣ 34 አስሮሜይ ፋሬሴ ናዓ፣

ፋሬሴይ ዩሁዳ ናዓ፣

ዩሁዲ ያይቆባ ናዓ፣

ያይቆቢ ዩሳቃ ናዓ፣ ዩሳቂ አብራሃሜ ናዓ፣

አብራሃሜይ ታራ ናዓ፣ 35 ታሪ ናኮሬ ናዓ፣

ናኮሬይ ሳፋጌ ናዓ፣ ሳፋጌይ ሬሁ ናዓ፣

ሬሁይ ፋሌቄ ናዓ፣ ፋሌቄይ ኤቤራ ናዓ፣

ኤቤሮይ ሴላ ናዓ፣ 36 ሴሊ ቃይናሜ ናዓ፣

ቃይናሜይ አርፋኪሳዳ ናዓ፣ አርፋኪሳዴይ ሴሜ ናዓ፣

3:22 ሜዴ 22:2፣ ማዝ 2:7፣ ኢሳ 42:1፣ ማቶ 3:17፣ ማር 1:11፣ ሉቃ 9:35

ሴሜይ ኖሄ ናዓ፥ ኖሄይ ላሜሄ ናዓ፥
 37 ላሜሄይ ማቱሳላ ናዓ፥ ማቱሳሊ ሄኖኬ ናዓ፥
 ሄኖኬይ ያሬዴ ናዓ፥ ያሬዴይ ማላልዔላ ናዓ፥
 ማላልዔሊ ቃይናኔ ናዓ፥ 38 ቃይናኔይ ሄኖሳ ናዓ፥
 ሄኖሴይ ሴታ ናዓ፥ ሴቴይ አዳሜ ናዓ፥
 አዳሜይ ያሳ ናዓ።

4

ዮሱሲ ፓጩቲስ
 (ማቶ 4:1-11፤ ማር 1:12-13)

1 ዮሱሲ ጌሻ አያናን ኩሚዲ ዮርዳኖሴ ሻፋፔ ሲሚዳ ሜላ አያናይ ኢያ ባዞ ኤፊስ። 2 ያን አይታሙ ጋላሲኔ ቃማ ዓላሄን ፓጩቲስ። ሄ ጋላሳታን አይኮካ ሞና ጋምዒዳ ጊሾ ወርሴላን ኮሻቲስ።

3 ዓላሄይ ኢያኮ፥ «ኔኒ ያሳ ናዓ ጊዲኮ አኔ ሃይሲ ሹቻይ ኡይሉ ጊዶ ጋዳ ኪታ» ያጊስ።

4 ዮሱሲ ዛሪዲ፥ «አሲ ኡይሳ ዓላላን ዴና ጌቴቲዲ ዓፌቲስ» ያጊስ።

5 ሄሳፌ ጉዮ፥ ዓላሄይ ዮሱሳ አዱሳ ዴሬ ቦላ ኬሲዲ ሃ አላሚያ ካዎቴሳታ አይፌ ቂጲ ዛራናው ቤሲስ። 6 ዓላሄይ፥ «ሃ ኡባስ ማታይኔ ቦንቾይ ታው ኢሜቲስ። ታኒ ዶሲዳ አዴስካ ኢሚያ ጊሾ ኔው ኢማና። 7 ሄሳ ጊሾ፥ ኔኒ ታው ጎይኒኮ ኡባይ ኔው ጊዳና» ያጊስ።

8 ዮሱሲ ዛሪዲ፥ «ኔ ጎዳ፥ ኔ ያሳ፥ ኢያ ዓላላ ጎይና ጌቴቲዲ ዓፌቲስ» ያጊስ።

9 ወርሴላን ዓላሄይ ዮሱሳ ዮሩሳላሜ ኤፊዲ ያሳ ኬሳስ ሁዒያ ቦላ ኤሲዲ፥ «ኔኒ ያሳ ናዓ ጊዲኮ አኔ ዱጌ ሳዓን ኔና ዮጋ። 10 አይስ ጊኮ፥

<ኔና ናጊያ ኪታንቾታ ያሳይ ኔ ጊሾ ኪታና።

11 ኤንቲ ኔ ቶሆይ ሹቻን ዱቤቶና ሜላ፥ ባንታ ኩሺያን ዶቁ አሲዲ ኔና ዴንሳና ጌቴቲዲ ዓፌቲስ» ያጊስ።

12 ዮሱሲ ዛሪዲ፥ «ኔ ጎዳ ያሳ ፓጮፋ ጌቴቲዲ ዓፌቲስ» ያጊስ።

13 ገላሄይ ዮሱስ ፓጩያ ወርሲዳፔ ጉዩ ሃራ ኢንጂ ዎዴ ዴማና ጋካናው ኢያፔ ሻኬቲስ።

ዮሱሲ ጋሊላን ታማርሶ አይኪስ
(ማቶ 4:12-17፤ ማር 1:14-15)

14 ዮሱሲ አያና ዎልቃን ኩሚዲ ጋሊላ ሲሚስ። ኢያ ሱንሳይ ሄራን ዴዲያ ቢታ ኡባን ኬዩስ። 15 ኢ አይሁዴ ዎሳ ኬሲ ጌሊዲ ታማርሲስ፤ አሳ ኡባይ ኢያ ጋላቲዶሶና።

16 ያፔ ኢ ዲጩዳ ካታማ ናዚሬቴ ዩስ። ካሴ ሜዜቲዳይሳዳ ሳምባታ ጋላስ አይሁዴ ዎሳ ኬሲ ጌሊስ። ናባባናወካ ዴንዲ ኤቂስ። 17 ናቢያ ኢሳያሳ ማፃፋይ ኢያው ኢሜቲን፣ ዶዩዲ፣ ሃይሳዳ ያጊዲ ፃፌቲዳይሳ ዴሚስ።

18 «ጎዳ አያናይ ታ ቦሳ ዴዴስ፣
ማንቆታስ ዎንጌላ አዳና ሜላ
ዶሳይ ታና ዶሪስ።

ቃሼቲዳይሳታስ ቢሌቴሲ፣
ቆቂዳይሳታ ሄሊሳናሲኔ
ኡንዲቲዳይሳታ ቢርሻና ሜላ።

19 ዶሳይ ኬሃናው ቆፒዳ ላይሳ አዳና ሜላ ታና ኪቲስ» ያጊስ።

20 ሄሳፌ ጉዩ፣ ማፃፋ ፃፂዲ ሃጋዜይሳስ ኢሚዲ ታማርሳናው ኡቲስ። አይሁዴ ዎሳ ኬሳን ዴዲያ አሳቲ ኡባይ ጫዲ ሄሎሶና።

21 ኢ፣ «ሃይሲ ሂንቴ ሃይሳን ሂንቴ ሲዲያ ሃ ማፃፋ ቃላይ ሃቺ ፖሌቲስ» ያጊስ።

22 ኡባይ ኢያባ ዳርሲዲ አዴቶሶና። ቃሲ ኢያ ዶናፔ ኬያ አጶ ኬሃቴሳን ኩሚዳ ቃላን ማላሌቲሼ፣ «ሃይሲ ዮሴፋ ናዓ ጊዴኔዩ?» ያጊዶሶና።

23 ኢ፣ «(ኔዮ ዳሌ አዋው ኔና አሻ፣ ቂፊርናሆሜን ኔ አሲዳባ ኑ ሲዶይሳ ቃሲ ሃይሳን ኔ ካታማን አሳ) ያጊያ ሌሚሱዋን ሂንቴ ታና ጋናይሳስ ሲዴይ ባዋ» ያጊስ። 24 ቃሲ፣ «ቴማ አዳይስ፤ ናቢይ ባ ዩሌቲዳ ቢታን ቦንቼቴና።

25 «ታ ሂንቴው ቴማ አዳይስ፤ ሳሎይ ሄቩ ላይሲኔ ባጋ ጎርዴቲን ሚኖ ኮሺ ቢታ ኡባን ዴዲያ ኤሊያሳ ዎዴ ዳሮ አምዴቲ ኢስራዴሌን ዴዎሶና። 26 ኤሊያሲ ኤንታፌ ኢሲኔኮካ ኪቴቲቤና። ሺን ሳራፕታን ዴዲያ አምዴኮ ኪቴቲስ። 27 ናቢያ ኤልሳዴ ዎዴ ኢስራዴሌን ዳሮ ባሮ ሃርጋንቾቲ ዴዎሶና። ሺን ሶሬ ኡራ ኒዲማኔፔ አቲን አኒካ ፓዒቤና» ያጊስ።

4:18 ኢሳ 61:1-2 4:24 ዮሃ 4:44 4:25 1ካዎ 17:1 4:26 1ካዎ 17:8-16 4:27 2ካዎ 5:1-14

28 አይሁዴ ዎሳ ኬሳን ዴዲያ አሳ ኡባይ ሄሳ ሲዲዳ ዎዴ ዳር ዩሎቲዶሶና። 29 ባንታ ኡቲዳ ቤሳፌ ዴንዲዲ ዙማ ቦላ ኬዪቲዳ ካታማፔ ጋዓ ኬሲዲ ሱጊ ዩዳናው አፎ ዶና ኤፊዶሶና። 30 ሺን ኢ ኤንታ ጊዶራ ካንሲዲ አዲስ።

ዮሱሲ ቱና አያና ኬሲስ
(ማር 1:21-28)

31 ያፔ ጋሊላ ቢታን ዴዲያ ቂፊርናሆሜ ካታማ ቢስ። ያን ሳምባታ ጋላስ አሳ ታማርሲስ። 32 ኢ ታማርሴይ ማታራ ጊዲያ ጊሾ ኡባይ ኢያ ቲሚርቲያን ማላሌቲዶሶና።

33 አይሁዴ ዎሳ ኬሳን ቱና አያናይ አይኪዳ ኡራይ ዴዴስ። 34 ኢ፡ «ናዚሬቱ ዮሱሳ ኑና አይስ ዋይሳይ ኑፔ ሃካ፤ ኔኒ ዩዳይ ኑና ዳይሳናሴዮ? ኔኒ አኔኮ ታኒ ኤራይስ። ኔኒ ያሳፌ ዩዳ ጌሻ» ያጊዲ ዋሲስ።

35 ዮሱሲ ቱና አያናኮ፡ «ሲዲ ጋዳ ሃ ኡራፔ ኬያ» ያጊዲ ሃንቂስ። ቱና አያናይ ኡራ አሳ ኡባ ሲንሳን ሆሊ ዩጊዲ አይኮካ ቆሆና ዩዲዲ ኬዩስ።

36 አሳ ኡባይ ማላሌቲዶሶና። ዎሊኮ፡ «ሃኖስ፡ ሃይሲ አይቢ ቲሚርቱ? ቱና አያናታ ማታኒኔ ዎልቃን ኪቴስ፤ ኤንቲካ ኬዮሶና» ያጊዶሶና። 37 ኢያ ሱንሳይ ሄራ ኡባን ኬዩስ።

ዮሱሲ ዳሮ ሃርጋንቾታ ፓሲስ
(ማቶ 8:14-17፤ ማር 1:29-34)

38 ሄሳፌ ጉዮ፡ ዮሱሲ አይሁዴ ዎሳ ኬሳፌ ኬዩዲ ሲሞና ሶ ጌሊስ። ሲሞና ማቼ አያ ሚኖ ቆዖ ሚሻ ሃርጊን ሳኬታሱ። ኢዮ ፓሳና ሚላ ዮሱሳ ዎሲዶሶና። 39 ኢ ሂዓኮ ሺቂ ሆኪዲ ኢ ሃርጊያ ሃንቂስ። ሚሻይ አጊን ኤሌሳ ዴንዳዳ ኤንታ ሞካሱ።

40 አዋይ ዉላና ሃኒሺን ዱማ ዱማ ሃርጊያን አይኬቲዳ አሳ ኢያኮ ኤሂዶሶና። ኢ ኢሱዋ ኢሱዋ ቦላ ባ ኩሺያ ዎሲዲ ፓሲስ። 41 ቱና አያናቲ ቃሲ፡ «ኔኒ፡ ያሳ ናዓ» ጊዲ ዋሲሼ ዳሮ አሳፔ ኬዩዶሶና። ሺን ኢ ኤንታና ሃንቂስ። ኢ ኪሪስቶሳ ጊዴይሳ ኤንቲ ኤሪያ ጊሾ ኢሲባካ አዴቶና ሚላ ዲጊስ።

42 ቡሮ ዎንቲያ ዎዴ ዮሱሲ ኢሲ ጌማ ቤሲ ቢስ። አሳይ ኮዩሼ ኢ ዴዲያ ቢሳ ዩዶሶና። ኤንታፌ ኢ ሻኬቲዲ ቦና ሚላ ቡቴቲዶሶና። 43 ሺን ኢ፡ «ታኒ ሃራ ካታማታ ባዳ ያሳ ካዎቴሳ ዎንጊላ ማርካታናው ቤሴስ። ታ ኪቴቲዳይ ሄሳሳ» ያጊስ። 44 ዩሁዳ ቢታን ዴዲያ አይሁዴ ዎሳ ኬሳን ሳባኪስ።

4:32 ማቶ 7:28-29፤ ማዝ 91:11-12

5

ዮሱሲ ዶሪዳ ኮይሮ ታማሬታ

(ማቶ 4:18-22፤ ማር 1:16-20)

1 ኢሲ ጋላስ ዮሱሲ ጌንሳሬዌ አባ ማታን ኤቂዳሺን ዳሮ አሳይ ኢያ ዩሹዋ ኡንዔሲዲ፥ ኢ ታማርሲያ ያሳ ቃላ ሲዎሶና።

2 ያን ሃላ ጋዋን ዴዒያ ናምዑ ዎጎሎታ ቤዒስ። ሞሎ አይኪያ አሳቲ ዎጎሎታ፤ ዎዲዲ ባንታ ጊቲያ ሜጮሶና። 3 ሄ ዎጎሎታ፤ ሲሞናይሳን ጌሊዲ ቤታፌ ጉሲ ጊዶ ሺሻና ሜላ አይቺስ። ያቲዲ፥ ሄ ዎጎሎታ ቦላ ኡቲዲ አሳ ታማርሲስ።

4 ባ ታማርሱዋ አንጊዳ፤ ጉዩ ሲሞናኮ፥ «ጌዴ ጨሙዋኮ ሺሻዳ ሞሎታ አይካናው ሂንቴ ጊቲያ ዩጊቴ» ያጊስ።

5 ሲሞኒ ዛሪዲ፥ «አስታማሪያው፥ ቃማ ኩሜላ ዳቡሪሽ አቂዲ አይኮካ አይኪቦኮ፥ ሺን ኔ ጊኮ ጊቲያ ዩጋና» ያጊስ።

6 ኤንቲ ጊቲያ ዩጊዳ ዎዴ ጊቴይ ዳኬታና ጋካናው ዳሮ ሞሎ አይኪዶሶና። 7 ሃራ ዎጎሎታን ዴዒያ ባንታ ላጊቲ ዩዲ፥ ባንታና ማዳና ሜላ ወቲዲ ያጊዶሶና። ኤንቲ ዩዲ ናምዑ ዎጎሎታ፥ ሃላን ሚቴታና ጋካናው ሞሎን ኩንሲዶሶና።

8 ሲሞን ጳዒሮሲ ሄሳ ቤዒዳ ዎዴ ዮሱሳ ሲንሳን ኩንዲዲ፥ «ጎዳው፥ ታኒ ናጋራንቾ አሲ ጊዲያ ጊሾ ታ፤ ሻኬታ» ያጊስ።

9 ሄሳ ኢ ጊዳይ ኢኔ ኢያራ ዴዒይሳቲ አይኪዳ ሞሎታ ዳሮቴላን ማላሌቲዳ ጊሾሳ። 10 ቃሲ ሲሞና ላጌ ጊዲዳ ዛብዲዮሳ ናይቲ ያይቆባራኔ ዮሃንሳራ ማላሌቲዶሶና። ዮሱሲ ሲሞናኮ፥ «ባቦፋ! ሂዛ፤ ኔኒ አሴ አይኪያ አሲ ጊዳና» ያጊስ። 11 ኤንቲ ዎጎሎታ ጋዋ ሺሻዳ፤ ጉዩ አባ አጊዲ ዮሱሳ ካሊዶሶና።

ዮሱሲ ባሮ ሃርጋንቺዋ ፓሲስ

(ማቶ 8:1-4፤ ማር 1:40-45)

12 ዮሱሲ ካታማታ፤ ኢሱዋን ዴዒሺን ኢሲ ባሮ ሃርጌን * አይኪቲዳ አሲ ሄ ካታማን ዴዒስ። ሄ ኡራይ ዮሱሳ ቤዒዲ ኢያ ሲንሳን ጉፋኒዲ፥ «ጎዳው፥ ኔ ሸኔ ጊዲኮ ታና ጌሻናው ዳንዳሳ» ጊዲ ዎሲስ።

13 ዮሱሲ ባ ኩሺያ ዩዲ ቦቺዲ፥ «ኤ፥ ታ ሸኔ፤ ጌያ» ያጊስ። ኢራ ባሮ ሃርጌይ ኡራ፤ ኪቺስ።

5:1 ማቶ 13:1-2፤ ማር 3:9-10፤ 4:1 5:5 ዮሃ 21:3 5:6 ዮሃ 21:6 * 5:12 ባሮ ሃርጌ፡ ባሮ ሃርጌይ አሳ ጋልባ ቦላ ኬያ ሃርጌ፡ ኢስራዔል ቢታን ባሮ ሃርጋንቺቲ ሃራ አሳ፤ ዱማቲዲ ዴዎሶና፤ አቲን አሳራ ጋዬቶኮና።

14 ዮሴፊ፡ «ሃይሳ አዴስካ አዶፓ፡ ሺን ባዳ ኔናቴሳ አይሁዴ ካሂኒያ ቤሳ። ኔ ጌዩዳይሳስ ማርካ ጊዳና ሜላ ሙሴይ ኪቲዳ ያርሹዋ ያርሻ» ጊዲ ኪቲስ።

15 ጊዶሺን፡ ኢያ ሱንሳይ ካሴፔ አዲዲ ዳልጊሼ ቢስ። ዳሮ አሳይ ኢ አዲያባ ሲዓናዉኔ ባንታ ሃርጊያፌ ፓፃናው ዮሶና።

16 ሺን ዮሴሲ ዳሮ ዎዴ ጌማ ቤሲ ቢዲ ዎሴስ።

ዮሴሲ ጉንዳ ፓሲስ
(ማቶ 9:1-8፤ ማር 2:1-12)

17 ኢሲ ጋሳስ ዮሴሲ ታማርሲሺን ጋሊላፔኔ ዩሁዳ ሄራ ኡባፌ ቃሲ ዮሩሳላሜፔካ ዩዳ ፋሪሳዌቲኔ ሂኔ አስታማሬቲ ያን ኡቲዶሶና። አሳ ፓሲያ ጎዳ ዎልቃይካ ኢያራ ዴዔስ። 18 ሄ ዎዴ አሳይ ኢሲ ጉንዳ አሲ ሃላራ ቶኪዲ ኤሂዶሶና። ሶ ጌልሲዲ ኢያ ሲንሳን ዎሳናው ቆፒዶሶና። 19 ሺን አሳ ዳሮቴሳፌ ዴንዶይሳን ሶ ጌልሳናው ዎኔቲዲ ኬሳ ቦላ ኬዩዲ፡ ካራ ቃዉጊዲ፡ ሃርጋንቸዋ ሃላራ አሳ ሻኪዲ ዮሴሳ ሲንሳን ዩጊዶሶና።

20 ዮሴሲ ኤንታ አማኑዋ ቤዒዲ፡ «ላ አዲያው፡ ኔ ናጋራይ ቁሼቲስ» ያጊስ።

21 ሂኔ አስታማሬቲኔ ፋሪሳዌቲ፡ «ሃይሲ ዎሳ ቦላ ያጊዲ አዴቴይ አኔ? ኢሲ ዎሳፌ አቲን ሃሪ ናጋራ ቁቻናው ዳንዳዔይ አኔ?» ያጊዲ ቆፒዶሶና።

22 ዮሴሲ ኤንታ ቆፋ ኤሪዳ ጊሾ ኤንታኮ፡ «ሂንቴ ዎዛናን ሄሳሶ አይስ ቆፔቲ? 23 «ኔ ናጋራይ ቁሼቲስ ጌይሳፌኔ ዴንዳዳ ባ ጌይሳፌ አዉሲ ካዉዩ?» 24 ሺን ታ ሄሳ ጊዳይ አሳ ናዓይ ሳዓ ቦላ ናጋራ ቁቻናው ማቲ ዴዔይሳ ሂንቴ ኤራና ሜላሳ።» ሄሳፌ ካሊዲ፡ ጉንዳ ኡራኮ፡ «ዴንዳ፤ ኔ አልጋ ቶካዳ ኔ ሶ ባ» ያጊስ። 25 ኢ ኤሌሲ ዴንዲዲ ኤንታ ሲንሳን ኤቁስ፤ ኢ ቶኪቲዲ ዩዳ አልጋ ቶኪዲ ዎሳ ጋላቲሼ ባ ሶ ቢስ። 26 ሄ ዎዴ ኡባይካ ማላሌቲዶሶና። ዎሳ ጋላቲሼ፡ «ሃቺ ጊታ ማላታ ቤዒዳ» ያጊዲ ያሼቲዶሶና።

ዮሴሲ ሌዌ ያጊስ
(ማቶ 9:9-13፤ ማር 2:13-17)

27 ሄሳፌ ጉዩ፡ ዮሴሲ ያፔ ኬዩዲ ቢስ። ሌዌ ጌቴቲያ ኢሲ ቃራፃ ቃንጊሴይሲ ቃራፃ ቃንጊሲያ ቤሳን ኡቲዳይሳ ቤዒዲ፡ «ታና ካላ» ያጊስ። 28 ኢ ኡባባ አጊ ዴንዲዲ ኢያ ካሊስ።

29 ሄ ሌዌይ ባ ሶን ጊታ ጊቢራ ጊጊሲስ። ዳሮ ቃራፃ ቃንጊሴይሳቲኔ ሃራ አሳቲ ካሳ ማናው ኡቲዶሶና። 30 ፋሪሳዌቲኔ

ሂን አስታማሬቲ፥ «ቃራፃ ቃንዲይሳታራኔ ናጋራንቾታራ አይስ ሜቲኔ ኡዩቲ?» ያጊዲ ዩሱሳ ታማሬታ ቦላ ዙዙሚዶሶና።

31 ዩሱሱ ኤንታኮ፥ «ሃርጋንቾታሳፌ አቲን ፓፃታስ አኪሜ ኮሼና። 32 ታኒ ናጋራንቾታ ማሮታኮ ዛራናሳፌ አቲን ጌሻታ ዪጋናው ያቢኬ» ያጊዲ ዛሪስ።

33 ኤንቲ ዩሱሳኮ፥ «ዮሃኒሳ ታማሬቲ ዳሮ ዎዴ ዎሞሶና፥ ዎሶሶና፤ ቃሲ ፋሪሳዌታ ታማሬቲካ ሄሳሶ አሶሶና። ሺን ኔይሳቲ ኡባ ዎዴ ሞሶናኔ ኡዮሶና» ያጊዶሶና።

34 ዩሱሱ ኤንታኮ፥ «ሙሹራይ ኤንታራ ዴዒሺን ዪጌቲዳ አሳይ ዎማና ሜላ አሳናው ዳንዳዔቲ? 35 ሺን ሙሹራይ ኤንታፌ ሻኬታና ጋላሳይ ያና፥ ሄ ዎዴ ኤንቲ ዎማና።»

36 ቃሲ ያጊዲ ሴሚሶ ኦዲስ፤ «አራሳ ማፖፔ ፔዲዲ ጋልዓ ማፖ ቦላ ሲኬይ አኒካ ባዎ። ሄሳሶ አሲኮ አራሳ ማዑዋ ፔዴስ፥ አራሳይ ጋልዓስ ጊጌና። 37 ማልዓንቶ ዎይኒያ ጋልዓ አጎሮን ቆሊያ አኒካ ባዎ። ሄሳ አሲኮ፥ አራሳ ዎይኔይ ጋልዓ አጎሩዋ ዱሴስ፤ ዎይኔይ ጉኬስ አጎሮይካ ማዶናባ ጊዴስ። 38 ሄሳ ጊሾ፥ አራሳ ዎይኔይ አራሳ አጎሮን ቆሊታናው ቤሴስ። 39 ሂዛ፥ ጫላይ ሎፖ ጊያ ጊሾ ጫላ ዎይኔ ኡዩ ሲሚዲ ማልዓንቶ ኮዩይ አኒካ ባዎ» ያጊስ።

6

ዩሱሱ ሳምባታባ አይሼቲስ (ማቶ 12:1-8፤ ማር 2:23-28)

1 ኢሲ ሳምባታ ጋላስ ዩሱሱ ጊስቱ ጋዴ ጊዶራ አደስ። ዩሱሳ ታማሬቲ ቲያ ባንጋ ዱሲዲ ባንታ ኩሼን ሺርኪዲ ሞሶና። 2 ሺን ፋሪሳዌታ ጊዶፌ ኢሶቲ ኢሶቲ፥ «ሳምባታ ጋላስ አሳናው ቤሶናባ አይስ አሴቲ?» ያጊዶሶና።

3 ዩሱሱ ኤንታኮ ዛሪዲ፥ «ዳዊቴይ ኮሻቲዳ ዎዴ ባራ ዴዔይሳታራ ኢሲፌ አሶይሳ ናባቢቤኬቲ? 4 ዎሳ ኬሲ ጌሊዲ አይሁዴ ካሂኔታ ፃላላስ ቤሲያ ዳቡዋ ሚስ፤ ባራ ዴዔይሳታስካ ኢሚስ» ያጊስ። 5 ቃሲ ዩሱሱ፥ «አሳ ናዓይ ሳምባታ ጎዳ» ያጊስ።

6 ሃራ ሳምባታ ጋላስ ዩሱሱ አይሁዴ ዎሳ ኬሲ ጌሊዲ ታማርሴስ። ሄ ቤሳን ኡሻቻ ኩሼይ ጉንዲዳ ኢሲ አሲ ዴዔስ። 7 ሂን አስታማሬቲኔ ፋሪሳዌቲ ኢያ ሞታናው ጋሶ ኮዩዲ ሳምባታ ጋላስ ፓሲኮ ቤዓና ጊዲ ናጎሶና። 8 ሺን ዩሱሱ ኤንታ ቆፋ ኤሪዲ

ኩሼይ ጉንዲዳ ኡራኮ፥ «ዴንዳዳ አሳ ጊዱዋን ኡቃ» ያጊስ፥ ኡራይካ ዴንዲ ኡቂስ።

9 ዮሱሲ፥ «አኔ ታ ሂንቴና ኢሲባ አይቻይስ፤ ሳምባታ ጋላስ አሳናው ቤሴይ ሎዎባዬ ኢታባዬ? ሼምፖ አሾዬ ዎይኮ ዳይሶ?» ያጊስ።

10 ቃሲ ዮሱሲ ኢያ ዩሹዋን ዴዲያ አሳ ዩሺ ያሊዲ ኡራኮ፥ «ኔ ኩሺያ ፒዲ አሳ» ያጊስ። ኡራይካ ኢ ጊዳይሳዳ አሲን ኩሼይ ፓዒስ። 11 ሺን ሂኒ አስታማሬቲኔ ፋሪሳዌቲ ዳሮ ዩሎቲዶሶና፥ ዮሱሳ ቦላ አይ አሲኖ ጊዲ ባንታ ጊዶን ማቂቲዶሶና።

ዮሱሲ ታማኔ ናምዑ ሃዋሬታ ዶሪስ
(ማቶ 10:1-4፤ ማር 3:13-19)

12 ሄ ዎዴ ጋላሳታፔ ኢሱዋን ዮሱሲ ዎሳናው ዴሪያ ቦላ ኬዩስ። ቃማ ኩሜሳ ዎሳ ዎሲሼ አቂስ። 13 ዎንቴሴ ባ ታማሬታ ያጊዲ ኡንታ ጊዶሬ ታማኔ ናምዓታ ዶሪዲ፥ ኡንታና፥ «ሃዋሬታ» ጊዲ ሱንሲስ። 14 ኡንቲካ፥ ጳዒሮሳ ጊዲ ሱንሲዳ ሲሞና፥ ኢያ ኢሻ ኢንዲሪያሳ፥ ያይቆባ፥ ዮሃኒሳ፥ ፊልጶሳ፥ ባርቶሎሚዮሳ፥ 15 ማቶሳ፥ ቶማሳ፥ ኢልፊዮሳ ናዓ ያይቆባ፥ ባ ቤታስ ሚሼቲያ ሲሞና፥ 16 ያይቆባ ናዓ ዩሁዳኔ ዮሱሳ አሲ ኢሚዳ አስቆሮታ ዩሁዳ።

17 ዮሱሲ ኡንታራ ኢሲፌ ዴሪያፔ ዎዲዲ ዴንባ ቤሳን ኡቂስ። ኢያ ታማሬታፔ ዳሮቲ ሄ ቤሳን ዴዎሶና ዩሁዳ ቢታ ኡባፌ ዩፋሳላሜፔ፥ ዒሮሳፔኔ ሲዶና አባ ጋዖፔ ዩዳ ዳሮ አሳይ ዴዴስ። 18 ኡንቲ ዩዳይ ኢ ታማርሲያባ ሲዓናውኔ ባንታ ሃርጊያፌ ፓዖናሳ። ቱና አያናን ዋዩቲያ አሳቲካ ፓዒዶሶና። 19 ዎልቃይ ኢያፔ ኬዩዲ አሳ ኡባ ፓሲያ ጊሾ አሳይ ኢያ ቦቻናው ኮዮሶና።

20 ባ ታማሬታኮ ያሊዲ ሃይሳዳ ያጊስ፡
«ሂንቴኖ፥ ማንቆቶ፥ ሂንቴ አንጄቲዳይሳታ፤
ዎሳ ካዎቴሳይ ሂንቴሳ።

21 ሂንቴ ሃዒ ኮሻቴይሳቲ አንጄቲዳይሳታ፥
ሂንቴ ካላና።

ሂንቴ ሃዒ ዩኬይሳቲ አንጄቲዳይሳታ
ሂንቴ ሚጫና።

22 አሳይ ሂንቴና አሳ ናዓ ጊሾ
ኢዒያ ዎዴ
ሂንቴና ሂሊያ ዎዴ
ሂንቴና ኡንቲ ቶጄያ ዎዴኔ፥
ኢታ ሱንሲ ኡንቲ ሂንቴው ኢሚያ ዎዴ

ሂንቴ አንጂቴዳይሳታ።

23 «ሄኮ፥ ሂንቴ ዎይቶይ ሳሎን ጊታ ጊዲያ ጊሾ ሄ ዎዴ ኡፋይሳን ጉፒቴ። አይስ ጊኮ፥ ቤኒ ኤንታ አዋቲ ናቤታ ቦላ ሄሳዳ አሲዶሶና።»

24 «ሺን ዱሬቶ ሂንቴና አዩ፤ ሂንቴ ሃዒ ሎዎ ዱሳ ኤኪዴታ።

25 ሃዒ ካሊዳይሳቶ ሂንቴና አዩ፤ ሂንቴ ኮሻታና።

ሃዒ ሚጩይሳቶ ሂንቴናሾ ሂንቴ ካዮታናኔ ዩካና።

26 አሲ ኡባይ ሂንቴ ሎዎቴሳ ሃላላ አዲያ ዎዴ ሂንቴና አዩ። ኤንታ አዋቲ ቤኒ ዎርዳንቾ ናቤታ ቦላ ሄሳዳ አሲዶሶና።

ሂንቴ ሞርኬታ ሲቂቴ (ማቶ 5:38-48፤ 7:12)

27 «ሺን ታና ሲዒያ ሂንቴስ ታ አዳይስ፤ ሂንቴ ሞርኬታ ሲቂቴ፤ ሂንቴና ኢዲይሳታስ ሎዎባ አሲቴ። 28 ሂንቴና ቃንጌይሳታ አንጂቴ፥ ሂንቴና ናቂይሳታስ ዎሲቴ። 29 ኢሲ ባጋ ሻካላ ባቂይሳስ ሃንኮ ባጋካ ቤሳ። ኔ ላዓና ኤካና ጌይሳስ ኔ ሻሚዚያካ ጉጃዳ ኢማ። 30 ኔና ዎሲያ ኡባስ ኢማ፤ ኔፔ ኤኪዳ እናካ ዛሮ ጋዳ አይቾፋ። 31 አሳይ ሂንቴው አሳና ሜላ ሂንቴ ኮያባ ኡባ ሂንቴካ አሳስ አሲቴ።

32 «ሂንቴ ሂንቴና ዶሲያ አሳታ ሃላላ ዶሲኮ፥ አይ ጋላቲ ሂንቴው ዴዒ? ሃሪ አቶሺን፥ ናጋራንቾቲካ ባንታና ሲቂይሳታ ሲቆሶና። 33 ሂንቴው ሎዎባ አሴይሳታ ሃላላስ ሎዎባ አሴኮ ሂንቴው አይ ጋላቲ ዴዒ? ናጋራንቾቲካ ሄሳዳ አሶሶና። 34 ታልዔ ዛራና አሳ ሃላላስ ሂንቴ ታልዒኮ አይ ዱማ ጋላቴቴ? ናጋራንቾቲካ ጉዩ ዛራና አሲ ቤዒዲ ታልዎሶና።»

ሃራታ ቦላ ፒርዶሬቴ

35 «ሺን ሂንቴ ሞርኬታ ሲቂቴ፤ ኤንታው ሎዎባ አሲቴ። ጉዩ ኤካናው ቆፖና ታልዒቴ። ሄሳን ሂንቴ ኤካና ዎይቶይ ጊታ ጊዳና። ሂንቴ ኡባፌ ቦላ ዎሳ ናይታ ጊዳና። ኢ ባና ጋላቶናይሳታሲኔ ኢታታስ ኬሃ። 36 ሂንቴ አዋይ ኬሃ ጊዶይሳዳ ሂንቴካ ኬሃ ጊዲቴ።

37 «አሳ ቦላ ፒርዶሬቴ፤ ሂንቴ ቦላ ፒርዶሬቴና። ሂንቴ ቦሬቶና ሜላ እናካ ቦርፒቴ። አቶ ጊቴ፤ ዎሳይ ሂንቴው አቶ ጋና። 38 ኢሚቴ፤ ሂንቴው ኢሚታና። ሂንቴ ማኪዳባን ሂንቴው ዛሪ

ማኪታና፤ ኡባራካ ሎዎ ማኪያባን ባቁዲ፤ ሱዲ ኩንሲዲ፤ ላሌታና ጋካናው ሂንቴው ማኪቲ ኢሜታና» ያጊስ።

³⁹ ቃሲካ ዩሱሲ ያጊዲ ኤንታው ሌሚሶ አዲስ፤ «ቆቄይ ቆቄ ካሌላናው ዳንዳዲ? ካሌሲኮ ናምዓይካ ዎሊ ኤኪዲ አፎን ወሎኮናዩ? ⁴⁰ ታማሬይ አስታማሬፔ አዴና። ሺን ሎይሲ ታማሬዳ ኡራይ ባ አስታማሬያሶ ሃኔስ።

⁴¹ «ኔ ኢሻ አይፊያን ዴዲያ ቡሪያ አይስ ቤዓይ? ኔ አይፊያን ዴዲያ ቱሲ ዳኔይሳ አይስ ቤዒኪ? ⁴² ኔ አይፊያን ዴዲያ ቱሲ ዳኔይሳ ቤዖያ ኔ ኢሻኮ፤ <ታ ኢሻው ኔ አይፊያን ዴዲያ ቡሪያ ኬሶ> ጋናው ዋና ዳንዳዓይ? ኔኖ ጩቡዋው፤ ኮይሮታዳ ኔ አይፊያን ዴዲያ ቱሲ ዳኔይሳ ኬሳ። ሄሳፌ ጉዩ፤ ኔ ኢሻ አይፊያን ዴዲያ ቡሪያ ኬሳናው ጊሻዳ ዓላና።

ሚሳኔ ኢያ አይፊያ

⁴³ «ሎዎ ሚሲ ኢታ አይፌ አይፌና፤ ሄሳዳካ ኢታ ሚሲ ሎዎ አይፌ አይፌና። ⁴⁴ አይፌ አይፊያ ሚሲ ኡባይ ባ አይፊያን ኤራቴስ። አጉንሳፌ ባላሴ ሚሳ አይፌይ ማዌቴና ቃሲ ላዴፔ ዎይኔ አይፌይ ማዌቴና። ⁴⁵ ሎዎ አሲ ባ ዎዛናን ኩሚዳ ሎዎባፔ ሎዎባ ኬሴስ። ኢታ አሲ ባ ዎዛናን ኩሚዳ ኢታባፔ ኢታባ ኬሴስ። አሲ ባ ዎዛናን ኩሚዲ ፓላሂዳባፔ ባ ዶናን ሃሳዩስ።

ኬሴ ኬዒያ ናምዑ አሳታ

(ማቶ 7:24-27)

⁴⁶ «ታ ጌይሳ አሴኬታ፤ ሺን ያቲን አይስ ታና፤ <ጎዳው፤ ጎዳው፤ ጌቲ?> ⁴⁷ ታኮ ዩይኔ ታ ቃላ ሲዒዲ ፖሊያ ኡባይ አና ዳኒያኮ ታ ሂንቴና ቤሳና። ⁴⁸ ኢ ኬሴ ኬፃናው ዘቂ አሲ፤ አላ ቦኪዲ፤ ጋርሳን ዴዲያ ዛላ ቦላ ኬሳ ኤሲዳ ጪንጫ ኡራ ዳኔስ። ዲይይ ዲዒዲ ሄ ኬሳ ሱጊስ፤ ሺን ሚንሲዲ ኬዒዳ ጊሾ ቃፃናው ዳንዳዒቤና። ⁴⁹ ሺን ታ ቃላ ሲዒዲ አሶናይ ባ ኬሳ ሻፌ ቢታ ቦላ ኬዒዳ ኡራ ዳኔስ። ዲይይ ዲዒዲ ሄ ኬሳ ሱጊዳ ዎዴ ኤሴሲዲ ኩንዲስ። ሄ ኬሳይ ዎልቃማ ኩንዴሲ ኩንዲስ» ያጊስ።

7

ማቶ ሃላቃ አማኑዎ

(ማቶ 8:5-13፤ ዮሃ 4:43-54)

¹ ዩሱሲ ሄሳ ኡባ አሳ ሲንሳን ታማርሲዲ አንጊዳፔ ጉዩ፤ ቁፊርናሆሜ ካታማ ቢስ። ² ሄ ቤሳን ኢሲ ማቶ ሃላቃይ ዴዔስ።

6:39 ማቶ 15:14 6:40 ማቶ 10:24-25፤ ዮሃ 13:16፤ 15:20 6:44 ማቶ 12:33 6:45 12:34

ኢ ዳሮ ዶሲያ አይሌይ ሃርጌቲዲ ሃይቆስ ጋኪስ።³ ኢ ዮሱሳባ ሲጊዳ ዎዴ ባ አይሊያ ፓሳና ሜላ ኢያ ዎሶ ጊዲ ኢሲ ኢሲ አይሁዴ ጪማታ ዮሱሳኮ ኪቲስ።⁴ ኪቴቲዳይሳቲ፣ ዮሱሳኮ ቢዲ፣ «ኔ ኢያው ሃይሳ አሳናው ቤሴስ።⁵ አይስ ጊኮ፣ ሃ ኡራይ ኑ አሳ ዶሴስ፣ አይሁዴ ዎሳ ኬሳካ ኬዲስ» ጊዲ ሚንሲ ዎሲዶሶና⁶ ዮሱሲካ ኤንታራ ቢስ።

ማቶ ሃላቃ ሶኮ ማቲያ ዎዴ ባ ላጌታ ኢያኮ ኪቲዲ፣ «ጎዳው፣ ታ ካራፔ ጋርሳን ኔ ጌላናው ቤሶና ጊሾ ዳቡሮፓ።⁷ ታካ ታና ኔ ሲንጮ ሺቃናው ቤሲያ አሲ ጋዳ ቆፒኬ። ሺን ኔ ኢሲ ቃላ አዳ፤ ታ አይሌይ ፓፃና።⁸ ታው ታፔ ቦላራ ሃላቃይ ዴዔስ፣ ታፔ ጋርሳን ታ ኪቲያ ዎታዳሬቲ ዴዎሶና። ኢሱዋ፣ <ባ> ጊኮ ቤስ፣ ሃንኩዋ፣ <ሃያ> ጊኮ ዮስ። ታ አይሊያኮ፣ <ሃኖ አላ> ጊኮ አሴስ» ያጊስ።

⁹ ዮሱሲ ሄሳ ሲጊዳ ዎዴ ማላሌቲስ። ጉዬ ሲሚዲ ባራ ያ አሳኮ፣ «ታኒ ሂንቴው ቱማ አዳይስ፤ ሃሪ አቶሺን ኢስራዔልንካ ሃይሳ ሜላ ጊታ አማኖ ዴማቢኬ» ያጊስ።¹⁰ ኪቴቲዳይሳቲ ሶ ሲሚያ ዎዴ አይሌይ ፓፃን ዴሚዶሶና።

አምዔ ናዓ

¹¹ ጉሳ ዎዴፔ ጉዬ ዮሱሲ ናይኔ ካታማ ቢስ። ኢያ ታማሬታራኔ ሃራ ዳሮ አሳቲ ኢያራ ቢዶሶና።¹² ኢ ካታማ ጌላና ሃኒያ ዎዴ አሃ ቶኪዳ ዳሮ አሳቲ ካታማፔ ኬዮሶና። ሃይቂዳ ናዓይ ባ አዩስ ኢሱዋ፣ ኢያካ አምዎ ጊዳዳ ዳዓውሱ። ካታማ አሳፔ ዳሮቲ ኢራ ዴዎሶና።¹³ ጎዳይ ኢዮ ቤጊዳ ዎዴ ቃዴቲዲ፣ «ዮኮፋ» ያጊስ።

¹⁴ ሺቂዲ ሃላ ቦቺን ቶኪዳ አሳቲ ኤቂዶሶና። ዮሱሲ፣ «ላ፣ ያላጋው ዴንዳ» ያጊስ።¹⁵ ሃይቂዳይሲ ዴንዲ ኡቲዲ አዳ አይኪስ። ዮሱሲ ናዓ ኤኪዲ አዩስ ኢሚስ።

¹⁶ አሳ ኡባይ ያሹቲዲ፣ «ጊታ ናቤይ ኑ ጊዶን ዴንዲስ፤ ዎሳይ ባ አሳ ቤጊስ» ያጊዲ ዎሳ ጋላቲዶሶና።¹⁷ ኢያ ሱንሳይ ዩሁዳኒኔ ሄ ሄራን ዴጊያ ቢታ ኡባን ሲዔቲስ።

ዮሱሳኔ ፃማቂያ ዮሃኒሳ

¹⁸ ፃማቂያ ዮሃኒሳ ታማሬቲ ሄሳ ኡባ ዮሃኒሳስ አዲዶሶና። ኢ ኤንታ ጊዶፌ ናምዓታ ያጊዲ፣¹⁹ «ያና ጌቴቲዳይ ኔኔዮ? ዎይኮ ሃራ ናጊኖ?» ያጊዲ አይቺቴ ጊዲ ጎዳኮ ኪቲስ።

²⁰ አሳቲ ዮሱሳኮ ቢዲ፣ ፃማቂያ ዮሃኒሲ፣ «ያና ጌቴቲዳይ ኔኔዮ? ዎይኮ ሃራ ናጊኖ?» ጌቴ ጊዲ ኑና ኔኮ ኪቲስ ያጊዶሶና።

²¹ ሄ ሳቴንካ ዮሱሲ ዳሮ አሳ ሃርጊያፌ ፓሲስ። ቱና አያናታ ኬሲስ፣ ቆቂዳ አይፊያካ ያሊሲስ።²² ዮሃኒሳ ማታፔ ኪቴቲዲ ዩዳይሳታኮ፣ «ቢዲ ሂንቴ ቤጊዳይሳኔ ሲጊዳይሳ ዮሃኒሳስ አዲቴ።

አይፌ ቆቂቲ ዲሎሶና፤ ጉንዳቲ ቢርሼቲዲ ሃሙቶሶና፤ ባሮ ሃርጋንቾቲ ጌቶሶና፤ ቱሌቲ ሲቦሶና፤ ሃይቂዳይሳቲ ሃይቆፕ ዴንዶሶና፤ ማንቆታስ ምንጌላይ ሳባኬቴስ። 23 ታናን ጳቤቶና አኒካ አንጄቲዳይሳ።»

24 ዮሃንሲ ኪቲዳይሳቲ ቢዳፕ ጉዩ ዩሱሲ አሳስ ዮሃንሳባ ያጊዲ አዲስ፡ «ሂንቴ አይ ቤዓናው ባዞ ቢታ ኪዩዴቲ? ጫርኮይ ቃሲያ ማታ ቤዓናሴዮ? 25 ያቲን፤ አይ ቤዓናው ኪዩዴቲ? ኮይሴ ማዖ ማዲዳ አሳ ቤዓናሴዮ? ኮይሴ ማዖ ማዲዳይሳቲኔ ሳዲ ኢንጄቲዳ አሳይ ካዎ ኪሳን ዴቦሶና። 26 ያቲን፤ አይ ቤዓናው ኪዩዴቲ? ናቢያ ቤዓናሴዮ? ኤ፤ ታ ያጋይስ፡ ሂንቴ ቤዓናው ኪዩዳይ ናቤፕ አዴይሳ።

27 <ኔ አጊያ ኔ ሲንሳን ጊጊሲያ

ታ ኪታንቹዎ ኔፕ ሲንሴ ታ ኪታና) ጌቲቲዲ ሃፌቲዳይ ኢያሳ። 28 ታ ሂንቴው አዳይስ፤ ማጫሳፕ ዩሌቲዳይሳታ ጊዶፌ ዮሃንሳፕ አዴይ ባዎ። ያሳ ካዎቴሳን ኡባፌ ጉዲይሲ፤ ኢ ኡባፌ ጊታ ጊዳና» ያጊስ።

29 ሃሪ አቶሺን፤ ዩሱሳ ቃሳ ሲዲዳ ቃሪዓ ቃንዲሴይሳቲ ኡባይ ዮሃንሳ ኩሼን ማጭቲዲ ያሳይ ዲሎ ጊዴይሳ ቆንጨሲዶሶና።

30 ሺን ፋሪሳዌቲኔ ሂጌ አስታማሬቲ ዮሃንሳ ኩሼን ማጭቶና ኢዲዲ ያሳ ዞሪያ ሴቂሲዶሶና።

31 ዩሱሲ ካሊዲ ሃይሳዳ ያጊስ፡ «ሂዛ፤ ሃ ምዲያ ዩሌቴሳ አይቢራ ዳኒሶ? ኤንቴካ አና ዳኖና? 32 ጊያ ጊዶን ኡቲዲ ዎሊ ያጊዲ፤ <ኮ ሂንቴው ሱሱልዔ ፕኒን፤ ሂንቴ ዩዪኪታ። ኮ ሳቢዲ ዜሌሊን፤ ሂንቴ ዩኪኪታ» ያጊያ ናይታ ዳኖሶና። 33 ማጭያ ዮሃንሳ ሞናኔ ኡዮና ዩን፤ <ኢታ አያናራ ዴዔስ ጊዴታ።»

34 አሳ ናዓይ ሚሼኔ ኡዩሼ ዩን፤ <ያራምባኔ ኡሻንቾ፤ ቃሪዓ ቃንዲሴይሳታኔ ናጋራንቾታ ዳቦ) ጊዴታ። 35 ሂዛ፤ ጨንጫቴሳ ቴማቴሳይ ኢያ ናይታ ኡባ ማታን ኤሬቲስ» ያጊስ።

ኢሲ ማጫሲያ ዩሱሳ ሺቶ ቲያሱ

36 ኢሲ ፋሪሳዌይ ዩሱሳ ካሲ ሙዛናው ባ ሶ ያጊስ። ኢ ፋሪሳዌያ ሶ ቢዲ ጋይታ ቦላ ኡቲስ። 37 ሄ ካታማን ኢሲ ናጋሪንቾ ማጫሲ ዴዲያራ ዩሱሲ ፋሪሳዌያ ሶን ጊቢራ ቦላ ዴዔይሳ ሲዲዳ ዎዴ ዳሮ አልዎ ጲልቃዪ ሺቶ ኤካዳ ያሱ። 38 ዩሱሳስ ጉዩ ባጋራ፤ ኢያ ቶሁዎ ማታን ኤቃዳ ዩካሼ ኢያ ቶሁዎ ባ አፋሳራ ላኪሳውሱ። ባ ቢናናራ ኢያ ቶሁዎ ቁቻሼኔ ዩራሼ ሺቶ ቲያሱ።

7:22 ኢሳ 35:5-6፤ 61:1 7:27 ሚል 3:1 7:29 ማቶ 21:32፤ ሉቃ 3:12 7:37 ማቶ 26:7፤ ማር 14:3፤ ዮሃ 12:3

39 ጊቢራ ጊጊሲዳ ፋሪሳዌይ ሄሳ ቤዒዳ ዎዴ ባ ዎዛናን፥ «ሃይሲ ናቤ ጊዲያኮ ሃ ማጫሲያ ኢያ ቦቺያራ ኦኔኮ ቃሲ ኢያ ናጋራንቾ ጊዴይሳካ ኢ ኤራናሺን?» ያገለገለ።

40 ዮሱሲ፥ «ሲሞና፥ ታ ኔው ኦዲያባይ ዴዔስ?» ያገለገለ።

ኢ፥ «አስታማሪያው፥ ታው ኦዳ?» ያገለገለ።

41 ዮሱሲ ኢያኮ፥ «ናምዑ አሳቲ ኢሲ ኡራፔ ሚሼ ታልዒዶሶና፥ ኢሶይ ኢቻሹ ዌቱ ቢራ ሃንኮይ ቃሲ ኢሻታሙ ቢራ ታልዒዶሶና፥ 42 ናምዓይካ ታልዒያ ጨጋናው ያኔቲን፥ ናምዓታስካ ታልዒያ ማሪስ፥ ሂዛ፥ ሃ ናምዓታፔ ሄ ኡራ ዳሮ ዶሳናይ ኔው አወሳ ዳኒ?» ያገለገለ።

43 ሲሞኒ፥ «ዳሮ አጮይ ማራቲዳ ኡራይ ዳሮ ዶሳና ዳኒስ?» ያገለገለ። ዮሱሲ፥ «ኔ ቱማ ፐርዳዳ?» ያገለገለ። 44 ሄሳፌ ጉዮ፥ ዮሱሲ ማጫሴኮ ሲሚ ዌሊዲ፥ ሲሞናኮ፥ «ሃኖ ማጫሲው ቤዓይ? ታኒ ኔ ሶ ጊሊን ሃሪ አቲን ኔ ታው ቶሆ ሃሴ ኢማባካ፥ ሺን ኢያ ታ ቶሆባ ባ አፉሳን ላኮሳዳ ባ ቢናናን ቁቻሱ። 45 ኔኒ ታና ዮራ ኤካባካ፥ ሺን ኢያ ታ ኔ ሶ ጌሎፔ ዶማዳ ታ ቶሆባ ዮሮ አጋቡኩ። 46 ኔኒ ታ ሁዒያን ዛይቱ ቲያባካ፥ ሺን ኢያ ታ ቶሆባ ሺቶ ቲያወሱ። 47 ኢያ ታና ዳሮ ዶሲዳ ጊሾ ኢ ዳሮ ናጋራይ አቶ ጌቱቲስ፥ ኢያ ጉሳ ናጋራይ አቶ ጌቱቲዳይ ጉሳራ ዶሴስ።»

48 ዮሱሲ ማጫሴኮ፥ «ኔ ናጋራይ አቶ ጌቱቲስ?» ያገለገለ።

49 ኢያራ ኢሲፌ ጋይታን ኡቲዲ ሚያ ኢማሳቲ፥ «ናጋራ አቶ ያጌይ፥ ኢ ሃይሲ አኔ?» ያገለገለ ባንታ ዎዛናን ቆፐዶሶና።

50 ዮሱሲ ማጫሴኮ፥ «ኔ አማኖይ ኔና አሺስ፤ ሳሮ ባ» ያገለገለ።

8

ዮሱሳ ሞኪዳ ማጫሳታ

1 ሄሳፌ ጉዮ፥ ዮሱሲ ያሳ ካዎቴሳ ዎንጌላ ሳባኪሼ ካታማራኔ ጉታራ አዲስ፥ ሄ ዎዴ ታማኔ ናምዑ ሃዋሬቲ ኢያራ ዴዎሶና።

2 ቃሲ ቱና አያናፔኔ ዱማ ዱማ ሃርጊያፌ ፓዒዳ ኢሲ ኢሲ ማጫሳቲ ኢያራ ዴዎሶና። ኤንቲካ፥ ላፑን ቱና አያናቲ ኪዬዳ ማግዴላ ማይራሞ፥ 3 ሄሮዲሳ ሹማ ኩዛ ማቺው ዮሃና፥ ሶሲናራኔ ቃሲ ሃራ ዳሮቲ ኤንታና ሚሼን ማዴይሳቲ ዴዎሶና።

4 ዳሮ አሳይ ዱማ ዱማ ካታማፔ ኢያኮ ሺቂን ሌሚሶን ኤንታው አዲስ። 5 «ኢሲ ጎሻንቾይ ዜሬሲ ዜራናው ኪዬሲ። ኢ ዜሪሺን ኢሲ ኢሲ ዜሬሳይ ኦጌ ጋዓን ዎዲዲ ዮዴቲስ፥ ሳሎ ካሮቲ ማግዶሶና። 6 ሃራቲ ሻሎይ ጋርሳን ዴዒያ ቢታ ቦላ ዎዲዶሶና። ቡሮ ዶሊዳ ሜላ ቢታን ላሆይ ባይና ጊሾ ሚጨዶሶና። 7 ሃራ

8:2 ማቶ 27:55-56፤ ማር 15:40-41፤ ሉቃ 23:49

ዘሬሳይ ቃሲ አጉንሳ ጊደን ዎዲስ። አጉንሳራ ዎላ ዲጪዳ ጊሾ አጉንሳይ ጩሊዲ ቤሳን አሺስ።⁸ ሃራቲ ሎዎ ቢታ ቦላ ዎዲደሶና። ደሊዳ ዎዴ ዌቱ ኩሼ አይፊደሶና።» ሄሳ አዲ አንጊዲ፥ ባ ቃላ ዶቁ አሲዲ፥ «ሲዲያ ሃይሲ ዴዲያ ኡባይ ሲዎ» ያጊስ።

⁹ ኢያ ታማሬቲ፥ «ሃ ሌሚሱዎ ቢርሼሳይ አይቤ?» ያጊዲ አይቺደሶና ¹⁰ ኢ፥ «ዎሳ ካዎቱሳ ፀራ ኤራና ሜላ ሂንቴው ኢሜቲስ። ሺን ሃራቲ ቤዲሼ ዴዎና ሜላ፥ ሲዲሼ አኬኮና ሜላ ሌሚሶን አዳይስ።

¹¹ «ሂዛ፥ ሃ ሌሚሱዎ ቢርሼሳይ ሃይሳ፥ ዘሬሳ ያጌቲዳይ ዎሳ ቃላ። ¹² አጌ ጋዓን ዎዲዳ ዘሬሳይ ቃላ ሲዲይሳታ፥ ጊደሺን፥ ኤንቲ አማኒዲ አቶና ሜላ ዓላሄይ ቃላ ኤንታ ዎዛና፤ ማሂ ዲጊስ። ¹³ ሻሎን ጋርሳን ዴዲያ ቢታ ቦላ ዎዲዳ ዘሬሳይ ቃላ ሲዲዲ ኡፋይሳን ኤኬይሳታ። ኤንቲ ሃዲስ አማናሶና፤ አቲን ዓጳይ ባይና ጊሾ ፓጩይ ጋኪያ ዎዴ ኤሌሲዲ ካደሶና። ¹⁴ አጉንሳ ጊደን ዘሬቲዳይሳቲ ቃላ ሲዲይሳታ። ኤንቲካ አላሚያ ቆፋን፥ ዱሬቴሳኒኔ ሳዓ ዱሳ ሚኮቲሳን ጩሌቲዲ ቤሴይሳዳ አይፊሶኮና። ¹⁵ ሎዎ ቢታን ዎዲዳ ዘሬሳይ ሎዎ ዎዛናን ቃላ ሲዲዲ ናጌይሳታኔ ዳንዳዓን ሚኒዲ አይፊ አይፊይሳታ።

¹⁶ «ዎም፤ ዎም፤ ዳቾ ካሜይ ዎይኮ አርሳፊ ጋርሳን ዎሴይ ዴና። ጌሊያ አሲ ቤዓና ሜላ ዶቃ ቤሳን ዎሴስ።

¹⁷ «ሄሳ ጊሾ፥ ቆንጩ ኪዮና ቆሴቲዲ አቲያባይ፥ ኤሬቶና ጌሚዲ አቲያባይ ዴና።

¹⁸ «ሂዛ፥ ሂንቴ ቃላ ዋቲ ሲዲያኮ አኬኪቴ። ዴዲያ ኡባስ ጉገቴዲ ኢሜታና፥ ባይናይሳስ ሃሪ አቶሺን ኢያው ዴዲያ ጉሳያካ ኢያ፤ ኤኬታና» ያጊስ።

ዮሱሳ አዩራኔ ኢሻታራ
(ማቶ 12:46-50፤ ማር 3:31-35)

¹⁹ ዮሱሳ አዩራኔ ኢሻታራ ኢያኮ ዩደሶና። ሺን አሳ ዳርቴሳፊ ዴንደይሳን ኢያ ዴማናው ዳንዳዲሶኮና። ²⁰ ኢሲ አሲ ዮሱሳኮ፥ «ኔ አዩራኔ ኔ ኢሻታራ ኔና ኮዩዲ ካሬን ናንሶና» ያጊስ።

²¹ ዮሱሲ ዛሪዲ፥ «ዎሳ ቃላ ሲዲዲ አሶን ፔሼይሳቲ ኡባይ ታው አዮኔ ታው ኢሻ» ያጊስ።

ዮሱሲ ሃሳ ዙሊያ ሴሪስ
(ማቶ 8:23-27፤ ማር 4:35-41)

8:10 ኢሳ 6:9 8:16 ማቶ 5:15፤ ሉቃ 11:33 8:17 ማቶ 10:26፤ ሉቃ 12:2 8:18 ማቶ 25:29፤ ሉቃ 19:26

22 ኢሲ ጋላስ ዮሱሳራኔ ኢያ ታማሬታራ ኢሲፌ ዎጎሎን ጌሊዲ፣ «አባ ፒናስ» ያጊስ። ኤንቲካ ባናው ዴንዲዶሶና። 23 አባ ቦላራ ኤንቲ ፒናናው ቢሺን ዮሱሲ ዲስኪስ። ቆፖና ሚኖ ጫርኮይ አባ ቦላ ዴንዲስ። ሃሳይ ዎጎሎን ጌሊን ዎጎሎይ ሚቴቴላ አይኪያ ዎዴ ኡባይ ባቢዶሶና።

24 ኢያ ታማሬቲ ኢያኮ ሺቂዲ፣ «ኑ ጎዳው፣ ኑ ጎዳው፣ ኑ ዳዮስ ያጊዲ» ዮሱሳ ዴንሲዶሶና።

ዮሱሲ ዴንዲዲ ጫርኮዋኔ ጎቲያ ሴሪስ። ኤሌሲዲ ጫርኮይኔ ጎቴይ ዎፑ ጊስ። ሳርቴሳይካ ሲሚስ። 25 ዮሱሲ ባ ታማሬታኮ፣ «ሂንቴ አግኖይ አወኔ» ያጊስ። ኤንቲካ፣ ያዩሼኔ ማላሌቲሼ ኢሶይ ኢሱዋኮ፣ «ጫርኮይኔ ሃሳይ ኪቴቴይሲ፣ ኢ ሃይሲ አኔ» ያጊዶሶና።

ቱና አያናፔ ዮዴቲዳ ኡራ
(ማቶ 8:28-34፤ ማር 5:1-20)

26 አባ ፒኒዲ ጋሊላ ባጋራ ዴዲያ ጌርጌሶኔ ቢታ ጋኪዶሶና።

27 ዮሱሲ ዎጎሎዋፔ ኬዬዲ ሳዓን ዎዲሺን ቱና አያናን አይኬቲዳ ኡራይ ካታማፔ ኬዬዲ ኢያራ ጋሄቲስ። ዳር ሳይላ አፊሊ ማያና ካሎ ዱፎን ዴዲሲፔ አቲን ሶ ጌሌና። 28 ዮሱሳ ቤዲዳ ዎዴ ኢያ ሲንሳን ጉፋኒዲ፣ ባ ቃላ ዶቁ አሲዲ፣ «ኡባፌ ቦላ ዶሳ ናዓው ዮሱሳ ኔራ ታው አይቢ ኢሲፌቴላ ዴዲ? ሃያና ታና ሃዲ ኡንዴሶፋርኪ» ያጊስ። 29 ሄሳ ኢ ጊዳይ፣ ቱና አያናይ ኡራፔ ኬያና ሚላ ዮሱሲ ሃንቄቲዳ ጊሾሳ። ዳር ዎዴ ቱና አያናይ ኢያ ሃሪዳ ጊሾ ሳንሳላታኒኔ ቶሆ ቃቺያ ቢራታን ቃሼቲዲ ናጌቴስ። ሺን ቃሹዋ ዱሲዲ ቱና አያናን ላጌቲዲ ባዞ ጌሊስ።

30 ዮሱሲ፣ «ኔ ሱንሳይ አኔ» ያጊዲ አይቺስ። ኢ፣ ዳር ቱና አያናቲ ኢያ አይኪዲ ጊሾ ባና፣ «ሌጊዮና» ጊስ። 31 ቱና አያናቲ ባንታና ሲዶሌ ኪቶና ሚላ ዎሲዶሶና።

32 ሄ ቤሳን ዞዜ ቦላ ሚያ ጉዱንሶ ወዴይ ሃሙቴስ። ሂኒ ጉዱንሶታን ጌሊኖ ጊዲ ዎሲዶሶና፣ ኢካ «ጌሊቴ» ጊስ። 33 ቱና አያናቲ ኡራፔ ኬዬዲ ጉዱንሶታን ጌሊዶሶና። ወዴይ ዴሪያፔ ዱጌ ጉርጉዲዲ አባን ጌሊስ።

34 ሄንሳንቾቲ ሃኒዳይሳ ቤዲዳ ዎዴ ዎጊ ቢዲ፣ ካታማኒኔ ጉታ ኡባን አዲዶሶና። 35 አሳይ ሃኒዳባ ቤዳናው ኬዬዲ ዮሱሳኮ ዩዶሶና። ቱና አያናይ ኬዬዳ ኡራይ ማዎ ማዲዲ፣ ኢያ ዎዛናይ ሲሚን፣ ዮሱሳ ቶሆ ማታን ኡቲዳይሳ ዴሚዲ ያዩዶሶና። 36 ኢያ ቤዲዳ አሳይ ቱና አያናን አይኬቲዳ ኡራይ ዋኒዲ ፓዲዳኮ አዲዶሶና። 37 ጌርጌሶኔ ዩሹዋን ዴዲያ አሳይ ጊታ ያሺ ያሼቲዲ ዮሱሲ ባንታ ማታፔ ባና ሚላ ዎሲዶሶና። ኢ ዎጎሎን ጌሊዲ ጉዬ ሲሚስ።

38 ቱና አያናይ ኬዬዳ ኡራይ ዩሱሳራ ዳናው ዎሲስ። 39 ሺን ዩሱሲ ኢያኮ፥ «ኔ ሶ ሲማ፥ ያሳይ አይ ሜላ ጊታባ ኔው አሲዳኮ አዳ» ያጊዲ ሞይዚስ። ኡራይካ ዩሱሲ አይ ሜላ ጊታባ ኢያው አሲዳኮ ካታማ ኡባን ማርካቲሼ ቢስ።

ሃይቂዳ ናዒወኔ ዩሱሳ ማዑዋ ቦቺዳ ማጫሲው
(ማቶ 9:18-26፤ ማር 5:21-43)

40 አሳይ ናጊዲ ጋምዒዳ ጊሾ ዩሱሲ ሲሚያ ዎዴ ሞኪ ኤኪዶሶና። 41 አይሁዴ ዎሳ ኬላ ሃላቃ ጊዲዳ ኢያሮሳ ጊያ ኡራይ ባ ሶ ያና ሜላ ዩሱሳ ቶሁዋ ቦላ ዎዲዲ ዎሲስ። 42 ኢያው ታማኔ ናምዑ ላይሲ ጊዲዳ ማጫ ናዓ ዴዒያራ ሳኬታዳ ሃይቆስ ጋካዳ ዴዓወሱ። ዩሱሲ ቢያ ዎዴ አሳይ ኢያ ኡንዴሴስ። 43 ታማኔ ናምዑ ላይሲ ሱሲ ጎጊሼ ጋምዒዳ ማጫሲ ዴዒያራ ዴዓወሱ። ኢያ ባው ዴዒያ ሚሺያ አኪሜታስ ኢማዳ አንጋሱ። ሺን ፓፃናው ዳንዳግቡኩ። 44 ኢያ ዩሱሳስ ጉዩ ባጋራ ሺቃዳ፥ ኢያ አፊላ ማጫራ ቦቻሱ፥ ሶሁዋራ ጎጊያ ሱሳይ ኤቂ አጊስ።

45 ዩሱሲ፥ «ታና ቦቺዳይ አኔ?» ያጊስ። ኡባይ «ኮ ቦቺቦኮ» ያጊን፥ ጴጊሮሲ፥ «አስታማሪያው፥ ዳሮ አሳይ ካሊሺኔኔ ኡንዴሴሺን ቤዓሼ ዋናዳ፥ <ታና ቦቺዳይ አኔ?> ጋይ» ያጊስ።

46 ሺን ዩሱሲ፥ «ኢሲ አሲ ታና ቦቺስ፤ አይስ ጊኮ፥ ዎልቂ ታፔ ኬዩይሲ ታው ኤሬቲስ» ያጊስ።

47 ማጫሲያ፥ ኢባይ ቆንጫዳይሳ ኤሪዳ ዎዴ ኮኮራሼ ያዳ ዩሱሳ ቶሁዋ ቦላ ኩንዳሱ። አይስ ቦቺዳኮኔ ዋናዳ ኤሌሳዳ ፓጊዳኮ አሳ ኡባ ሲንሳን ማርካታሱ። 48 ኢ፥ «ታ ናቴ፥ ኔ አማናይ ኔና ፓሲስ፤ ሳሮን ባ» ያጊስ።

49 ዩሱሲ አዳ አንጎና ዴዒሺን፥ አይሁዴ ዎሳ ኬላ ሃላቃ፥ ኢያሮሳ ሶፔ ኢሲ አሲ ዩዲ፥ «ኢያሮሳ፥ ኔ ናዒያ ሃይቃሱ፤ አስታማሪያ ሜላ ዳቡሪሶፋ» ያጊስ።

50 ሺን ዩሱሲ ሄሳ ሲዒዲ ኢያሮሳኮ፥ «ባቦፋ! አማና፥ ኔ ናዒያ ፓፃና» ያጊስ።

51 ዩሱሲ ኢያሮሳ ሶ ጋኪዳ ዎዴ ጴጊሮሳፔ፥ ዮሃኒሳፔ፥ ያይቆባፔ፥ ናዔ አዋፔኔ አዩፔ አቲን ሃሪ ጌላና ሜላ ኮዩቤና።

52 ሄ ቤሳን ዴዒያ አሳ ኡባይ ናዔስ ሚሼቲዲ ዩኪሺን፥ ዩሱሲ፥ «ዩኮሬቴ! ናዒያ ጴስካሱፔ አቲን ሃይቃቡኩ» ያጊስ።

53 አሳይ ናዒያ ሃይቂዳይሳ ኤሪያ ጊሾ ኢያ አዳ ሌቂዲ ሚጫዶሶና። 54 ሺን ዩሱሲ ናዔ ኩሺያ አይኪዲ፥ «ናቴ ዴንዳ» ያጊስ። 55 ናዔስ ሽምፖይ ሲሚን ዴንዳ ኤቃሱ። ዩሱሲ ኤንታኮ፥ «ኢዉ ሚያባ ኢሚቴ» ያጊስ። 56 ናዔ አዋራኔ አዩራ ማላሌቲዶሶና። ሺን ዩሱሲ ሃይሳ፥ «አዴስካ አዶፒቴ» ያጊስ።

9

ዮሱሴ ታማኔ ናምዑ ሃዋሬታ ኪቲስ

(ማቶ 10:5-15፤ ማር 6:7-13)

¹ ዮሱሴ ታማኔ ናምዑ ሃዋሬታ ባኮ ዩጊዲ፥ ቱና አያናታ ኪሳና ሜላኔ ሃርጌ ኡባ ፓሳና ሜላ ዎልቃኔ ማታ ኢሚስ። ² ዶሳ ካዎቴሳባ ማርካታናዳኔ ሃርጋንቾታ ፓሳናዳ ኪቲስ። ³ ኢ ኤንታታ፥ «ፃምዓ ጊዲን አጎሮ ጊዲን ካሲ ጊዲን ሚሼ ጊዲን ላሚ ማዲያ አፊላ ጊዲን አጌስ ጊዲ አይኮካ አይኮፊቴ። ⁴ ሄ ካታማፔ ሂንቱ ኬያና ጋካናው ኢማሳቴሳን ሂንቱ ጌሊዳሱዋን ጋምዲቴ። ⁵ አኒካ ሂንቱና ሞኮና ኢዲኮ ሄ ካታማፔ ኬዬሼ ኤንታው ማርካ ጊዳና ሜላ ሂንቱ ቶሁዋን ዴዲያ ባና ፒቲዲ ኬዬቴ።» ⁶ ኤንቲካ ኪቴቲዳይሳዳ ኬዬዲ ዎንጌላ አዲሼኔ ዱማ ዱማ ጉታታን ሃርጋንቾታ ፓሊሼ አዲዶሶና።

⁷ ጋሊላ ቢታ ሃሪያ ሄሮዲሴ ዮሱሴ አሲዳባ ኡባ ሲዲዳ ዎዴ ዳጋሚስ። አይስ ጊኮ፥ ኢሲ ኢሲ አሳቲ ዮሃንሲ ሃይቆፔ ዴንዶና አጌና ያጎሶና። ⁸ ባጋቲ፥ «ኤሊያሲ ቆንጨስ» ጎሶና፤ ሃራቲ ቃሲ፥ «ቤኒ ናቤታፔ ኢሲይ ሃይቆፔ ዴንዲስ» ያጊዲ አዴቶሶና። ⁹ ሺን ሄሮዲሴ፥ «ዮሃንሳ ቆዲያ ታ ቃንዲሳዳ ዎዳስ። ያቲን፥ ሃይሳሶ ያጌቲዲ ኢያባ አዴቴይ፥ ኢ አኔ?» ያጊዲ ባ አይፊን ቤዓናው ኮዮስ።

ዮሱሴ ኢቻሹ ሙኩሉ አሳ ሙዚስ

(ማቶ 14:13-21፤ ማር 6:30-44፤ ዮሃ 6:1-14)

¹⁰ ታማኔ ናምዑ ሃዋሬቲ ጉዮ ሲሚ ዩዲ፥ ኤንቲ አሲዳባ ኡባ ዮሱሳስ አዲዶሶና። ኢ ኤንታና ኤኪዲ ቤቴሳይዳ ካታማፔ ጋፃ ኤፊስ። ¹¹ ሺን ዳሮ አሳይ ዮሱሳ ጊዴይሳ ኤሪዲ ኢያ ካሊዶሶና። ኢ ኤንታ ሞኪ ኤኪዲ ዶሳ ካዎቴሳባ ታማርሲስ፤ ፓፃናው ኮዮይሳታካ ፓሊስ።

¹² ሳዲ አማርሲያ ዎዴ ታማኔ ናምዑ ሃዋሬቲ ኢያኮ ሺቂዲ፥ «ኑ ዴዴይ ባዞ ቢታ ጊዲያ ጊሾ አሳይ ዱማ ዱማ ጉታታኔ ካታማታ ቢዲ፥ ካሲኔ አቂያሶ ኮያና ሜላ አሳ ሞይዛ» ያጊዶሶና።

¹³ ሺን ኢ፥ «ኤንታው ሚያባ ሂንቱ ኢሚቴ» ያጊስ።
ኤንቲ፥ «ኑስ ዴዴይ ኢቻሹ ኡይሲኔ ናምዑ ሞሎ ጊዲያ ጊሾ ሃ አሳስ ጊዲያ ካሲ ኑኒ ቢዲ ሻሞና ኢዲኮ ጊዴና» ያጊዶሶና።

¹⁴ ሄ ቤሳን ኢቻሹ ሙኩሉ ጊዲያ አዴቲ ዴዶሶና።
ዮሱሴ ባ ታማሬታኮ፥ «ኢሻታማን ኢሻታማን ሻኪ ሻኪ አሳ ኡቲሲቴ» ያጊስ።

15 ኢየሱስ ታማራቱ፤ ኢየሱስ ከተዳይሳዳ አሳ ኡቲሲዶሶና። 16 ኢየሱስ ኢቻቸው ኡይሳኔ ናምዑ ሞሎታ ኤኪዲ፤ ሳሎ ዌሊዲ፤ ያሳ ጋላቲዲ፤ ሜንሲዲ አሳ ኡባ ጋላና ሜላ ባ ታማራታስ ኢሚስ።
 17 ኡባይ ሚዲ ካሲዶሶና። ኤንታፌ አቲዳ ቲፌይ ታማኔ ናምዑ ጋይታ ኩሜሲ ጊዲስ።

ጳጊሮሲ፤ ዩሱሲ አኔኮ ማርካቲስ
 (ማቶ 16:13-19፤ ማር 8:27-29)

18 ዩሱሲ ባ ዓላላ ዎሲሺን፤ ኢየሱስ ታማራቲ ኢየኮ ዩዶሶና። ኢ፤ «አሳይ ታና አና ጎና?» ጊዲ አይቺስ።

19 ኤንቲ ዛሪዲ «ኢሶቲ ኢሶቲ፤ <ግማቂያ ዮሃንሳ፤ ባጋቲ ኤሊያሳ፤ ሃራቲ ቃሲ፤ ቤኒ ናቤታፕ ኢሶይ ሃይቆፕ ዴንዲስ> ያጎሶና» ያጊዶሶና።

20 ኢ ዛሪዲ፤ «ያቲን ሂንቱ ታና አና ጌቲ» ያጊስ። ጳጊሮሲ፤ «ኔኒ ያሳፌ ኪቱቲዳ ኪሪስቶሳ» ያጊዲ ዛሪስ።

21 ዩሱሲ ሃይሳ አዴስካ አዶፕቱ ጊዲ ሚንሲዲ አዲስ።

22 ቃሲካ ዩሱሲ፤ «አሳ ናዓይ ዳሮ ሜቱዋ ኤካና፤ ቢታ ጨማታን፤ ካሂኔ ሃላቃታን፤ ሂጌ አስታማራታን አዲ ኢሜታና። ኤንቲ ኢየ ዎዳና፤ ሺን ኢ ሄቫንሶ ጋላስ ሃይቆፕ ዴንዳና» ያጊስ።

23 ዩሱሲ አሳ ኡባኮ፤ «ታና ካላናው ኮይይ አኒካ ዴዒኮ ባና ካዶ፤ ባ ማስቃሊያ ጋላስ ጋላስ ቶኪዲ ታና ካሎ። 24 ባ ሼምፕው አሻናው ኮያ ኡባይ ኢዮ ዳይሴስ፤ ባ ሼምፕው ታ ጊሾ ጊዲ ዳይሴያ አኒካ ኢዮ አሼስ። 25 አሲ አላሜ ኡባ ሃሪዲ፤ ጊዶሺን ባ ሼምፕው ዳይሴያ ባ ዎይኮ ቆሂያ ባ ጊዲኮ ኢየ አይ ማዲ? 26 አኒካ ታናኒኔ ታ ቃላን ዩላቲኮ አሳ ናዓይ ባ ቦንቹዋራ ሄሳዳካ አዋ ቦንቹዋራኔ ጌሻ ኪታንቾታ ቦንቹዋራ ያ ዎዴ ኢያን ዩላታና። 27 ታ ሂንቱው ቱማ አዳይስ፤ ሃይሳን ኤቂዳይሳታ ጊዶፌ ያሳ ካዎቴሳ ቤናሺን ሃይቆና አሳቲ ዴዎሶና» ያጊስ።

ዩሱሳ ማላይ ላሜቲስ
 (ማቶ 17:1-8፤ ማር 9:2-8)

28 ዩሱሲ ሄ አዳ አዲን፤ ሆስፕን ጋላሳፕ ጉዩ ጳጊሮሳ፤ ያይቆባኔ ዮሃንሳ ባራ ኤኪዲ ዎሳናው ዴሪያ ቦላ ኬዩስ።

29 ኢ ዎሳ ቦላ ዴዒሺን ኢየ አይፌ ካሬይ ላሜቲስ፤ አሬላይካ አዋ ሜላ ጳሊዲ ቦዒስ። 30 ናምዑ አሳቲ፤ ኤንቲካ ሙሴራኔ ኤሊያሳራ ቦንቾን ቆንጨዲ፤ 31 ዩሩሳላሜን ፖሌታናው ዴዒያባ፤

9:19 ማቶ 14:1፤ 2፤ ማር 6:14-15፤ ሉቃ 9:7-8 9:20 ዮሃ 16:20-28፤ ማር 8:30-9:1 9:23 ማቶ 10:38፤ ሉቃ 14:27 9:24 ማቶ 10:39፤ ሉቃ 17:33፤ ዮሃ 12:25 9:28 2ጴጊ 1:17-18

ሄሲካ፥ ኢህሃድ ለሃላጊያጥ ሻኬታናባ ኢያራ አደቶሶና።³² ጴጊሮሳኔ ኢያራ ደዔይሳታ ጴስኮይ ኤሬን፥ ኤንቲ ጴስኮሬ ባርኪያ ዎዴ ኢያ ቦንቹዎኔ ኢያራ ኤቂዳ ናምዑ አሳታ ቤዒዶሶና።³³ አሳቲ ዮሱሳፕ ሻኬቲዲ ባና ሃኒሺን፥ ጴጊሮሲ ዮሱሳኮ፥ «ጎዳው፥ ሃይሳን ጊዴይሲ ኑስ አይ ሜላ ሎዎ! ኢሲኖ ኔው፥ ኢሲኖ ሙሴስ፥ ኢሲኖ ኤሊያሳስ አሲዲ ሄዙ ሻቃራ ሻቃሮስ» ያጊስ። ሺን ኢ አይ ጊዳኮ ኤሬና።

³⁴ ኢያጊዲ አደቲሺን ሻራይ ዩዲ ኤንታና ካሚስ፥ ኤንቲ ሄ ሻራ ጊዶ ጌሊሼ ባቢዶሶና።³⁵ ሻራ ጊዶሬ፥ «ታ ዶሪዳ ናዓይ ሃይሳ ኢያ ሲዒቴ» ያጊያ ቃላይ ሲዒቴስ።³⁶ ሄ ቃላይ ሲዒቴዳፕ ጉዮ ዮሱሲ ባርካ ደዒሼ ቤንቲስ። ሄ ዎዴ ኤንቲ ቤዒዳባ አዴስካ አዶና፥ ባንታ ዎዛናን አይኪዲ ሲዒ ጊዶሶና።

ዮሱሲ ቱና አያና ኢሲ ናዓፕ ኬሲስ
(ማቶ 17:14-18፤ ማር 9:14-27)

³⁷ ዎንቴሴ ኤንቲ ደሪያፕ ዎጲያ ዎዴ ዳሮ አሳይ ዩዲ ኢያራ ጋሄቲዶሶና።³⁸ ሄ ዎዴ አሳ ጊዶሬ ኢሲ አሲ፥ «አስታማሪያው፥ ታ ኢሲ ናዓ ያዳ ቤዓርኪ።³⁹ ቱና አያናይ ቆጋና አይኪዲ ዋሲሴስ፤ ጎፖንቶ ዮጊሲዲ ቃኬሬሴስ፥ አሳቴሳ ቆሂዲ አንዔሴዲ ዮዴስ።⁴⁰ ኔ ታማሬቲ ኬሳና ሜላ ዎሳስ፥ ሺን ኤንቲ ዳንዳዒቦኮና» ያጊዲ ዎሲስ።

⁴¹ ዮሱሲ፥ «አማኖይ ባይና ጌላ ዮሌቴሳቶ፥ አውዴ ጋካናው ታ ሂንቴራ ዳኔ፥ ሂንቴና ዳንዳዓኔ? ኔ ናዓ ባዳ ሃ ኤካያ» ያጊስ።

⁴² ናዓ ኤኪዲ ያ ዎዴ ቱና አያናይ ሳዓን ሆሊ ዮጊዲ ኮኮርሲስ። ሺን ዮሱሲ ቱና አያና ሃንቂዲ ናዓፕ ኬሲስ። ናዓካ ናዓ አዋስ ኢሚስ።⁴³ አሳይ አባይ ዎሳ ጊታ ዎልቃን ማላሌቲዶሶና። ኤንቲ ኢ አሲዳባን ማላሌቲሺን፥ ዮሱሲ ባ ታማሬታኮ፥⁴⁴ «ሃይሳ ታ ሂንቴው አዴይሳ ሎይሲ ሲዒቴ፤ አሳ ናዓይ ሞርኪታ ኩሼን አጲ ኢሜታና» ያጊስ።⁴⁵ ሺን ኢ ጊዳባይ ኤንታሬ ጌሚዳ ጊሾ አኪኪቦኮና። ሄሳ ጊሾ፥ ዛሪዲ አይቻናው ባቢዶሶና።

አባሬ ጊታ ጊዳናይ አኔ?
(ማቶ 18:1-5፤ ማር 9:33-37)

⁴⁶ ዮሱሳ ታማሬቲ፥ «ኑ ጊዶን ጊታ ጊዳናይ አኔ?» ጊዲ ፓላማ አይኪዶሶና።⁴⁷ ዮሱሲ ኤንታ ዎዛና ቆፋ ኤሪዲ ዮጋ ናዓ ባ ማታን ኤሲዲ፥⁴⁸ «ሃ ዮጋ ናዓ ታ ሱንሳን ሞኪያ አኒካ ታና ሞኪስ፥

9:35 ኢሳ 42:1፤ ማቶ 3:17፤ 12:18፤ ማር 1:11፤ ሉቃ 3:22 9:46 ሉቃ 22:24

ታና ሞኬይ ታና ኪቲዳይሳ ሞኬስ፥ ሂንቴ ኡባሬ ጉዲይሲ፥ ኢ ጊታ ጊዳና» ያገሰ።

49 የሃሂሲ፥ «ጎዳው፥ ኢሲ አሲ ኔ ሱንሳን ቱና አያናታ ኬሲሺን ቤዲዲ ኢ ኑራ ጊዶና ጊሾ ዲጊዳ» ያገሰ።

50 ዮሱሲ ዛሬዲ፥ «ሂንቴራ ኤቁቶናይሲ፥ ኢ ሂንቴ ባጋ። ሄሳ ጊሾ፥ ኢያ ዲጎሬቴ» ያገሰ።

ሳማሬ አሳይ ዮሱሳ ኢዲዶሶና

51 ዮሱሲ ሳሎ ቢያ ዎዴይ ማታቲዳ ጊሾ ዮሩሳላሜ ባናው ቃንዲዲ ዴንዲስ። 52 ሳማሬ ቢታን ዴዲያ ኢሲ ጉታ ቢዲ፥ ኡባባ ኢያው ጊጊሳና ሜላ አሴ ያ ኪቲስ። 53 ሺን ኢ ቤይ ዮሩሳላሜ ጊዲያ ጊሾ ኤንቲ ኢያ ሞኪ ኤኪቦኮና። 54 ዮሱሳ ታማሬቲ ያይቆባራኔ የሃሂሳራ ሄሳ ቤዲዲ፥ «ጎዳው፥ ሳሎፕ ታሚ ዎዲዲ ኤንታ ሞ ጋና ሜላ ኔ ኮያይ» ያገደሶና። 55 ሺን ዮሱሲ ጉዮ ሲሚ ኤንታ ሃንቁቲዲ፥ «ሂንቴ ጋርሳን አይቤ አያኒ ዴዲያኮ ሂንቴ ኤሬኬታ። አሳ ናዓይ አሴ አሻናው ዩሲፕ አቲን ዳይሳናሳ ጊዴና» ያገሰ። 56 ያፕ ዴንዲዲ ሃራ ጉታ ቢዶሶና።

ዮሱሳ ካሎይ ጨጊሲያ ጋቲያ (ማቶ 8:19-22)

57 ኤንቲ አጊያራ ቢሺን፥ ኢሲ አሲ፥ «ኔ ቢያሶ ኡባ ታ ካላና» ያገሰ።

58 ዮሱሲ ዛሬዲ፥ «ዎርካናታስ አሊ፥ ሳሎ ካፎታስ ኬሲ ዴዲስ፥ ሺን አሳ ናዓይ ባ ሁዲያ ሼምፒሲያሶይ ባዋ» ያገሰ።

59 ሃንኩዋኮ፥ «ኔኒ ታና ካላ» ያገሰ። ሺን ኡራይ፥ «ጎዳው፥ ኮይሮታዳ ታ አዋ ሞጋዳ ያና» ያገሰ።

60 ሺን ዮሱሲ፥ «ሃይቁዳይሳቲ ሃይቁዳይሳታ ሞጋና ሜላ ኤንታው አጋጋ፤ ኔኒ ባዳ ያሳ ካዎቴሳ ሳባካ» ያገሰ።

61 ቃሲ ሃራ አሲ፥ «ጎዳው፥ ታ ኔና ካላና፥ ሺን ኮይሮታዳ ታ ሶ አሳ ሳሮሳዳ ያና» ያገሰ።

62 ዮሱሲ ዛሬዲ፥ «ኮዌ አይኪዲ ጉዮ ዌሊያ ኦኒካ ያሳ ካዎቴሳስ ቤሴና» ያገሰ።

10

ዮሱሲ ላፑን ታማኔ ናምዑ ታማሬታ ኪቲስ

9:48 ማቶ 10:40፤ ሉቃ 10:16፤ ዮሃ 13:20 9:54 2ካዎ 1:9-16 9:61 1ካዎ 19:20

1 ሄሳፌ ጉዩ፥ ጎዳይ ሃራ ላፑን ታማኔ ናምዑ * አሳታ ዶሪስ።
 ኢ ባናው ቆፒዳ ካታማኔ ጉታ ኡባ ሲንሳቲዲ ባናዳ ናምዓ ናምዓ
 አሲዲ ኪቲስ። 2 ዩሱሲ ኤንታኮ፥ «ሄኮ ሺቃና ካሳይ ዳሮ ሺን
 አሳንቾቲ ጉሳ። ያኒያ ጊሾ፥ ካሳ ጎዳይ አሳንቾታ ኪታና ሜላ
 ዎሲቴ። 3 ሂዛ፥ ቢቴ፥ ዶርሳታዳ ሱዱሜታ ጊዶ ሂንቴና ታኒ
 ዩዳና። 4 ሂንቴ ቢያ አጊያስ አይኮካ አይኮፊቴ፥ ሚሼ ጊዲን
 ካሲ ጊዲን ጫማ አይኮፊቴ። አጌ ቦላ አናካ ሳሮሶፊቴ። 5 ሂንቴ
 ጌሊያ ኬሳ ኡባ ኮይሮቲዲ፥ ሳሮይ ሃ ኬሳስ ጊዶ» ያጊቴ። 6 ሳሮ
 ዶሲያ አሲ ሄ ቤሳን ዴዲኮ፥ ሂንቴ ሳሮይ ያን ሽምፓና፤ ኢፃስ
 ጊኮ ሂንቴ ሳሮይ ሂንቴው ሲማና። 7 አሳንቾስ ዳሞዜ ቤሲያ ጊሾ
 ሂንቴ ጌሊዳ ኬሳን ሂንቴው ሸሺዳባ ኡባ ሚሼኔ ኡዩሼ ያን
 ጋምዲቴ። ኢሱዋ ሶፔ ኢሱዋ ሶ ዩዮፒቴ። 8 አይ ካታማካ ሂንቴ
 ጌሊያ ዎዴ አሳይ ሂንቴና ሞኪዲ፥ ሂንቴው ሸሺዳባ ኡባ ሚቴ።
 9 ሄ ካታማን ዴዲያ ሃርጋንቾታ ፓሲሼ፥ ሰላ ካዎቴሳይ ሂንቴኮ
 ማቲስ) ያጊዲ አዲቴ። 10 ሺን ኢሲ ካታማ ጌሊያ ዎዴ አሳይ
 ሂንቴና ሞኮና ኢፃኮ ዳባባ ኪዩዲ ሃይሳዳ ጊቴ። 11 ሉ ቶሁዋ
 ቦላ ዴዲያ ሂንቴ ካታማ ባና ፒቶስ፥ ሺን ያሳ ካዎቴሳይ ሂንቴኮ
 ማታቲዳይሳ ኤሪቴ።» 12 ፒርዳ ጋላሳን ሃ ካታማፔ ሶዶሜ ካታማስ
 ፒርዳይ ካዉሼ ጊዳናይሳ ታ ሂንቴው አዳይስ» ያጊስ።

አማኖና ጊሾ ቦሬቲዳ ካታማታ
 (ማቶ 11:20-24)

13 ካሊዲካ፥ ዩሱሲ፥ «ኔኖ ኮራዚኔ፥ ኔኖ ቤቴሳይዳ፥ አዩ፥
 ሂንቴናን አሴቲዳ ማላታቲ ሂሮሳኒኔ ሲዶናን አሴቲዳኮ ያን ዴዲያ
 አሳይ ካሌ ማዲዲ፥ ቢዲንሳ ቦላ ኡቲዲ ቤኒ ማሮታን ጌሊ
 አጋናሺን። 14 ሄሳ ጊሾ፥ ሂንቴፌ አሲዲ ሂሮሳሲኔ ሲዶናስ
 ያሳ ፒርዳይ ካዉያና። 15 ኔካ ቂፊርናሆሜ፥ ሳሎ ጋካናው ኔና
 ዶቁ አሳናው ኮያይ? ኔ ዱጌ ሲያሌ ሆሌታና» ያጊስ።
 16 ቃሲካ ዩሱሲ ባ ታማሬታኮ፥ «ሂንቴና ሲዔይ ታና ሲዔስ፥
 ሂንቴና ኤኮናይ ታና ኤኬና፥ ታና ኤኮናይ ታና ኪቲዳይሳ ኤኬና»
 ያጊስ።

* 10:1 ላፑን ታማኔ ናምዑ፡ ኢሲ ኢሲ ማፃፋቲ ላፑን ታማ ጎሶና፤ ቃሲ ፓይዶ 17
 ዓላ። 10:2 ማቶ 9:37-38 10:3 ማቶ 10:16 10:4 ማቶ 10:7-14፤ ማር
 6:8-11፤ ሉቃ 9:3-5 10:7 1ቆሮ 9:14፤ 1ፂሞ 5:8 10:10 ሃ.አ 13:51
 10:11 ማቶ 10:7-14፤ ማር 6:8-11፤ ሉቃ 9:3-5 10:12 ሜዴ 19:24-28፤
 ማቶ 10:15፤ 11:24 10:13 ኢሳ 23:1-18፤ ሂዝ 26:1-21፤ ኢዩ 3:4-8፤ አሞ
 1:9-10፤ ዛክ 9:2-4 10:15 ኢሳ 14:13-15 10:16 ማቶ 10:40፤ ማር
 9:37፤ ሉቃ 9:48፤ ዮሃ 13:20

ላፑን ታማኔ ናምዑቲ ሲሚዶሶና

17 ላፑን ታማኔ ናምዑ ታማሬቲ ኪቴቲዳ ቤሳፌ ኬሂ ኡፋይቲሼ ሲሚዶሶና። ዩሱሳኮ ሺቂዲ፥ «ጎዳው፥ ኔ ሱንሳን ቱና አያናቲካ ኑስ ኪቴቲዶሶና» ያጊዶሶና።

18 ዩሱሲ ኤንታኮ፥ «ፃላሄይ ሳሎፔ ዎልዓንሳዳ ዎዲሺን ታ ቤዓስ። 19 ሄኮ፥ ሾሻኔ ኮርኔ ዩዳና ሜላኔ ሞርኪያ ዎልቃ ዛራና ሜላ ማታ ሂንቴው ኢማስ። ሂንቴና ቆሃናባይ አይኮይካ ዴና። 20 ጊዶሺን፥ ሂንቴ ሱንሳይ ሳሎ ማዝጋባን ፃፌቲዳ ጊሾ ኡፋይቲቴፔ አቲን ቱና አያናቲ ኪቴቲዳ ጊሾ ኡፋይቶፊቴ» ያጊስ።

ዩሱሲ ባ ኡፋይሳ ቆንጨሲስ (ማቶ 11:25-27፤ 13:16-17)

21 ሄ ዎዴ ዩሱሲ ጊሻ አያናን ኡፋይቲዲ፥ «ሳሎዎ ሳዓ ጎዳው፥ ሃይሳ ጨንጫታፔኔ ኤራንቾታፔ ጌንሳዳ ያላጋታስ ቆንጨሲዳ ጊሾ ጋላቴታ፥ ኤ ታ አዋው፥ ሄሳ ኔ አሳናው ሎዎ ሼኔ ጊዲስ።

22 «ኡባባይ ታ አዋፔ ታው ኢሜቲስ። ናዓይ ኦኔኮ አዋፔ አቲን ሃሪ ዎይኮ ናዓይ ቆንጨሳናው ኮዩይሳፌ ሃሪ ኦኔካ አዋ ኤሬይ ባዎ» ያጊስ።

23 ካሊዲካ፥ ዩሱሲ ዱማ ባ ታማሬታኮ፥ «ሂንቴ ቤዔይሳ ቤዔይሳቲ አንጄቲዳይሳታ። 24 ቱማ ዳሮ ናቤቲኔ ካዎቲ ሂንቴ ቤዔይሳኔ ሲዔይሳ ቤዓናውኔ ሲዓናው አሞቲዶሶና፥ ሺን ቤዒቦኮና፥ ሲዒቦኮና» ያጊስ።

ቱማ ሲቆ

25 ሄኮ፥ ኢሲ ጋላስ ሙሴ ዎጋ ኤሪያ ኢሲ ኡራይ ዴንዲዲ ዩሱሳ ያጊዲ ፓጩ አይሾ አይቺስ። «አስታማሪያው፥ ሜሪና ዴዑዎ ላታናው ታኒ አይ አሶ?» ያጊስ።

26 ዩሱሲ፥ «ሙሴ ማፃፋን ፃፌቲዳይ ዎይጊ? ኔ ዋታ ናባባይ?» ያጊስ።

27 አዴይ ዛሪዲ፥ «(ኔ ጎዳ ኔ ያሳ፥ ኔ ኩሜሳ ዎዛናፔ፥ ኔ ኩሜሳ ሼምፑዎፌ፥ ኔ ኩሜሳ ዎልቃፌኔ ኔ ኩሜሳ ቆፋፔ ዶሳ፥ ቃሲ አሴ ኔ ሾሩዎ ኔ ሁዒያዳ ዶሳ) ያጊስ» ያጊስ።

28 ዩሱሲ ኢያኮ፥ «ኔኒ ሊኬ ዛራዳሳ፥ ኔካ ሄሳዳ አሳ። ኔኒ ሜሪናው ዴዎን ዳና» ያጊስ።

29 ሺን ኡራይ ባና ሂሎ አሳናው ኮዩዲ፥ «ሃኖስ ኢ ታ ሾሮይ አኔ?» ያጊስ።

10:19 ማዝ 19:13 10:22 ዮሃ 3:35፤ 10:15 10:25 ማቶ 22:35-40፤ ማር 12:28-34 10:27 ሌዌ 19:18፤ ዛሬ 6:5 10:28 ሌዌ 18:5

30 ኢየሱስ አይሻሽ ዮሱስ ያገደ ዛፍ ኢሚስ። «ኢሲ አሴ ደዌይሲ ዮሩሳላሜ ካታማፍ ዱጌ ኢያርኮ ካታማ ቢሺን አጌ ቦላ ፓንጋቲ ከዱዲ ሾጪዶሶና። ኢየ ማዑዋ ቃሪ ኤኪዲ ሃይቆፕጌ ፓፕፍ ጊዶን ዮጊዲ ቢዶሶና። 31 ጉዮፕ፣ አይሁዴ ካሂኔ ኢሶይ ሄ አጊያራ ባ ቡሱ ቢሼ ኡራ ቤዒዲ ዴሺ ጊዲ አዲስ። 32 ቃሲ ኢሲ ሌዌ ደዌይሲ ሄ ቤሳ ጋኪሼ ኡራ ቤዒዲ ሃራሶራ አዲዲ ቢስ። 33 ሺን፣ ኢሲ ሳማሬ ቢታ አሴ ደዌይሲ ሄ አጊያራ ዩሼ ኡራ ቤዒዲ ኢያው ቃዴቲስ 34 ኢያኮ ሺቂዲ፣ ኢየ ማዱንሳ ቦላ ዛይቴኔ ዎይኔ ቲጊዲ ቃቺስ። ባ ሃሪያ ቦላ ኡቲሲዲ ኢማሲ አቂያ ኬሲ ኤፊስ። ሄ ቤሳን ኢያው ኮሺያባ ኡባ አሲስ። 35 ዎንቴሴ ናምዑ ዲናሬ ኬሲዲ ኢማሳ ኬሳዋስ ኢሚዲ፣ ሃያና ሃ ኡራ ሎይሳ ዌላ። ታኒ ኔው ኢሚዳይሳፊ ቦሳራ ኔ ኬሲያባ ኡባ ታ ኔው ጩጋና» ያገሰ።

36 «ሂዛ፣ ሃ ሄኹ አሳታፍ ፓንጋቲ ሾጪዳ ኡራስ ሾሮቴይ ኔው አና ዳኒ?»

37 ኡራይ ዛሪዲ፣ «ኢያው ቃዴቲዳይሳካ» ያገሰ።
 ዮሱስ፣ «ኔካ ባዳ ሄሳዳ አሳ» ያገሰ።

ዮሱስ ማርታኔ ማይራሚ ሶን

38 ዮሱስ ባ ታማሬታራ አጌ ቢሼ ኢሲ ጉታ ጋኪስ። ያን ማርታ ጌቴቲያ ኢሲ ማጫሲያ ኢያ ባ ሶን ሞካሱ። 39 ኢዉካ ማይራሞ ጊያ ሚቺያ ዴዓዉሱ፣ ማይራማ ቃላ ሲዓሼ ጎዳ ቶሁዋ ማታን ኡታሱ። 40 ሺን ማርታ ዳሮ አሶን ኡንዌታዳ ዮሱሳኮ ሺቃዳ፣ «ጎዳው፣ ታ ሚቺያ አሱዋ ታ ዓላላስ ዮጋዳ ኡታ አጊን ታ ዳቡሪያ ዎዴ ኔኒ ቤዓሼ ሲዒ ጋይ? ኢያ ታና ማዳና ሜላ አዲኪ» ያጋሱ።

41 ሺን ጎዳይ ሃይሳዳ ጊዲ ዛሪስ፣ «ማርታ፣ ማርታ፣ ኔኒ ዳሮባን ኡንዌታሳኔ ሜቶታሳ። 42 ጊዶሺን፣ ኮዮቴይ ኢሲባ ዓላላ። ማይራማ ሎዎባ ዶራሱ፣ ሄሲካ ኢፔ ኤኬቴና» ያገሰ።

11

ዮሱስ ዎሳባ ታማርሲስ
 (ማቶ 6:9-13፤ 7:7-11)

1 ኢሲ ጋላስ ዮሱስ ኢሲ ቤሳን ዎሲስ። ዎሳ ዉርሲዳ ዎዴ ኢያ ታማሬታፍ ኢሶይ፣ «ጎዳው፣ ዮሃኒሲ ባ ታማሬታ ዎሳ ታማርሲዳ ሜላ ኔካ ኑና ዎሳ ታማርሳ» ያገሰ።

2 ዮሱስ፣ «ሃይሳዳ ያገደ ዎሲቴ።

<ሳሎቦን ዴሲያ ኑ አዋው
 ኔ ጊሻ ሱንሳይ አንጄቶ፤
 ኔ ካዎቴሳይ ዮ።
 3 ኑ ጋላሳ ካላ ሃቺ ሃቺ ኑስ ኢማ።
 4 ኑና ቆሄይሳታ ኑኒ አቶ ጌይሳዳ፤
 ኑ ናጋራ አቶ ጋ፤

ፓጩን ኑና ጌልሶፋ) ያጊቴ» ያጊስ።
 5 ካሊዲካ፥ ዮሱሲ ባ ታማሬታኮ ያጊስ፡ «ሌሚሶስ ሂንቴፌ
 ኢሱቀስ ላጌይ ዴዔስ። ኢ ጊዲ ቢላሄ ባ ላጊያ ሶ ቢዲ፥ <ታ
 ላጊያው፥ ሄዙ ሶሎ ታው ታልዓርኪ። 6 ታው ላጌ ጊዲዳ ኢሲ
 አሲ አጌፔ ዩን፥ ኢያው አሲያባ ዳያስ) ያጊኮ፤

7 «ኢያ ላጌይ ኬላ ጊዶን ጊዲዲ፥ <ሃያና ታና ዋይሶፓ፥
 ዉላይ ጎርዴቲስ። ታ ናይቲካ ታራ አርሳ ቦላ ዚንዲዶሶና። ያኒያ
 ጊሾ፥ ዴንዳዳ ኔ ኮያባ ኢማናው ዳንዳዲኬ) ያጊዬ? 8 ታ ሂንቴው
 አዳይስ፤ ላጌቴላ ጊሾ ዴንዲዲ ኢማናው ኮኖና ኢዲኮካ ዎሳን
 ሳሌሲዳ ጊሾ ዴንዲዲ ኮሺያባ ኡባ ኢሜስ።

9 «ሄሳ ጊሾ፥ ታኒ ሂንቴው አዳይስ፤ ዎሲቴ ሂንቴው
 ኢሜታና፤ ኮዩቴ ሂንቴ ዴማና፤ ካሬ ዩዲ ዩጊቴ ሂንቴው
 ዶዩታና። 10 ጋሶይካ ዎሲያ ኡባይ ኤኬስ፤ ኮዩይ ዴሜስ፤ ካሬ
 ዩዲ ዩጌይሳስ ዶዩቴስ።

11 «ሂንቴኖ፥ አዋቶ ሂንቴ ጊዶፌ ናዲ ኡይሲ ዎሲን ሹቹ
 ኢሜይ ኦኔ? ሞሎ ዎሲን ሹሺ ኢሜይ ኦኔ? 12 ዎይኮ ጳጳሌ
 ዎሲኮ ኮርኔ ኢሚ? 13 ሂንቴ ኢታታ ጊዲሼ ሂንቴ ናይታስ ሎዎባ
 ኢሞ ኤሪኮ፥ ሳሎን ዴሲያ ሂንቴ አዋይ ዎሴይሳታስ ጊሻ አያና
 ዋቲ አሲ ኢሜኔ?» ያጊስ።

ዮሱሳኔ ቢዔልዜቡላ

14 ኢሲ ጋላስ ዮሱሲ ዶና ሙሚሲዳ ቱና አያና ኢሲ ኡራፔ
 ኬሲስ። ቱና አያናይ ኬዩዳ ሜላ ሙሜ ኡራይ አዴቲስ።
 አሳይካ ማላሌቲስ። 15 ሺን ኢሶቲ ኢሶቲ፥ «ቱና አያና ሃላቃ፥
 ቢዔልዜቡላ ዎልቃን ቱና አያናታ ኬሴስ» ያጊዶሶና። 16 ሃራቲ
 ቃሲ ፓጩስ ሳሎፔ ማላ ቤሳና ሜላ ኮዩዶሶና።

17 ሺን ዮሱሲ ኤንታ ቆፋ ኤሪዲ ኤንታኮ፥ «ዎሊ ጊዶን
 ሻኬቲያ ካዎቴሲ ኡባይ ዳዩስ፤ ዎሊ ጊዶን ሻኬቲያ ኬሲ
 ኩንዴስ። 18 ሃላሄይ ዎሊ ጊዶን ሻኬቲኮ ኢያ ካዎቴሳይ ዋኒዲ
 ሚኒዲ ኤቃኔ? ሂንቴ ታና፥ <ኢ ቱና አያናታ ቢዔልዜቡላ ዎልቃን
 ኬሴስ) ያጌታ። 19 ሂሃ፥ ታኒ ቱና አያና ቢዔልዜቡላ ዎልቃን
 ኬሲያባ ጊዲኮ ሂንቴ ናይቲ ኦዴ ዎልቃን ኬሶናሻ? ሄሳ ጊሾ፥

11:15 ማቶ 9:34፤ 10:25 11:16 ማቶ 12:38፤ 16:1፤ ማር 8:11

ኤንቲ ሂንቱ ቦላ ፐርዴይሳታ ጊዳና። 20 ሺን ታኒ ቱና አያናታ ሰላ ቢራዴን ኬሲያባ ጊዳኮ ሂዛ ሰላ ካዎቱሳይ ሂንቱኮ ማቲዳይሳ ኤሪቱ።

21 «ሚኖ አሲ ዳንጩቲዲ ባ ኬላ ናጊያባ ጊዳኮ፥ ኢያ ሻሎይ ቦሼቱና። 22 ሃኖሺን፥ ኢያፕ አዲ ሚኖ ጊዳዳ አሲ ዩዲ፥ ኢያ ቆሂዲ ሦኒኮ አማኔቲዲ ዳንጩዳ ዳንጩዎ ቢሊሲዲ፥ ኢያ ሻሎዎ ቦንቂዲ ሃራስ ሻኬስ።

23 «ታራ ጊዳናይሲ ታና ኢዳስ፤ ታራ ሺሾናይሲካ ላሌስ።

24 «ቱና አያናይ አሳፕ ኬዩዳ ዎዴ ሼምፐሶ ስዩዲ ሃሲ ባይናሶራ ዩዩስ። ሼምፐሶ ዳዩዳ ዎዴ (ታ ኬዩዳሱዎ ሲማና) ያጌስ። 25 ኢ ሲሚያ ዎዴ ኬላይ ፐቱቲዲ ሎዲዲ ዴዲሺን ዴሚስ። 26 ሄሳፌ ጉዩ፥ ቢዲ ኢያፕ አዲዲ ኢቲዳ ሃራ ሳፑን ቱና አያናታ ኤኪዲ ዩስ። ኢያን ጌሊዲ ዱሱ አይኬስ። ሄ ኡራስ ኮይሮይሳፌ ጉዩይሲ አዲዲ ኢታ ጊዴስ» ያጌስ።

27 ዩሱሲ ሄሳ አዳ ቦላ ዴዲሺን ኢሲ ማጫሲ አሳ ጋሳፌ ዴንዳዳ፥ ባ ቃላ ዶቁ አሳዳ፥ «ኔና ቶኪዳ ኡሎይኔ ኔኔ ዳሚዳ ዳንሳቲ አንጄቲዶሶና» ያጋሱ።

28 ሺን ኢ፥ «አንጄቲዳይሳቲ ሰላ ቃላ ሲዲዲ ኪቱቱይሳታ» ያጌስ።

ዮናሳ ማላ

29 ዳሮ አሳይ ሺቂዳ ዎዴ ዩሱሲ፥ «ሃ ዩሌቴሳይ ኢታ፤ አራሳ ማላ ኮዩስ። ሺን ዮናሳ ማላታፕ አቲን ሃሪ ኤንታው ኢሜቱና።

30 ዮናሲ ናናዌ አሳስ ማላ ጊዳዳ ሜላ አሳ ናዓይካ ሃ ዩሌቴሳስ ማላ ጊዳና። 31 ዱጌሃ ካዊያ ፐርዳ ጋላስ ሃ ዩሌቴሳራ ዴንዳዳ ፐርዳና። ጋሶይካ፥ ኢያ ሶሎሞኔ ጨንጫቴላ ሲዓናው ቢታ ጋፃፕ ዴንዳዳ ያሱ። ሄኮ ሶሎሞኔፕ አዴይሲ ሃይሳን ዴዴስ 32 ናናዌ አሳቲ ፐርዳ ጋላስ ሃ ዩሌቴሳራ ዴንዳዲ ኤንታ ቦላ ፐርዳና። ጋሶይካ ዮናሳ ሲብካቲያን ማሮታ ጌሊዶሶና። ሄኮ፥ ዮናሳፕ አዴይ ሃይሳን ዴዴስ» ያጌስ።

አሳቴላ ፖዎ

33 «ዎምፕ ዎምፐዲ ቆሳ ቤሳን ዎይኮ አቶ ጊዶን ዎሲያ አሲ ዴና። አሲ ፖዑዎ ቤዓና ሜላ ዶቃ ቤሳን ዎሴስ። 34 ኔ አሳቴላስ ፖዎይ ኔ አይፊያ። ኔ አይፊይ ሎዎ ጊዳኮ፥ ኔ ኩሜላ አሳቴሳይ ፖዴስ። ኔና አይፊይ ሳኪኮ ኔ አሳቴሳይ ኡባይ ዱሜስ። 35 ሄሳ

11:23 ማር 9:40 11:29 ማቶ 16:4፤ ማር 8:12 11:30 ዮሃ 3:4 11:31 1ካዎ 10:1-10፤ 2ታሪ 9:1-12 11:32 ዮሃ 3:5 11:33 ማቶ 5:15፤ ማር 4:21፤ ሉቃ 8:16

ጊሾ፥ ኔ ጋርሳን ዴዲያ ፖሮይ ዱሞና ሜላ ናጌታ። 36 ሂዛ፥ ኔ ኩሜሳ አሳቴሳይ ፖሮ ጊዲኮ፥ ኔ አሳቴሳንካ ሃሪ ዱማ ቤሲ ዳዩኮ፥ ኔ አሳቴሳ ኩሜሳይ ዎሊሌ ፖሮ ሜላ ጊዴስ» ያጊስ።

ኡሱፑን አዩታ

(ማቶ 23:1-36፤ ማር 12:38-40)

37 ዩሱሲ ባ አዳ አንጊዳ ሜላ ኢሲ ፋሪሳዌይ ባራ ካሲ ማና ሜላ ያጊስ። ኢ ኢያራ ኢሲፌ ጌሊዲ ጊቢራ ቦላ ኡቲስ። 38 ፋሪሳዌይ ዩሱሲ ካሲ ማናፕ ሲንፊ ኩሼ ሜጮናይሳ ቤዲዲ ማላሌቲስ።

39 ጎዳይ ኢያኮ፥ «ሂንቴ ፋሪሳዌቲ ቁሊያኔ ሻቲያ ቦላ ባጋ ሜጮታ። ሺን ሂንቴ ጋሳይ ኡዜቴሳኒኔ ኢታቴሳን ኩሚስ።

40 ሂንቴኖ፥ ኤያቶ፥ ካሬ ባጋ ሜዲዳይሲ ጋሳ ሜዲዳይ ኢያ ጊዴኔዩ? 41 ሺን ቁሊያኒኔ ሻቲያን ዴዴይሳ ማንቆታስ ኢሚቱ። ሄ ዎዴ ሂንቴው ኡባባይ ጌሺ ጊዳና።

42 «ፋሪሳዌቶ ሂንቴና አዩ፥ ሳዎፕ፥ ገሎቴፕ፥ ሄሳ ሜላባፕ አስራታ ኬሴታ። ሺን ሂሎቴሲኔ ያሳ ዶሶይ ሂንቴናን ባዎ። ሃራታ አጎና ሃይሳታካ አሳናው ቤሴስ፥ ሺን አጊዴታ።

43 «ፋሪሳዌቶ ሂንቴና አዩ፥ አይሁዴ ዎሳ ኬሳን ቦንቾ አይዴ፥ ጊያ ጊዶን ቦንቾ ሳሮሶ ዶሴታ።

44 «ማላይ ዳዩን አሳይ ኤሮና ቦላራ ቢያ ዱፎ ዳኔይሳቶ ሂንቴና አዩ» ያጊስ።

45 ሂጌ አስታማሬይ ዛሪዲ፥ «አስታማሬያው፥ ኔ ሄሳ ጋሼ ኑና ጫያሳ» ያጊስ።

46 ዩሱሲ፥ «ሂንቴኖ፥ ሂጌ አስታማሬቶ፥ ሂንቴናካ አዩ፥ አሳይ ቶካናው ዳንዳያና ዴዎ ቶሆ ቶሴታ፥ ሺን ሂንቴ ሂንቴ ሁዔስ ሃሪ አቶሺን ቢራዴ ያራንካ ቦቼኬታ።

47 «ሂንቴ አዋቲ ዎዲዳ ናቤታ ዱፋዎ ሂንቴ ጊጊሲያ ጊሾ ሂንቴና አዩ። 48 ሂዛ፥ ሂንቴ አዋታ አሱዎ ሚንሳናው ኤንቲ ዎዲዳ ናቤታ ዱፋዎ ሂንቴ ሎይሲያ ጊሾ ኤንታ ኢታ አሱዋስ ሂንቴ ማርካ። 49 ሄሳ ጊሾ፥ ያሳይ ባ ጩንጫቴሳን፥ <ናቤታኔ ሃዋሬታ ታ ሂንቴው ኪታና፥ ሺን ሂንቴ ባጋታ ዎዳና፤ ሃራታ ጎዳና> ያጊስ። 50 ሄሳ ጊሾ፥ ሃ ዩሌቴሳይ አላሜይ ሜዴቶሳፕ ሃኖ ጋካናው ጉኪዳ ናቤታ ኡባ ሱሳስ አይሼታና። 51 አቤላፕ ዶሚዲ ያርሾ ቤሳሲኔ ያሳ ኬሳፌ ጊዱዋን ጉኪዳ ዛካሪያሳ ሱሳ ጊሾ ሃ ዩሌቴሳይ አይሼታና።

52 «ሂጌ አስታማሬቶ፥ ሂንቴና አዩ፥ ኤራቴሳ ቁልፒያ ሂንቴ ኩሼን አይኪዴታ፥ ሺን ሂንቴው ጌሌኪታ ሃራታካ ጌልሴኪታ።» ያጊስ።

11:42 ሌዌ 27:30 11:51 ሜዴ 4:8፤ 2ታሪ 24:20-21

53 ዮሱስ ያገኘው ባሕርይ ከያዎ ወይም ለሌላ አስተማሪነት ፋሪሳዊት ኢያራ ኤቁቲዲ አይሾን ዋይሶሶና። 54 ኢያ ደናፔ ከያ ቃላን ኢያ አይካናው ኮዬዲ ሄሳ አሲዶሶና።

12

አያና ሚንሴሳ

(ማቶ 10:26-27)

1 ሄ ወይም ዳሮ ሙኩሉን ታይቤቲያ አሳይ ዎሊ ቦላ ዮዴታና ጋካናው አሲ አሳ ቦላ ሸቂዲ ዴዲሺን፣ ዮሱስ ባ ታማሬታኮ፣ «ፋሪሳዊታ ኢርሹዋሬ ናጌቲቴ። ሄሲካ ኤንታ ጩቦቴሳ። 2 ቆንጮና ቆሴቲዲ፣ ኤሬቶና ጌሚዲ አቲያባይ አይኮይካ ባዋ። 3 ሂዛ፣ ሂንቴ ዲማን አዲዳባይ ኡባይ ፖዎን ሲዔታና፣ ቆልዓ ጋላን ካልካሺዳባይ ዳባባን አዴታና።

4 «ታ ባጋቶ፣ ታ አዴይሳ ሲዔቴ፤ አሹዋ ዎዶሶናፔ አቲን ሃራ አይኮካ አሳናው ዳንዳዎናይሳታስ ባቦሬቴ። 5 ሃኖሺን፣ ሂንቴ ባባናው ቤሴይሳ ታ ሂንቴው ቆንጨሳና። ሄሲካ ዎዲዳፔ ጉቱ ጋናማን ዮጋው ዎልቃይ ዴዴይሳስ ኢያው ባቢቴ። ኤ፣ ጉማ ጋይስ፤ ኢያው ባቢቴ። 6 ኢቻሹ ቡቤቲ ኢሲ ሳንቲሜስ ባይዜቶኮናዮ? ሃኖፔ አቲን ኤንታፌ ኢሲናካ ዶሳ ሲንሳን ዶጌቲኩ። 7 ሃራ አቶሺን፣ ሂንቴ ሁዔ ቢናናይካ ፓይዴቲዲ ዴዴስ። ሂዛ፣ ባቦሬቴ፤ ዳሮ ቡቤታፔ ሂንቴ አዴታ።

8 «ታ አዴይሳ ሲዔቴ፤ አሳ ሲንሳን ታው ማርካቲያ ኡባስ አሳ ናዓይ ዶሳ ኪታንቾታ ሲንሳን ማርካታና። 9 አሳ ሲንሳን ታና ካዴይሳስ ዶሳ ኪታንቾታ ሲንሳን ታ ኢያ ካዳና። 10 አሳ ናዓ ቦላ ካዴ ቃላ ሃሳያ ኡባይ ማርታ ዴማና፣ ሺን ጌሻ አያና ቦላ ካዴ ቃላ አዴቴይሲ ማሬቴና።

11 «አሲ ሂንቴና አይኪዲ አይሁዴ ዎሳ ኪሳን፣ ዳይናታ ሲንሳንኒ ካዎታ ሲንሳን ጎሼቺያ ዎዴ አይ አዳኒኮኔ ዎይጊ ዛራኒኮ ሂርጎሬቴ። 12 ሄ ወይም ሂንቴ አዳናባ ጌሻ አያናይ ሂንቴና ታማርሳና» ያጊስ።

ዱሬ ኡራ ኤያቴሳ

13 አሳ ጊዶሬ ኢሲ አሲ ዮሱሳኮ ዮዲ፣ «ታ ኢሻይ ታው ኑ አዋ ላታፔ ሻካና ሜላ ኢያው አዳ» ያጊስ።

14 ዮሱስ ዛራዲ፣ «ላ አዲያው፣ ሂንቴ ቦላ ታና ዳይናኔ ላታ ሻኪያ ጨማ አሲዳይ አኔ?» ያጊስ። 15 ቃሲካ ዮሱሲ፣ «አሳ ዴዎይ

12:1 ማቶ 16:6፣ ማር 8:15 12:2 ማር 4:22፣ ሉቃ 8:17 12:10 ማቶ 12:32፣ ማር 3:29 12:11 ማቶ 10:19-20፣ ማር 13:11፣ ሉቃ 21:14-15

ሻሎ ዳርቴላን ጊዶና ጊሾ ያሬ አጊዲ ሚንሲዲ ሂንቴና ናጊቴ» ያጊስ።

¹⁶ ካሊዲካ ሌሚሶን፣ «ጋዴይ ዳሮ ካሲ ኢሚያ ኢሲ ዱሬ ኡራይ ዴዔስ። ¹⁷ ሄ ኡራይ፣ <ታ ካሳ ታኒ ሺሻናው ቤሲ ጉዲዳ ጊሾ አይ አሰ?> ያጊዲ ባ ዎዛናን ቆፒስ። ¹⁸ ሂዛፕ ያታና፣ ካሴ ዴዲያ ሻሌታ ላላዳ ሃራ ዳልጋ ሻሌታ ኪዓና። ካሳኔ ታው ዴዲያ ቡላ ኢያን ዩጋና። ¹⁹ ባ ሼምፔኮ፣ <ታ ሼምፔቴ፣ ዳሮ ላይሳስ ኔው ጊዲያ ሻሎ ሺሻስ። ሂዛ፣ ሼምፓዳ ማ፣ ኡያ፣ ኡፋይታ> ያጋና።

²⁰ «ሺን ያሳይ፣ <ላ፣ ኤያ አዲያው፣ ሃቺ ቃማ ኔ ሼምፒያ ኔፕ ኤኬታዉሱ። ሂዛ፣ ኔ ሺሺዳባይ አዴስ ጊዳኔ?> ያጊስ።

²¹ «ሄሳ ጊሾ፣ ባው ዱሬቴሲ ሳዓን ሺሺያ አሳስ፣ ያሳ ማታን ዱሬ ጊዶና አሳስ ዉርሴሳይ ሃ ኡራይሳ ሜላ» ያጊስ።

ኡንዔቶሬቴ
(ማቶ 6:25-34)

²² ሄሳፌ ጉዩ፣ ዩሱሲ ባ ታማሬታኮ፣ «ሂዛ፣ ታ አዲያባ ሲዲቴ፣ ሂንቴ ሼምፕሞስ አይ ሚኖ ሂንቴ ቦላስ አይ ማዲኖ ያጊዲ ኡንዔቶሬቴ። ²³ ሼምፓይ ካሳፌ ቦሊ አፊላፕ አዴስ።

²⁴ ካፎታ ቤዲቴ ዜሮኮና፣ ኪሾኮና፣ ኤሌይካ ሻሌይካ ባዎ። ሺን ያሳይ ኤንታና ሙዜስ። ሂንቴ ካፎታፕ ዳሮ አዴታ። ²⁵ ሃኖሺን፣ ሂንቴፌ ኡንዔቲዲ ባ ላይሳ ቦላ ኢሲ ቃማ ጉጃናው ዳንዳዔይ አኔ?

²⁶ ሂዛ፣ ሃ ጉሳባ አሳናው ዳንዳያና ሂንቴ ሃራባስ አይስ ኡንዔቴቲ?

²⁷ አኔ ጨሻቲ ዋኒዲ ዲጨያኮ ቤዲቴ። ዋዮኮናኔ ሱቆኮና። ሃሪ አቶሺን፣ ሶሎሞኔይ ባ ዴዲያ ቦንሾ ኡባን ኤንታፌ ኢሱዋ ሜላካ ማዲቤና። ²⁸ ሂንቴኖ፣ አማኖይ ፓጨዳይሳቶ፣ ሂዛ፣ ያሳይ ሃቺ ቤንቲዲ ዎንቶ ታማን ዩጊታና ጨሻታ ሃይሳዳ ማይዚኮ፣ ሂንቴና ዋቲ አሲ ማይዜኔ?

²⁹ ሄሳ ጊሾ፣ አይ ሚኖ ዎይኮ አይ ኡዩኖ ጊዲ ኡንዔቶሬቴ። ³⁰ ሄ ኡባስ ያሳ አማኖና አሳቲ ኡንዔቶሶና። ሺን ሂንቴ አዋይ ያሳይ ሄሲ ኡባይ ሂንቴው ኮሼይሳ ኤሬስ። ³¹ ኡባፌ አሲዲ ያሳ ካዎቴሳ ኮዩቴ ሄሲ ኡባይ ሂንቴው ጉጂ ኢሜታና።

³² «ሂንቴኖ፣ ጉሳ ዴሬቶ፣ ያዮሬቴ፤ ሂንቴ አዋ ያሳይ ካዎቴሳ ሂንቴው ኢማኖው ኡፋይቴስ። ³³ ሂንቴው ዴዲያባ ባይዚዲ ማንቆታስ ኢሚቴ። ካይሶይ ኤኮናሶን፣ ቢሊ ሞናሶን፣ ጨሞና ካርዲታን፣ ዉሮና ሻሉዋ ሳሉዋን ሺሺቴ። ³⁴ ሂንቴ ዎዛናይ ሂንቴ ሻሎይ ዴዲያሱዋን ጊዳና።

ባርኪዲ ናን

35 «ቃንሳን ዳንጩዲ ጊጌቲቱ፤ ሂንቴ የምጥይ ፖሊዳይሳ ጊዶ። 36 ባንታ ጎዳይ ያጋኖፔ ሲማና ጋካናው ባርኪዲ ናጌይሳታዳ፤ ጎዳይ ዩዲ ያጊያ ዎዴ ኤሌሲዲ ዶያናው ጊጊዳ አሳታ ዳኒቱ። 37 ባንታ ጎዳይ ሲሚያ ዎዴ ዲስኮና ዴዲሼ ናጌይሳቲ አንጄቲዳይሳታ። ቱማ ጋይስ፤ ጎዳይ ቃንሳን ዳንጩዲ ጋይታ ዩሹዋን ኡቲሲዲ ሞኬስ። 38 ጎዳይ ላዴ ጊዲን ጊዲ ቢላሄ ጊዲን ዎይኮ ዎንቲማሴ ጊዲን ዩዲ፤ ሄሳ ሜላ ዲስኮና ናጊሺን ዴሚያ ሄ አይሌቲ አንጄቲዳይሳታ። 39 ሺን ሃይሳ ኤሪቱ፤ ካይሶይ አዉዴ ያኒኮ ኬሳዋይ ኤሪያኮ ኬሳይ ቦኬቲያ ዎዴ ሲዲ ጊዲ ቤዔና። 40 ሂንቴካ ጊጊዲ ናጊቱ፤ አሳ ናዓይ ሂንቴ ቆፖና ዎዴ ያና» ያጊስ።

41 ጴጊሮሲካ፤ «ጎዳው ሃ ሌሚሱዋ ኑ ዓላላስ አዳዩ ዎይኮ አሳ ኡባሴ?» ያጊስ።

42 ጎዳይ ዛሪዲ፤ «ሂዛ፤ ካሳ ሙዛናው ቤሲያ ዎዲያን ኢማና ሜላ ጎዳይ ባ አይሌታ ቦላ ሹሚዳ አማንሴይሲኔ ዎዛናማ ሃላቃይ አኔ? 43 ጎዳይ ሲሚያ ዎዴ ሄሳ ሜላ አሲሼ ቤንቲያ አይሌይ ኢ አንጄቲዳይሳ 44 ታ ሂንቴው ቱማ አዳይስ፤ ባ ጎዳስ ዴዲያ ሻሎ ኡባ ቦላ ኢ ሹሜታና። 45 ሺን ሄ አይሌይ፤ <ታ ጎዳይ ኤሌ ዩና> ያጊዲ ባ ዎዛናን ቆፒዲ፤ ማጫ አይሌታኔ አዴ አይሌታ ዋዲኮ፤ ቃሲ ባው ኮዩዳ ሜላ ሚሼኔ ኡዩሼ ማሶቲኮ፤ 46 ሄ አይሊያ ጎዳይ ኢ ቆፖና ጋላሳኒኔ ሂርጎና ዎዴ ያና። ዩዲ ኢያ ቃንዩሬሲዲ፤ ኢያ ቃዳ አማኖና አሳታራ አላና።

47 «ጎዳ ሼኒያዳ ጊጎናይሲኔ ኢያ ጎዳይ አይ ዶሲያኮ ኤሪሼ አሶና አይሌይ ዳሮ ጋራፌታና። 48 ሺን ባ ጎዳ ሼኒያ ኤሮና አቲዲ ጋራፌታናው ቤሴይሳ አሲዳይ ጉሳራ ጋራፌታና፤ ጋሶይካ ዳሮ ኢሜቲዳይሳፌ ዳሮ ኮዩቱስ፤ ዳሮ ሃዳራ ኤኪዳይሳፌካ ዳሮ ኢማና ጊዲ ናጌቱስ።

ሳሮቱሳስ ጊዶናሺን ሻኬቱሳሳ
(ማቶ 10: 34-36)

49 «ታኒ ዩዳይ ቢታ ቦላ ታማ አይሳናሳ፤ ሃዲ ታማይ አይኪያኮ ታና ዋቲ ኡፋይሳንዴሻ! 50 ሃኖሺን፤ ታ ሃዲ የማቁቲያ ዪንቃቱይ ዴዔስ። ኢ ፖሌታና ጋካናው ታ ዳሮ ኡንዔታይስ። 51 ሳዓ ቦላ ሳሮቱሳ ኤሃናው ዩዳ ሂንቴው ዳኒ? ጊዶና፤ ታ ዩዳይ ሻካናሳ። 52 ሃዲፌ ዶሚዲ ዎሊ ጊዶን ሻኬቲዳ ኢቻሹ ኬሳ አሳቲ ኢሲፌ ዴሶሶና። ናምዓቲ ሄሻታ ቦላ፤ ሄሻቲካ ናምዓታ ቦላ፤ ዴንዲዲ ሻኬቶሶና። 53 አዋይ ናዓ ቦላ፤ ናዓይካ አዋ ቦላ፤ አያ ናዔ ቦላ፤

12:35 ማቶ 25:1-13 12:36 ማር 13:34-36 12:39 ማቶ 24:23-44
12:50 ማር 10:38

ናዲያ አዩ ቦላ፤ አዘና አያ ናዓ ማቼ ቦላ፤ ናዓ ማቼያ አዘና አዩ ቦላ፤ ዴንዲዲ ሻኬታና።»

ላይሳታ ማሎ
(ማቶ 16:2-3)

⁵⁴ ቃሲካ አሳኮ፣ «ዉሎሃ ባጋራ ሳሎይ ሻራቲያ ዎዴ ቤዲዲ፣ ኤሌሲዲ፣ (ኢሪ ያና) ያጌታ፣ ሄሳዳካ ሃኔስ። ⁵⁵ ዱጊሃ ጫርኮይ ጫርኪያ ዎዴ (ሳዓይ አዋና) ያጌታ፣ ሄሳዳካ ሃኔስ» ያጌስ። ⁵⁶ ሂንቴኖ፣ ጩቦቶ፣ ሳሎባኔ ሳዓባ ሻኪ ኤሬታሺን ሃ ዎዲያ ሻኪ ኤርይ ሂንቴና ዋኒዲ ያኒዴ?

⁵⁷ «ያቲን፣ ሂንቴ ሁዔስ አይስ ቱማ ፒርዴኬቲ? ⁵⁸ ኔ ሞርኪያራ ዎላ ዳይና ሲንሳን ኤቃናው ባሼ አጌ ቦላ ጊጋናው ኮያ። ኔ ጊጎና ኢዲኮ ጎሼቺዲ ዳይና ሲንሳ ኔና ኤፋና። ዳይናይ ኔና ፖሊሴስ አሲ ኢማና። ኢ ኔና ዎይኔን ዩጋና። ⁵⁹ ሲዲቱ፣ ኢሲ ባካኒ አቶና ጪጋ አንጋና ጋካናው ኔ ያፔ ኬዮናይሳ ኤራ» ያጌስ።

13

ናጋራፔ ሲሞ

¹ ሄ ዎዴ ዩሱሳኮ አሳይ ዩዲ ጲላዎሲ ዎዲዲ ኤንታ ሱሳራ ኤንታ ያርሹዋ ዋላኪዳ ጋሊላ አሳባ አዲዳ አሳቲ ሄ ቤሳን ዴዎሶና።

² ኢ ሃይሳዳ ያጌዲ ዛሪስ፤ «ያቲን ሄ ጋሊላ አሳቲ ሄ ኢታ ሃይቆ ሃይቂዳ ጊሾ ጋሊላን ዴዲያ አሳ ኡባፌ አዲዳ ናጋራንቾ ዳኖና? ³ ጊዴና! ጊዴሺን፣ ሂንቴካ ማርታን ሲሞና ኢዲኮ፣ ኡባይ ሄሳዳ ዳያና። ⁴ ዎይኮ ቃሲ ሳሊሆሜ ጊያ ቤሳን ጊምቤይ ዎዲዲ ዎዲዳ ታማኔ ሆስፑን አሳይ ዩሩሳላሜን ዴዲያ አሳ ኡባፌ አዲዳ ናጋራንቾ ዳኖና? ⁵ ጊዴና! ሺን ሂንቴካ ማርታን ሲሞና ኢዲኮ ኡባይ ሄሳዳ ዳያና።»

⁶ ቃሲካ ዩሱሲ ሃይሳዳ ጊዲ ሌሚሶ አዲስ፡ «ኢሲ ኡራስ ዎይኔ ጋዴን ቶኬቲዳ ባላሴ ሚሲያ ዴዓዉሱ። ኢ ኢፔ አይፌ ኮዩ ዩዲ አይኮካ ዴሚቤና። ⁷ ጋዲያ ጎዳይ ዎይኔ አሳንቹዋኮ፣ (አይፌ ዴማናው ኮያዳ ሃዙ ላይሲ ሲሜሬታዳ አይኮካ ዴማቢኬ። ሄሳ ጊሾ፣ ቃንፃ ዲጋ፤ አይስ ቤታ ሜሊሳይ?) ያጌስ።

⁸ «ሺን አሳንቾይ፣ (ጎዳው፣ ኢ ዩሹዋ አሳዳ አሻ ዩጋና ጋካናው ሃ ላይሳስ አጋርኪ። ⁹ ሃ ላይሲ አይፊኮ ሎዎ፣ ኢዲኮ ቃንፃ አጋ) » ያጌዲ ዛሪስ።

ዘኮ ኩኒዳ ማጫሲያ ፓፃሱ

10 ዩሱሲ ሳምባታ ጋላስ አይሁዴ ዎሳ ኬሳን ታማርሴስ። 11 ሄ ቤሳን ታማኔ ሆስፑን ላይሴ ቱና አያኒ ዞኮ ኩኒሲዳ ኢሲ ማጫሲያ ዴዓዉሱ። ኢያ ኩናፔ ዴንዶይሳን ሱሬ ኤቃናው ዳንዳዑኩ።
 12 ዩሱሲ ኢዮ ቤዒዳ ዎዴ ዩጊዲ፣ «ሃ ማጫሴቱ፣ ኔ ሃርጊያፊ ፓፃዳሳ» ያጊስ። 13 ባ ኩሺያ ኢ ቦላ ዎሴን፣ ኢያ ሶሁዋራ ሱራዳ ኤቃሱ። ዎሳካ ጋላታሱ።

14 ሺን አይሁዴ ዎሳ ኬሳ ሃላቃይ ዩሎቲዲ አሳኮ፣ «አሶ አሲያ ኡሱፑን ጋላሳቲ ዴዎሶና። ሄሳ ጊሾ፣ ሄ ጋላሳታን ዩዲ ፓፂቴፕ አቲን ሳምባታ ጋላስ ጊዴና» ያጊስ።

15 ጎዳይ፣ «ጩቦቶ፣ ሂንቴ ጊዶፊ ቦሪ ዎይኮ ሃሬ ሳምባታ ጋላስ ዛዳሎፕ ቢሊዲ ሃሴ ኡሻናው ኤፎናይ አኔ? 16 ያቲን፣ ሃ ማጫሲያ አብራሃሜ ናዓ ጊዳሼ ፃላሄን ቃሼታዳ ታማኔ ሆስፑን ላይሴ ኩሜሴ ዴዒዳሪስ ሳምባታ ጋላስ ቢርሼቴሴ ኮሼኔ?» ያጊዲ አይቺስ።

17 ኢ ሄሳ አዲዳ ዎዴ ኤቁቴይሳቲ ኡባይ ዩላቲዶሶና። ሺን አሳ ኡባይ ኢ አሲዳ ማላሊሲያ አሶ ኡባን ኡፋይቲዶሶና።

18 ሄሳፊ ጉዩ፣ ዩሱሲ ሃይሳዳ ያጊስ፣ «ዎሳ ካዎቴሳይ አይ ዳኒ? ኢያ አይቢራ ዳኒሶ? 19 ዎሳ ካዎቴሳይ ኢሲ አሲ ባ ጎሻን ቶኪዳ ዎላ አይፊ ሚላ። ኢ ዲጩዲ ሚሴ ጊዲስ። ሳሎ ካፎቲ ኢያ ታሺያ ቦላ ሽምፕዶሶና።

20 ቃሲ፣ «ዎሳ ካዎቴሳ አይቢራ ዳኒሶ? 21 ኢሲ ማጫሲያ ዳሮ ዲሌራ ዋላካዳ ሙኑቂዳ ጉሳ ኢርሾ ዳኔስ» ያጊስ።

ፁንሳ ዉላ

22 ሄሳፊ ጉዩ፣ ዩሱሲ ዩሩሳላሜ ቢሼ ኢ ካንሴያ አጊያን ዴዒያ ካታማታኒኔ ጉታታን ታማርሲሼ አዲስ። 23 ኢሲ አሲ ዩሱሳኮ፣ «ጎዳው፣ አታናይ ጉሳ አሳ ፃላሌ?» ያጊዲ አይቺስ።

ዩሱሲ ኤንታኮ፣ 24 «ሲዒቴ፣ ፁንሳ ዉላራ ጌላናው ባፃቴቴ። ዳሮቲ ጌላናው ኮዮሶና ሺን ኤንታው ሃኔና። 25 ኬሳዋይ ዴንዲዲ ዉላ ጎርዲዳፕ ጉዩ (ኑስ ዶያርኪ) ያጊሼ ካሬን ኤቂዲ ዩሲ አይኬታ። ሺን ኢ፣ <ሂንቴ አኔኮኔ አዉፕ ዩዳኮ ታ ኤሪኬ> ጊዲ ዛራና። 26 ሄ ዎዴ ሂንቴ፣ <ኔራ ዎላ ሚዳ፣ ኡዩዳ፣ ኑ ዳባባንካ ታማርሳዳሳ> ያጋና።

27 «ኢ ዛሪዲ፣ <ሂንቴ አኔኮኔ አዉፕ ዩዳኮ ኤሪኬ። ሂንቴኖ፣ ጌላቶ ታፕ ሃኪቴ> ያጋና። 28 አብራሃሜ፣ ዩሳቃ፣ ያይቆባኔ ናቤታ ኡባ ዎሳ ካዎቴሳን ቤዓና፣ ሺን ሂንቴ ካሬን ዎዲዲ አቲያ ዎዴ ሂንቴው ዩሆኔ አቼ ጋርጩሴ ጊዳና። 29 አሳይ ዶሎሃፕ፣ ዉሎሃፕ፣ ፑዴሃፕኔ ዱጌሃፕ ዩዲ ዎሳ ካዎቴሳን ጊቢራ ቦላ

13:14 ኬሳ 20:9-10፣ ዛሬ 5:13-14 13:27 ማዘ 6:8

ኡታና። 30 ሄሳ ጊሾ፥ ሃዲ ዴላን ጉዩ ጊዲዳይሳታፕ ሲንጼ ጊዳናይሳቲ፥ ሲንጼ ጊዲዳይሳታፕ ጉዩ ጊዳናይሳቲ ዴዎሶና» ያጊስ።

ዮሱሲ ዮሩሳሌምን ዮኪስ

(ማቶ 23:37-39)

31 ሄ ዎዴ ፋሪሳዌታፕ ኢሶቲ ኢሶቲ ዩዲ፥ «ሄሮዲሲ ኔና ዎዳናው ኮያ ጊሾ ሃ ቤሳፌ ዴንዳዳ ባ ጊዶሶና።

32 ኢ ዛሪዲ፥ «ቢዲ፥ ሄ ዎርካናስ ሄኮ፥ <ሃቺኔ ዎንቶ ቱና አያናታ ኬሳና፥ ሃርጋንቾታ ፓሳና፥ ሄቫንሶ ጋላሳን ኩሻ ቦላ ጋካና) ያጊስ ጊቱ። 33 ሃኖፕ አቲን፥ ናቤይ ዮሩሳሌምፕ ካራን ሃይቃናው ቤሴና። ሄሳ ጊሾ፥ ሃቺ፥ ዎንቶኔ ዎንቲ ፕዲን ሄ ቤሳ ባናው ዴንዳስ።

34 «ዮሩሳሌም፥ ዮሩሳሌም፥ ናቤታ ዎዲያሬ፥ ኔኮ ኪቴቲዳይሳታ ሹቻን ጫዲያሬ፥ ኩቶይ ባ ናይታ ባ ቁፊያፕ ጋርሳን ሺሺያዳ ኔ ናይታ ታ ቁሲያፕ ጋርሳን አፕን ቶሆ ሺሻናው ኮያዲና፥ ሺን ሂንቱ ኢፃስ ጊዴታ። 35 ታ ሂንቱው አዳይስ፤ ሂንቱ ኬሳይ ካይሳታና። ጎዳ ሱንሳን ዮይሲ አንጄቲዳይሳ ሂንቱ ጋና ጋካናው ታና ዴሜኬታ» ያጊስ።

14

ዮሱሲ ፋሪሳዊያ ሶን

1 ኢሲ ሳምባታ ጋላስ ዮሱሲ ኢሲ ፋሪሳዌታ ሃላቃ ሶ ካሲ ማናው ጌሊያ ዎዴ አሳይ ጫዲ ዪሎሶና። 2 ሄ ቤሳን ሻውሄ ሃርጊን ዋዮቲያ ኢሲ አሲ ኢያው ሲንሳ ባጋራ ዚንዲስ። 3 ዮሱሲ ፋሪሳዌታኮኔ ሂን አስታማሬታኮ፥ «ሳምባታ ጋላስ ሃርጋንቾ ፓሶይ ዎንዮ ዎጋ ጊዴኔ?» ያጊዲ አይቺስ። 4 ኤንቲ ሲዲ ጊዶሶና። ዮሱሲ ሃርጊቲያ ኡራ ቦቺ ፓሲዲ ሞይዚስ።

5 «ቃሲካ ሂንቱፌ ኢሱዋስ ናዲ ዎይኮ ቦሪ ሳምባታ ጋላስ አፎን ዉሊኮ ኤሴሲዲ ኬሶናይ ኦኔ?» ያጊዲ አይቺስ። 6 ኤንቲ ኢሲባካ ዛራናው ዳንዳዲቦኮና።

7 ዮሱሲ ኢማቱዋስ ዪንቲዳይሳቲ ቦንቾ ቤሲ ዶሪሺን ቤዲዲ፥ ሃ ሴሚሱዋ አዲስ። 8 «ኢሲ አሲ ኔና ያጋኖ ዪጊኮ ቦንቾ ቤሳን ኡቶፋ። ኔፕ አዲ ቦንቹቲያ አሲ ዪንታናው ዳንዳዲስ። 9 ሂንቱና ናምዓታካ ዪጊዳይሲ ዩዲ፥ <ኔ ቤሳ ሃ ኢማሳስ ዮዳ) ያጊያ ዎዴ ኔኔ ዮላታሼ ዚቃ ቤሲ ዎዳሳ። 10 ጊዶሺን፥ ኔ ዪንቲዳ ዎዴ

13:29 ማቶ 8:11-12፤ 22:13፤ 25:30 13:30 ማቶ 19:30፤ 20:16፤ ማር 10:31 13:35 ማዝ 118:26፤ ኤር 22:5 14:5 ማቶ 12:11 14:8 ሉሚ 25:6-7

ኮይሮታዳ ዜቃ ቤሲ ቤዓዳ ኡታ። ዩጎይሲ ዩዲ፣ <ታ ላጊያው፣ ሃ ቦንሾ ቤሳን ኡታ> ያጋና። ሄ ዎዴ ኔራ ኢሲፌ ዩጌቲዳ አሳ ኡባ ሲንሳን ኔ ቦንቼታና። 11 ባና ጶቁ ጶቁ አሲያ ኡባይ ካወያና፤ ባና ዚቂ ዚቂ አሲያ ኡባይ ጶቁ ጶቁ ጋና።»

12 ቃሲ ዩሱሲ ኢያ ሞኪዳ ኬላ አዋኮ፣ «ቁማ ዎይኮ ካዎ ኢማቶ ዩጊያ ዎዴ ኔኒ ኩሼ ዛሮ ዩጎና ሜላ ኔ ላጌታ ዎይኮ ኔ ኢሻታ ዎይኮ ኔ ዳቦታ ዎይኮ ኔ ዱሬ ሾሮታ ኢማቶ ዩጎ።»
13 ጊዶሺን፣ ኔ ኢማቶ ጊጊሲዳ ዎዴ ማንቆታ፣ ዎቤታ፣ ጉንዳታኔ ቆቁታ ዩጋ፤ ኔኒ አንጄታና። 14 ሃይሳቲ ኩሼ ዛራናው ዳንዳዎና ጊሾ ኩሼ ዛሮይ ጌሻታ ዴንዶ ጋላሳን ኔው ሲማና» ያጊስ።

ጊታ ኢማቱዋ
(ማቶ 22: 1-10)

15 ዩሱሳራ ዎላ ኢማቶ ቦላ ኡቶይሳታ ጊዶፌ ኢሶይ ሄሳ ሲዒዲ፣ «ዎላ ካዎቴላን ኢማቶ ቦላ ኡቴይሲ አንጄቲዳይሳ» ያጊስ።

16 ዩሱሲ፣ «ኢሲ አሲ ጊታ ኢማቶ ጊጊሲዲ ዳሮ አሳታ ዩጊስ።» 17 ኢማቶይ ሞኪቲያ ሳቴይ ጋኪያ ዎዴ ዩጌቲዳ ኢማላታ፣ <ሄኮ ኡባባይ ጊጊስ፣ ሃ ዩቴ> ያጊዲ ዩጋናዳ ባ አይሊያ ኪቲስ።

18 «ሺን ኡባይካ ባንታ ጋሶ ጋሶ ሜዲዶሶና። ኢሶይ፣ <ሃዒ ቡሮ ጋዴ ሻሚዳ ጊሾ ባዳ ቤዓናው ኮሼስ ሃያና ታና አጋርኪ ያጋ> ያጊስ። 19 ሃንኮይ፣ <ኢቻሹ ዋላ ቦሪ ሻማስ ኤንታና ዋፃ ቤዓና ጊሾ ሃያና ታና ላንጮፋ> ያጊስ። 20 ቃሲ ሃራይ፣ <ታኒ ቡሮ ሜዳን ዴዒያ ጊሾ ያናው ዳንዳዒኬ> ያጊስ።

21 «አይሌይ ሲሚ ዩዲ ሄ ኡባ ባ ጎዳስ አዲስ። ሄ ዎዴ ያጋና አዋይ ሃንቁቲዲ አይሊያኮ፣ <ኤሌሳዳ ካታማን ዴዒያ ዎጋ አጌታኔ ዳጋላታ ባዳ፣ ማንቆታ፣ ዎቤታ፣ ቆቁታኔ ጉንዳታ ሃ ኤሃ> ያጊስ።

22 «አይሌይ፣ <ታ ጎዳው፣ ኔ ኪቲዳይሲ ኡባይ ፖሌቲስ፣ ሺን ሃዒካ ቤሲ ዴዒስ> ያጊስ።

23 «ጎዳይ አይሊያኮ፣ <ሆሮጋታ ቦላኔ፣ ጋዴ ጊዶ አጌታ ኬያ፣ ታ ኬላይ ኩማና ጋካናው ዴሚዳ ኡባ ያና ሜላ አላ።» 24 ታ ሂንቴው አዳይስ፤ ኢማቶቲዳይሳታ፤ አኒካ ታ ጊቢራ፤ ሞናይሳ ኤሪቴ» ያጊስ።

ጎዳ ካሎይ ያርሺሲስ

25 ዳሮ አሳይ ኢያራ ዎላ ቢሺን ዩሱሲ ኤንታኮ ጉዩ ሲሚዲ፣
26 «ታኮ ያ ኡባይ ባ አዋኔ ባ አዩው፣ ባ ማቺውኔ ባ ናይታ፣ ባ ኢሻታኔ ባ ሚቼታ፣ ሃሪ አቶሺን ባ ዴዑዋ ኢያናይ ታ ታማሬ

14:11 ማቶ 23:12፣ ሉቃ 18:14

ጊዳናው ዳንዳዔና። 27 ባ ማስቃሊያ ቶኪዲ ታና ካሎናይ ታ ታማሬ ጊዳናው ዳንዳዔና።

28 «ሂንቴፌ ኢሲ አሲ ሹቻ ኬሲ ኬፃናው ኮይኮ፣ ኬሳ ኬፂዲ አንጋናው አይ ሜላ ሚሼ ኮሺያኮ ኮይሮቲዲ ኤራናው ቆፒ ቤዖናይ አኔ? 29 ሄሳ ጊዶና ኢፂኮ፣ ሃ ኡራይ ባሶ ሹቻ ሂፂን ቁስቴሰ ያኒኮ፣ 30 ቤዒያ ኡባይ፣ <ሃ ኡራይ ጊምቤሰ አይኪን ቁስታናው ኢያ ያኒስ> ያጊዲ ቦሮሶና።

31 «ዎይኮ ኢሲ ካዎይ ሃራ ካዎራ አሌታናው ዴንዲሼ ላታሙ ሙኩሉ አላንቸታ ኤኪ ያ ካወዋራ ታሙ ሙኩሉ አላንቸታራ ኤቁታናው ዳንዳዳናይሳኔ ዳንዳዳናይሳ ኡቲዲ ዞሬቶናይ አኔ?

32 ኤቁታናው ዳንዳዳቶናባ ጊዲኮ፣ ሄ ሃራ ካወዋራ ሃሆን ዴዒሺን ጊጋናው ኮይሮቲዲ ጩማ ዩዲዲ አይቼስ። 33 ሄሳዳካ፣ ሂንቴፌ አኒካ ባው ዴዒያባ ኡባ አጎና ኢፂኮ ታ ታማሬ ጊዳናው ዳንዳዔና።

34 «ማፂኔይ ሎዖ፣ ሺን ማፂኔይ ባ ማልዑዋ አጊኮ፣ ዋኒዲ ማፂኔ ጌቱታናው ዳንዳዒ? 35 ቢታቴሳስካ አራዳቴሳስካ ማዶናባ ጊዲያ ጊሾ ዎራ ዩጌቴስ፣ ሂዛ፣ ሲዒያ ሃይሲ ዴዒያ አሲ ሲዖ» ያጊስ።

15

ዳዩዳ ዶርሳ (ማቶ 18:12-14)

1 ኢሲ ጋሳስ ቃራፃ ቃንፂይሳቲኔ ናጋራንቸቲ ዩሱሳ ቲሚርቲያ ሲዓናው ኢያ ዩሹዋን ሺቁዶሶና። 2 ሺን ፋሪሳዌቲኔ ሂጌ አስታማሬቲ፣ «ሃይሲ ኡራይ ናጋራንቸታ ሺሺዲ ኤኬስ፣ ኤንታራ ኢሲፌ ሜስ» ያጊዲ ዙዙሚዶሶና።

3 ዩሱሲ ያጊዲ ሃይሳ ሌሚሶ ኤንታው አዲስ፣ 4 «ሂንቴ ጊዶፌ ኢሱዋስ ፄቱ ዶርሳቲ ዴዒያባ ጊዲኮ ኤንታፌ ኢሶይ ዳዩኮ ኡዱፋን ታማኔ ኡዱፋናታ ባዞን አጊዲ ዳዮይሳ ዴማና ጋካናው ኮዮናይ አኔ? 5 ዴሚዳ ዎዴ ኡፋይቲዲ ባ ጋናን ቶኪዲ፣ 6 ባ ሶ ሲሜስ፣ ባ ላጌታኔ ሾሮታ ኢሲፌ ፀጊዲ፣ <ዳዩዳ ታ ዶርሳ ዴማስ፣ ታራ ኢሲፌ ኡፋይቲቴ> ያጌስ። 7 ሄሳዳካ፣ ማሮቲ ኮሾና ኡዱፋን ታማኔ ኡዱፋን ፂሎታፔ አሲዲ ማሮታን ጌሊያ ኢሲ ናጋራንቸዋ ጋሶን ሳሎን ጊታ ኡፋይሲ ጊዴስ።

8 «ዎይኮ ታሙ ቢሪ ዴዒያ ኢሲ ማጫሲያ ታማፌ ኢሲያ ዳዩኮ ዴማና ጋካናው ያምፔ አይሳዳ ኬሳ ፒታዳ ሚንሳ ኮዮናራ

14:26 ማቶ 10:37 14:27 ማቶ 10:13፣ 16:24፣ ማር 8:34፣ ሉቃ 9:23
15:1 ሉቃ 5:29-30

አኔ? 9 ዴሚዳ ዎዴ ባ ላጌታኔ ባ ሾሮታ ዪጋዳ <ዳዩዳ ታ ኢሲ ቢራ ዴሚዳ ጊሾ ታራ ኡፋይቲቴ> ያጋወሱ። 10 ሲጊቴ፥ ሄሳ ሜላ ኢሲ ማሮቴላን ጌሊያ ናጋራንቹዋን ያሳ ኪታንቾታ ሲንሳን ኡፋይሲ ጊዴስ» ያጊስ።

ዳዩዳ ናዓ

11 ዛሪዲ ዩሱሲ፥ «ኢሲ ኡራስ ናምዑ ናይቲ ዴዎሶና።
12 ኤንታፊ ካሎ ናዓይ ባ አዋኮ፥ <ታ አዋው፥ ኔ ሻሉዋፎ ታ ጊሾዋ ታው ኢማ> ያጊስ። አዋይ ባ ሻሉዋ ባ ናይታስ ሻኪስ።
13 ጉሳ ጋላሳፎ ጉዩ ካሎ ናዓይ ባ ጊሾዋ ኡባ ቃቺ ኤኪዲ ሃዎ ቢታ ቢስ። ያን አልታጫን ሻሉዋ ቶቺዲ አንጊስ። 14 ኢ ባው ዴዲያባ ኡባ ወርሲዳፎ ጉዩ ሄ ቢታ ኡባን ሚኖ ኮሺ ኪዩን ሜቶቲስ። 15 ሄሳ ጊሾ፥ ሄ ቢታ አሳፎ ኢሱዋ ሶ ጋታ ጌሊስ። ኡራይ ኢያ ጉዳንሶ ሄማና ሜላ ባ ሞሳ ዩዲስ። 16 ጉዳንሶቲ ሚያ ሃርቁዎፊ ማናው አዋቲስ፥ ሺን ኢዮካ ኢያው ኢሚያ አሲ ቤንቲቤና። 17 ዎዛኒ ሲሚን፥ <አፎን ታ አዋ አይሌታስ ካሲ ዎራ ዎዲን ታ ሃይሳን ኮሻራ ሃይቃናው ጋካዲና?> 18 ዴንዳዳ ታ አዋኮ ባዳ፥ <ታ አዋው፥ ሳሎን ያሳ፥ ሳዓን ኔና ቆሃስ። 19 ሂዛፎ ኔ ናዓ ጌቲታዳ ዪጌታናው ታው ቤሶና ጊሾ ኔ ሶን ዴዲያ አይሌታፎ ኢሱዋዳ ታና ፓይዳ> ያጋና» ያጊስ። 20 ሄሳ ጊሾ፥ ዴንዲዲ ባ አዋኮ ቢስ።

«ሃኖሺን፥ ኢ ቡሮ ሃዎን ዴዲሺን አዋይ ቃዴቲዲ፥ ኢያኮ ዎዲ ቢዲ ኢዲሚዲ ዩራስ። 21 ናዓይካ፥ <ታ አዋው ሳሎን ያሳ፥ ሳዓን ኔና ታ ቆሃስ። ሂዛፎ ኔ ናዓ ጌቲታዳ ዪጌታናው ቤሲኬ> ያጊስ።

22 «ኢያ አዋይ አይሌታ ዪጊዲ፥ <ኤሌሲዲ ኡባፊ ሎዎ ጊዲዳ ማዎ ኤሂዲ ኢያ ማይዚቴ፤ ኢያ ቢራዴን ሳጋዮ፥ ኢያ ቶሁዋን ጫማ አሲቴ። 23 ሞዶ ጋታርሜንሶ ኤሂዲ ሹኪቴ፥ ሞስ፥ ኡፋይቶስ። 24 ታ ናዓይ ሃይሲ ሃይቂስ፥ ሺን ሃዲ ፓዲስ፤ ዳይስ፥ ሺን ቤንቲስ> ያጊስ። ሄሳፊ ጉዩ፥ ኡፋይቲሌ አይኪዶሶና።

25 «ሄ ዎዴ ባይራ ናዓይ ጎሻ ጋዴን ዴዒስ። ያፎ ዩሺ ሶ ማቲሺን ዩሲኔ ጉፋ ጊርሲ ሲጊስ። 26 ኢ፥ አይሌታፎ ኢሱዋ ዪጊዲ ሃኒያባይ አይቤኮ ኤራናው አይቺስ። 27 አይሌይ፥ <ኔ ኢሻይ ሳሮ ዩዳ ጊሾ ኔ አዋይ ሞዶ ጋታርሜንሶ ኢያው ሹኪስ> ያጊስ።

28 «ባይራ ኢሻይ ዩሎቲዲ ሶ ጌላናወካ ኮዩቤና፥ አዋይ ካሬ ኪዩዲ ሶ ጌላና ሜላ ኢያ ዎሲስ። 29 ሺን ኢ ባ አዋኮ፥ <ሄ፥ ሃይሳ ሜላ ላይሌ ታ ኔው አይሌታዳ ኔ ኪታፎ ኢሱዋካ ፓጨሶና ኔው ኪቴቲን ታ ላጌታራ ኡፋይታና ሜላ ሃሪ አቶሺን ኢሲ ላቃ ዴሺ ኢማባካ። 30 ሃኖሺን፥ ሃይሲ ኔ ናዓይ ኔ ሻሉዋ ላይማታራ ዶሚሲዲ ዩን ሞዶ ጋታርሜንሶ ሹካዳሳ> » ያጊስ።

31 «አዋይካ፥ ለታናወ፥ ነኒ ኡባ ዎዴ ታራ ዴዓሳ፥ ታባይ ኡባይ ነሳ፥ 32 ሃይሲ ኔ ኢሻይ ሃይቂስ፥ ሺን ፓዒስ፤ ዳይስ፥ ሺን ቤንቲስ፥ ሄሳ ጊሾ፥ ዳሮ ኡፋይታናው ቤሴስ) ያጋና» ያጊስ።

16

አማኔቶና ሹማ ሌሚሶ

1 ዩሱሲ ባ ታማሬታኮ፥ «ኢሲ ዱሬ ኡራስ ኢያፔ ጋርሳራ ኢሲ ሹማይ ዴዔስ፥ ሄ ሹማይ ባ ጎዳ ሻሉዋ ቶቼስ ያጊያ ዎሬይ ኬላዋ ጋኪስ። 2 ኬላዋይ ሹማ ያጊሲዲ፥ ለታኔ ዎይጊያባ ሲዓዲና? ሂዛፔ ነኒ ታ ኬላስ ሹማ ጊዳዳ አላናው ዳንዳዎና ጊሾ ታ ሻሉዋ ታው ሹዳ» ያጊስ።

3 «ሄ ሹማይካ ባ ዎዛናን ሃይሳዳ ያጊዲ ቆፐስ፥ ለታ ጎዳይ ታና ሹማቴላፌ ዎላና ሃኔስ፥ ጎያ አቃናው ዎልቂ ባዋ፥ ዎሳ ማናው ዩላዩስ፤ ያቲን ታ ዋና? 4 ሹማቴላፌ ታ ዎዲያ ዎዴ አሳይ ታና ዎዛና ሚላ አላናባ ታ ኤራይስ) ያጊስ።

5 «ሄሳ ጊሾ፥ ኢያ ጎዳ አጮይ ዴዒያ አሳ ኢሱዋ ኢሱዋ ያጊ ኤሂዲ ኮይሮ ኡራኮ፥ ሄ ቦላ ታ ጎዳ አጮይ አይ ሚሊ ዴዒ?» ያጊዲ አይቼስ።

6 «ኢ፥ ላታሙ ባርሜሌ ዛይቴ አጮይ ዴዔስ) ያጊስ።
«ሹማይ፥ ለወሌ ዋርቃቲያ ሄዔ፥ ኤሌሳዳ፥ ታሙ ባርሜሌ ዛይቴ አጮይ ዴዔስ ጋዳ ዓፋ» ያጊስ።

7 «ሄሳፌ ካሊዲ ናምዓንሉዋኮ፥ ሄው አፑኒ ዴዒ?» ያጊስ።
«ኢ፥ ለ370 ኩንታሌ ጊስቴ አጮይ ዴዔስ) ያጊስ።

«ሹማይ፥ ሄ ወሌ ዋርቃቲያ ሄዔ፥ ኤሌሳዳ፥ 296 ኩንታሌ ያጋዳ ዓፋ» ያጊስ። 8 ኬላዋይ አማኔቲቦና ሹማ ኢያ ቢላማቴላስ ናሺስ። ሃ አላሚያ ናይቲ አሴ አይላን ፖዎ ናይታፔ አዲዳ ዎዛናማታ።

9 «ሄሳ ጊሾ፥ ታ ሂንቴው አዳይስ፤ ሃ አላሚያ ሚሼይ ወሪያ ዎዴ ሜሪና ኬላን ሞኬታና ሚላ ሃ ሚሺያራ ሂንቴው ላጊታ ሻሚቴ። 10 ኡባፌ ጉላባን አማኔቲዳይ ዳሮባን አማኔቲዳይሳ ጊዴስ። ቃሲ ኡባፌ ጉላባን አማኔቶናይሲ ዳሮባን አማኔቴና። 11 ሂዛ፥ ሃ አላሚያ ሚሼን ሂንቴ አማኔቶና ኢዒኮ ቱማ ሚሼ ሂንቴው አኒ ሃዳራ ኢማኔ? 12 ሂንቴ ሃራ አሳ ሚሼን አማኔቶና ኢዒኮ፥ ሂንቴ ቡዞ ሚሼ ሂንቴው አኒ ኢማኔ?»

13 «ኢሲ አይሌይ ናምዑ ጎዳታስ ሃራታናው ዳንዳዔና። ኢሱዋ ኢዒኮ ሃንኩዋ ዶሴስ ዎይኮ ኢሱዋኮ ሺቂኮ ሃንኩዋ ካዴስ። ሄሳዳካ፥ ሂንቴ ያሳሲኔ ሚሼስ ሃራታናው ዳንዳዔኬታ።»

14 ሚሹ ደሲያ ፋሪሳዊቲ ሄሳ ሲጊዳ ዎዴ ዩሱሳ ቁልቁሲደሶና። 15 ኢ፥ «ሂንቴ ሂንቴና አሳ ሲንሳን ጊሊሴታ፥ ሺን ዎሳይ ሂንቴ ዎዛና ኤሬስ። አሳ ሲንሳን ቦንቼቲዳይሲ ዎሳ ሲንሳን ቦሬቲዳይሳ።

16 «ሙሴ ሂንይኔ ናቤታ ኪታይ ዮሃንሳ ጋካናው ሂንቴው አዴቲሽ ጋምጊስ። ሄሳፌ ጉዩ፥ ዎሳ ካዎቴሳ ዎንጊሳይ ሳባኬቲሽ ጋምጊስ። አሲ ኡባይ ያ ጌላናው ዳፌቴስ። 17 ጊዶሺን፥ ሂንያፌ ኢሲ ላፋ ፒዳሌይ አታናፔ ሳሎይኔ ሳዓይ አዴይሲ ካወዩስ።

18 «ባ ማቺው ዩዲዲ ሃራ ኤኪያ ኡባይ ላሜስ። ባ አዚናፔ አንጄቲዳሮ ኤኪይሲካ ላሜስ» ያጊስ።

ዱሬ ኡራኔ አላዛራ

19 «አልዎኔ አሌቆ አፊላ ማጊያ፥ ሳጊ ኢንጄቲን ጋላስ ጋላስ ኡፋይሳን ዴጊያ ኢሲ ዱሬ አሲ ዴጌስ። 20 ሃሪ ቃሲ አሳቴሳይ ኩሜሲ ማዱንጊዳ ኢሲ አላዛራ ጌቴቲያ ማንቆይ ሄ ዱሬ ኡራ ካሬን ዩጌቲዲ አቲዳይሲ ዴጌስ። 21 ኮሻፔ ዴንዶይሳን ዱሬ ኡራ ጋይታፔ ዎዲያ ቲሬያ ማናው አሞቲሽ ዴጌስ። ሃሪ አቶሺን፥ ካናቲ ዩዲ ኢያ ማዱንሳ ላጮሶና።

22 «ሄ ማንቆይ ሃይቁስ፤ ኪታንቾቲ ኢያ አብራሃሜ ኪዑዋ ኤፊደሶና። ቃሲ ዱሬ ኡራይካ ሃይቁዲ ሞጌቲስ። 23 ሲዎሌን ኡንጌቲዲ ዴጊሽ ደቁ ጊዲ ሃሆን አብራሃሜኔ ኢያ ኪዎን ዴጊያ አላዛራ ቤጊስ። 24 ኢ፥ «አዋው አብራሃሜ፥ ታው ቃዴታርኪ፤ ሃ ላጮ ታማን ኡንጌታዳ ዴጊያ ጊሾ አላዛሪ ባ ቢራዲያ ሃሳን ዩዲዲ ታ ኢንግርሳ ላኮላና ሜላ ሃያና ኢያ ዩዳርኪ» ያጊዲ ዋሲስ።

25 «ሺን አብራሃሜይ ኢያኮ፥ «ታ ናዓው፥ ኔ ሳዓን ዴጊያ ዎዴ ሎዎባታ ኤኪዳይሳ፥ ቃሲ አላዛሪ ኢታባታ ኤኪዳይሳ አኬካ። ሺን ሃጊ ኢ ሃይሳን ኡፋይቴስ፥ ቃሲ ኔኔ ዋዩታሽ ዴጊሳ» ያጊስ። 26 ሃ ኡባፌ አዲዲ፥ «ሃፔ ሂንቴኮ፥ ሂኒፔ ሃ ኮኮ አዳናው ኮዩይሳቲ ፒኖና ሜላ ኑሲኔ ሂንቴስ ጊዶን ጊታ አፎይ ዴጌስ» ያጊስ።

27 «ዱሬ ኡራይ፥ «አዋው፥ ያኮ አላዛራ ታ አዋ ሶ ኪታና ሜላ ታ ኔና ዎሳይስ። 28 ታው ኢቻሹ ኢሻቲ ዴጊደሶና፥ ኤንቲካ ሃ ዋዩ ቤሳ ዮና ሜላ ኤንታው ቢዲ ማርካቶ» ያጊስ።

29 «ሺን አብራሃሜይ፥ «ኤንታው ሙሴራኔ ናቤታራ ዴዎሶና፤ ኤንቲ ኦዲያባ ሲያና» ያጊስ።

30 «ዱሬ ኡራይ፥ «አዋው አብራሃሜ፥ ሄሳሶ ጊዴና፤ ኢሲ አሲ ሃይቆፔ ዴንዲዲ ቢኮ ኤንቲ ማሮታን ጌላና» ያጊስ።

16:16 ማቶ 11:12-13 16:17 ማቶ 5:18 16:18 ማቶ 5:32፤ 1ቆሮ 7:10-11

31 «አብራሃም፣ ስሙን ናቢታ ሲያናዳ ኢየሱስ፣ ሃሪ አቶሺን ሃይቆፕ ኢሲ አሲ ዴንዲ አዲኮካ አማኖኮና» ያገለገሉ።»

17

አይሺሲያ አዋቴሲ

1 ዮሱስ ላይ ታማሪታት፣ «አሴ ዱቤሲዲ ናጋራን ጌልሲያባይ ዮና አገና፣ ጊደሺን፣ ናጋራን ጌላና ሜላ አሲያ ኡራ አዬ» ያገለገሉ።
2 ሄ ኡራይ ካሎታፕ ኢሱዋ ባሌላናፕ ዎፃ ባ ቆዴን ቃቺዲ አባን ወሊኮ ኢያው ሎዎ። 3 ሄሳ ጊሾ ናጌቲቱ።

«ኔ ኢሻይ ናጋራ አሲኮ ሃንቁታ፤ ቂርቲዲ ማርቴላን ሲሚኮ፣ ኢያው አቶ ያጋ። 4 ኢሲ ጋላሳን ላፕን ቶሆ ቆሂዲ፣ ላፕን ቶሆ፣ <ታኒ ታ ባላ ኤራስ ታና ማራ> ያገለገሉ ኔኮ ዩኮ ኢያው አቶ ጋ።»

5 ሃዋራቴ ጎዳኮ፣ «አማኖ ኑስ ጉጃርኪ» ያገለገሉ።

6 ጎዳይ፣ «ጋሼ አይፌ ሜላ አማኖ ሂንቴው ዴዲኮ <ሃይሳ ዎላ ሾዴታዳ አባ ጊደን ቶኬታ> ያገለገሉ ሂንቴው ኪቴታና» ያገለገሉ።

7 ጉጃዲካ ዮሱስ፣ «ሂንቴ ጊደፌ ኢሱዋስ ጎሻንቾይ ዎይኮ ዶርሴ ሄሚያ አይሌይ ዴዲኮ አሶ ጋዴፕ ዎይኮ ወዴፕ ሶ ሲሚያ ዎዴ <ሌሌ ሃያዳ ካሲ ማናው ኡታ> ያገይ ዴዲ? 8 ዴና፣ <ታው ካሆ ጊጊሳ፤ ታኒ ማዳ፣ ኡያዳ አጋና ጋካናው ኤቃዳ ሙዛ። ሄሳፌ ጉዮ፣ ኔኒ ቃሲ ማሳኔ ኡያሳ> ያገይኔዮ? 9 ሂዛ፣ ጎዳይ፣ አይሌይ ኪታ ፖሊዳ ጊሾ አንጂዮ? 10 ሄሳ ጊሾ፣ ሂንቴካ ኪቴቶይሳ ኡባ ፖሊዳ ዎዴ <ኑ ፓሶና አይሌታ፤ አላናው ቤሲያ አሱዋ ፖሊዳ> ያገለገሉ።»

ባር ሃርጊያፌ ጌዩዳ ታሙ አሳታ

11 ዮሱስ ዮሩሳሌም ቢሼ ሳማሪሲኔ ጋሊላ ቢታስ ጊደራ ካንሲዲ አዲስ። 12 ኢሲ ጉታ ጌሊያ ዎዴ ባር ሃርጊን አይኬቲዳ ታሙ አሳቲ ኢያ ዴሚዶሶና። ኤንቲካ ሃሆን ኤቂዲ፣ 13 «ጎዳ ዮሱሳ፣ ኑስ ቃዴታርኪ» ያገለገሉ ዋሲዶሶና።

14 ኢ ኤንታ ቤዲዳ ዎዴ «ቢዲ ሂንቴናቴላ አይሁዴ ካሂኔ ቤሲቴ» ያገለገሉ። ኤንቲ አጊያ ቦላ ቢሼ ፓጊዶሶና።

15 ኤንታፌ ኢሶይ ባ ፓፁዋ ቤዲዳ ዎዴ ጴቁ ጊዳ ቃላን ያሳ ቦንቺሼ ዮሱሳኮ ሲሚስ። 16 ኢ ሳማሬ ቢታ አሲ፣ ሺን ዮሱሳ ቶሁዋ ቦላ ጉፋኒዲ ኢያ ጋላቲስ።

17 ዮሱስ፣ «ፓዲዳይ ታሙ አሳታ ጊደኮናዮ? ያቲን፣ አዱፋናቲ አው ቢዶና? 18 ሃ አላጋ ኡራፕ * አቲን ሃሪ ሲሚዲ

17:3 ማቶ 18:15 17:14 ሌዌ 14:1-32 * 17:18 ሃ አላጋ ኡራፕ፡ ባር ሃርጊያፌ ፓዲዳ ኡራይ አላጋ ጌቲቲዳይ ኢ አይሁዴ ጊደና ጊሾሳ።

የሳ ጋላቴይ ዴና ጉሴዬ?» ያጊዲ አይቺስ።¹⁹ ኡራኮ፣ «ኔ አማኖይ ኔና ፓሲስ፤ ዴንዳዳ ባ» ያጊስ።

የሳ ካዎቴሳ ዩሳ
(ማቶ 24:23-28፣ 37-41)

²⁰ ፋሪሳዌቲ፣ «የሳ ካዎቴሳይ አዉዴ ያኔ?» ጊዲ ዩሱሳ አይቺዶሶና። ኢ፣ «የሳ ካዎቴሳይ ቤንቲያ ማላን ዩና።²¹ ቃሲካ ኢዮ፣ «ሃኒና ዎይኮ ሃኒና ያጋናው ዳንዳዳና። አይስ ጊኮ፣ የሳ ካዎቴሳይ ሂንቱ ጊዶን ዴዔስ» ያጊዲ ዛሪስ።

²² ዩሱሱ ባ ታማሬታኮ፣ «አሳ ናዓ ጋላሳታፔ ኢሱዋ ቤዓናው ሂንቱ አሞቲያ ዎዴይ ያና፣ ሺን ሂንቱ ቤዔኬታ።²³ አሳይ፣ «ኢ ያን ዴዔስ» ዎይኮ፣ «ሃይሳን ዴዔስ» ያጋና፣ ሺን ኤንታና ካሊዲ ቦፒቱ።²⁴ ዎልዓንሲ ዎልዓሚዲ ሳሉዋ ጋፃፔ ጋፃ ፖዒሲያ ሜላ አሳ ናዓ ዩሳ ጋላሳይ ሄሳዳ ሃናና።²⁵ ሺን ሄሲ ሃናናፔ ሲንሴ አሳ ናዓይ ዳሮ ዋያናውኔ ሃ ዩሉቴሳን ኢዔታናው ቤሴስ።²⁶ ኖሄ ዎዴ ሃኒዳይሳ ሜላ አሳ ናዓ ዎዴያንካ ሄሳዳ ሃናና።²⁷ ኖሄይ ማርካቢያን ጌሊዳ ቃማ ጋካናው አሳይ ሚሼኔ ኡዩሼ፣ ኤኪሼኔ ጌሊሼ ዴዒሺን ዳዮ ሃሳይ ዩዲ ኡባ ዳይሲስ።²⁸ ሎዔ ላይሳንካ ሄሳሶ ሃኒስ፣ አሳይ ሚሼኔ ኡዩሼ፣ ሻሚሼኔ ባይዚሼ፣ ቶኪሼኔ ኬዒሼ፣ ጋምዒዶሶና።²⁹ ሎዔይ ሶዶሜፔ ኬዩዳ ጋላስ ዲኔ ጌቴቲያ ፀጊያባይ ሳሎፔ ቡኪዲ ኡባ ዳይሲስ።³⁰ አሳ ናዓይ ቆንጨያ ዎዴካ ሄሳዳ ሃናና።

³¹ «ሄ ጋላሳን ኦኒካ ካሬን ዴዔይ ኬሳ ጊዶን ዴዒያባ ኤካናው ሶ ጌሎፖ። ሄሳዳካ፣ ጋዴን ዴዒያ አሲ አይኮስካ ሶ ሲሞፎ።

³² ሎዔ ማቺው አኬኪቱ፤³³ ባ ሺምፒው አሻናው ኮያ አሲ ኦኒካ ዳይሳና፤ ባ ሺምፒው አሲ ኢሚያ ኦኒካ ኢ አሻና።

³⁴ ታ ሂንቱው ኦዳይስ፤ ሄ ጋላሳን ናምዑ አሳቲ ኢሲ አርሳን ዚንዓና። ኢሶይ ኤኬታና፣ ሃንኮይ አታና።³⁵ ናምዑ ማጫሳቲ ዎላ ጋጨሺን ኢሲያ ኤኬታና፣ ሃንኪያ አታና።³⁶ ናምዑ አሳቲ ዎላ ጋዴን ጎዩይሳታፔ ኢሶይ ኤኬታና፣ ሃንኮይ አታና»† ያጊስ።

³⁷ ኤንቲ፣ «ጎዳው አው ኤኬታኔ?» ያጊዲ አይቺዶሶና።
ኢ፣ «ባዉቲ ዴዒያ ቤሳን አንኮቲ ሺቆሶና» ያጊስ።

17:26 ሜዴ 6:5-8 17:27 ሜዴ 7:6-24 17:28 ሜዴ 18:20-19:25
17:31 ማቶ 24:17-18፤ ማር 13:15-16 17:32 ሜዴ 19:26 17:33 ማቶ
10:39፤ 16:25፤ ማር 8:35፤ ሉቃ 9:24፤ ዮሃ 12:25 † 17:36 ኢሲ ኢሲ
ማፃታን ፓይዶ 36 ዴና።

18

ሚኒዲ ዎሳና ሜላ ታማርሲስ

¹ ዮሱሲ ባ ታማራታ አዛሎና ኡባ ዎዴ ዎሳና ሜላ ታማርሳናው ኮዪዲ ያጊዲ ሌሚሶ አዲስ፤ ² «ኢሲ ካታማን ዎሳስ ያሼቶና አሳስካ ዮላቶና ኢሲ ዳይኒ ዴዔስ ³ ሄ ካታማን ኢሲ አምዲያ ዳዓውሱ። ኢያካ፥ <ታውኔ ታ ሞርኪያስ ጊዶን ዴዒያ ሞቱዎ ፐርዳ) ያጋዳ ኡባ ዎዴ ሄ ዳይናኮ ሲሜሬታውሱ። ⁴ ዳይናይ ጉሳ ዎዴስ ኢ አዳ ሲያና ኢዲስ፥ ሺን ጉዮፔ ባ ዎዛናን፥ <ታኒ ዎሳስ ያዮና፥ አሳስ ዮላቶና ኢዲኮካ፥ ⁵ ሃ አምዲያ ታና ዎይሲያ ጊሾ ኢው ፐርዳና፤ ያቶና ኢዲኮ ኡባ ዎዴ ያዳ ታና ሳሌላና) ያጊዲ ቆፐስ» ያጊስ።

⁶ ጎዳይካ፥ «ጌላ ዳይናይ ጊዳይሳ ሲዲዴታ፤ ⁷ ዎሳይ ቃማኔ ጋላስ ኢያኮ ዋሲያ ባ ዶሪዳይሳታስ ፐርዴኔዬ? ኤንታና ማዳናው ጋምዲዬ? ⁸ ታ ሂንቴው አዴይሳ ሲዲቴ፥ ኤሌሲዲ ፐርዳና። ጊዶሺን፥ አሳ ናዓይ ያ ዎዴ ሳዓ ባላ አማኖ ዴማንዴሻ?» ያጊስ።

ፋሪሳዊያኔ ቃራግ ቃንጊሴይሳ

⁹ ቃሲ ዛሪዲ፥ ዮሱሲ፥ ባንታና ጊሎ አሳዳ አሲዲ ጩቁቴይሳታሲኔ ሃራታ ካዴይሳታስ ሃይሳዳ ያጊዲ ሌሚሶ አዲስ፤ ¹⁰ «ናምዑ አሳቲ ዎሳናው ዎሳ ኬሲ ቢዶሶና። ኢሶይ ፋሪሳዌ ሃንኮይ ቃሲ ቃራግ ቃንጊሴያ አሲ። ¹¹ ፋሪሳዌይ ኤቂዲ ባው ዎሲሼ፥ <ዎሳው ታኒ ሃራታ ሜላ ባንቃንቾ፥ ጌላኔ ሳይማቲያ አሲ፥ አዲዳ ቃሲ ሃ ቃራግ ቃንጊሴያ ኡራ ሜላ ጊዶና ጊሾ ኔና ጋላታይስ። ¹² ሳሚንታፌ ናምዑ ቶሆ ዎማይስ፥ ታ ዴሚያባ ኡባፌ አሲራታ ኬሳይስ» ያጊስ።

¹³ «ሺን ቃራግ ቃንጊሴይሲ ቃሲ ሃሆን ኤቂዲ ሃሪ አቶሺን ሳሎ ዶቁ ጊዲ ዌላናውካ ያዪዲ ባ ቲራ ኢጪሼ <ዎሳው፥ ታና ናጋራንቹዎ ማራርኪ) ጊዲ ዎሲስ። ¹⁴ ታ ሂንቴው አዴይሳ ሲዲቴ፤ ፋሪሳዊያኔ ሃይሲ ቃራግ ቃንጊሴይሲ ዎሳ ሲንሳን ጊሎ ጊዲዲ ባ ሶ ሲሚስ። አይስ ጊኮ፥ ባና ዶቁ ዶቁ አሲያ አሲ ካውያና፥ ባና ካውሺያ አሲ ዶቁ ዶቁ ጋና» ያጊስ።

ዮሱሳኔ ዮጋ ናይታ

(ማቶ 19:13-30፤ ማር 10:13-31)

¹⁵ ዮሱሲ ዮጋ ናይታ ቦላ ባ ኩሺያ ዎሲዲ አንጃና ሜላ አሳይ ኢያኮ ኤሆሶና። ዮሱሳ ታማራቲ ሄሳ ቤዒዲ አይስ ዮሱሳኮ ኤሄቲ ያጊዲ ካጪዶሶና። ¹⁶ ሺን ዮሱሲ ናይታ ባኮ ዌጊዲ፥ «ዮጋ ናይቲ ታኮ ያናይሳ ዲጎሬቴ፤ ዮ ጊቴ። አይስ ጊኮ፥ ዎሳ ካዎቴሳይ

18:14 ማቶ 23:12፤ ሉቃ 14:11

ኤንታዳ ሃኒዳይሳታሳ። 17 ታኒ ሂንቴው ቱማ አዳይስ፤ ሦሳ ካዎቴላ ሉጋ ናይታሶ ኤኮናይ አኒካ ያ ጌሌና» ያጊስ።

ዱሬ ኡራ አይሻ
(ማቶ 19:16-30፤ ማር 10:17-31)

18 አይሁዴ ሃላቃታፕ ኢሶይ፥ «ኬሃ አስታማሪያው፥ ሜሪና ዴውዋ ዴማናው አይ አሶ?» ያጊዲ አይቺስ።

19 ዩሱሲ ኢያኮ፥ «አይስ ታና ኬሃው ያጋዳ ዪጋይ? ኢሲ ሦሳፌ አቲን ሃሪ ኬሂ ባዋ። 20 ላሞፋ፥ ዎጲፓ፥ ካይሶቶፓ፥ ዎርዶ ማርካቶፋ፥ ኔ አዋኔ ኔ አዩው ቦንቻ ያጊያ ኪታ ኤራይ» ያጊዲ አይቺስ።

21 ኡራይካ፥ «ሄሳታ ኡባ ታኒ ናዓቴላፌ ዶማዳ ናጋሼ ጋምዓስ» ያጊስ።

22 ዩሱሲ ሄሳ ሲዲዳ ዎዴ «ሂዛ፥ ኔው ኢሲባይ ፓጩስ፤ ኔው ዴዲያባ ኡባ ባይዛዳ ማንቆታስ ኢማ፤ ሳሎን ኔና ሻሎይ ናጌስ። ያታ ሲማዳ ታና ካላ» ያጊስ። 23 ሺን ኡራይ ሄሳ ሲዲዳ ዎዴ ኢያው ዳሮ ሻሎይ ዴዲያ ጊሾ ዳሮ ቁሮቲስ።

24 ዩሱሲ ኡራ ቤዲዲ፥ «ዱሬ አሳስ ሦሳ ካዎቴላ ጌሎይ ዋኒዲ ኡንዓንዴሻ? 25 ዱሬይ ሦሳ ካዎቴላ ጌላያይሳፌ ጊማሌይ ናርፕ ሉሆራ ካንሴይሲ ካውዩስ» ያጊስ።

26 ሄሳ ሲዲዳ አሳይ፥ «ሄሳ ጊዲኮ አኒ አታኔ?» ያጊዶሶና።

27 ዩሱሲ፥ «አሳስ ዳንዳዔቶናባይ ሦሳስ ዳንዳዔቴስ» ያጊስ።

28 ጴጊሮሲ፥ «ሄኮ ኑኒ ኑባ ኡባ አጊዲ ኔና ካሊዳ» ያጊስ።

29 «ዩሱሲ ቱማ ታ ሂንቴው አዳይስ፤ ሦሳ ካዎቴላስ ጊዲ ባ ኬላ ዎይኮ ባ ማቺው ዎይኮ ባ ኢሻታ ዎይኮ ባ አዋኔ ባ አዩው ዎይኮ ባ ናይታ አጊዳይ፤ 30 ሃ ዎዲያን ዳኮ ዳሮ፥ ያና አላሚያን ሜሪና ዴውዋ ኤኮናይ አኒካ ባዋ» ያጊስ።

ዩሱሲ ባ ሃይቁዋባ ዛሪ አዲስ
(ማቶ 20:17-19፤ ማር 10:32-34)

31 ዩሱሲ ታማኔ ናምዓታ ባኮ ያጊዲ፥ «አኔ ዩሩሳላሜ ቦስ፥ ናቤቲ አሳ ናዓባ ዓፌዳባ ኡባይ ያን ፖሌታና። 32 ኢ አይሁዴ ጊዶና አሳስ አዲዲ ኢሜታና፥ ኤንቲ ኢያ ቶቻና፥ ጫያናኔ ኢያ ቦላ ጩታና። 33 ኢያ ጋራፊዳፕ ጉዩ ዎዳና፥ ሺን ሄሻንሶ ጋላሳን ኢ ሃይቆፕ ዴንዳና» ያጊስ።

34 ሺን ኢያ ታማሬቲ ሄሳ ኡባፌ ኢሲባካ አኬኪቦኮና፥ ኢያ ፁራይ ኤንታው ቆሴቲዳ ጊሾ ኢ ዎይጊዳኮ ኤሪቦኮና።

ቆቄ ኡራይ ያሊስ
(ማቶ 20:29-34፤ ማር 10:46-52)

35 ዩሱሲ ኢየርሱ ማታቲያ ዎዴ ኢሲ ቆቄ ኡራይ አጌ ጋፃን ኡቲዲ ዎሴስ። 36 ቆቄ ኡራይ አሳይ ሄ ቤሳራ አዲሺን ሲዲዲ፥ «ኢ አይቤ?» ጊዲ አይቺስ። 37 ኤንቲ፥ «ናዚሬቴ ዩሱሲ ሃይሳራ አዲስ» ያጊዶሶና።

38 ኢ፥ «ዳዊቴ ናዓው፥ ዩሱሳ፥ ታና ማራርኪ» ያጊዲ ዋሲስ።

39 ሲንጤ ሲንጤ ቢያ አሳቲ፥ «ሲዲ ጋ» ጊዲ ሃንቁቲዶሶና። ሺን ኢ፥ «ዳዊቴ ናዓው፥ ታና ማራ» ያጊዲ ዳርሲ ዋሲስ።

40 ዩሱሲ ኤቁዲ ኡራ ባኮ ኤሃና ሜላ ኪቲስ። ኡራይካ፥ ኢያኮ ሺቂን። 41 «ታ ኔው አይ አላና ሜላ ኮያይ?» ያጊዲ አይቺስ።

ቆቄይ፥ «ጎዳው ታ ያላናው ኮያይስ» ያጊስ።

42 ዩሱሲ፥ «ያላ፥ ኔ አማኖይ ኔና ፓሲስ» ያጊስ። 43 ኡራይ ሶሁዋራ ያሊ አጊስ። ያሳ ቦንቺሼ ዩሱሳ ካሊስ። አሳ ኡባይ ሄሳ ቤዲዲ ያሳ ጋላቲዶሶና።

19

ቃራፃ ቃንጊሲያ ዛኪዮሳ

1 ዩሱሲ ኢየርሱ ጌሊዲ አዲስ። 2 ያን ዛኪዮሳ ጌቴቲያ ቃራፃ ቃንጊሲይሳታ ሃላቃይ ዴዒስ። ኢ ዳር ዱሬ። 3 ኢ ዩሱሲ አኔኮ ቤዓናው ኮዩስ። ኢ ቃንሳ ጊዲያ ጊሾ አሳ ዳርቴሳፌ ዴንዶይሳን ዩሱሳ ቤዓናው ዳንዳዲቤና። 4 ዩሱሳ ቤዓናው ኮዩዲ ኢ ቢያ አጊያስ ሲንጤ ዎዲ ቢዲ ኢሲ ቦባ ሚሳ ቦላ ኪዩስ።

5 ዩሱሲ ሄ ቤሳ ጋኪሼ ዶቁ ጊዲ ቤዲዲ፥ «ዛኪዮሳ፥ ሃቺ ታ ኔ ሶን ፔዓናው ቤሲያ ጊሾ ኤሌ ዎዳ» ያጊስ። 6 ኢ ኤሌሲ ዎዲዲ ኡፋይሳን ዩሱሳ ሞኪስ።

7 ሄ ቤሳን ዴዲያ አሳ ኡባይ ሄሳ ቤዲዲ፥ «ናጋራንቹዋ ሶ ጌሊዲ ሞኪታንው ሃኔስ» ያጊዲ ዙዙሚዶሶና። 8 ጊዶሺን፥ ዛኪዮሲ ኤቁዲ ጎዳኮ፥ «ጎዳው፥ ሄኮ ታው ዴዲያ ሻሎ ኡባፌ ባጋ ማንቆታስ ኢማና፥ አሳፔ አይባካ ዎርዶን ባሌላዳ ኤኪዳባ ጊዲኮ አይዱ ኩሼ ዛራና» ያጊስ።

9 ዩሱሲ ቃሲ፥ «ሃ ኡራይ አብራሃሜ ናዓ ጊዲዳ ጊሾ ሃቺ አቶቴሳይ ሃ ሶ ዩስ። 10 አሳ ናዓይ ዩዳይ ዳዩዳይሳ ኮያናሳኔ አሻናሳ» ያጊስ።

ታው ሚናኔታ ሌሚሱዋ
(ማቶ 25:14-30)

11 አሳይ ሄሳ ሲጊያ ዎዴ ዮሱሲ ዮሩሳላሜ ማታቲዳ ጊሾኔ ያሳ ካዎቴሳይ ሃሲ ማታራ ቆንጫና ዳኒዳ ጊሾ ኤንታው ሌሚሶ አዲስ።

12 ሄሳ ጊሾ፣ ዮሱሲ፣ «ኢሲ ጊታ አሲ ዴዔይሲ ባው ካዎቴሳ ኤኪዲ ያናው ሃራ ቢታ ቢስ። 13 ኢያው አሲያ አይሌታፔ ታማታ ዩጊዲ ኢሱዋስ ኢሱዋስ ታሙ ሚናኔ * ኢሚዲ <ታ ሲማዳ ያና ጋካናው ሃ ሚሺያራ ዛልዲቴ» ያጊስ።

14 «ሄ ቢታ አሳይ ኢያ ኢጊያ ጊሾ ሃ ኡራይ ኑ ቦላ ካዎታና ሜላ ኑ ኮዮኮ ያጊዲ አሴ ኢያ ጉዮራ ኪቲዶሶና።

15 «ጊዶሺን፣ ሄ ኡራይ ካዎ ጊዲዲ ባ ቢታ ሲሚስ። ሄ ታሙ አይሌቲ ኢ ኢሚዳ ሚሺያን አይ ሜላ ዛልዲዲ ዎዲሲዳኮ ኤራናው ኮዩዲ ኤንታና ዩጊሲስ።

16 «ኮይሮይሲ ዩዲ፣ <ጎዳው፣ ኔ ታው ኢሚዳ ሚሼይ ሃራ ታማ ዎዲስ» ያጊስ።

17 «ኢያ ጎዳይ፣ <ኔኖ አማኔቲዳ አይሊያው ሎዎ አሳዳሳ፣ ኔኒ ጉሳባን አማኔቲዳ ጊሾ ኔው ታሙ ካታማታ ቦላ ማታ ኢማስ» ያጊስ።

18 «ናምዓንሶይካ ዩዲ፣ <ጎዳው፣ ኔ ታው ኢሚዳ ሚሼይ ሃራ ኢቻሻ ዎዲስ» ያጊስ።

19 «ጎዳይ ኢያኮ፣ <ኔዉካ ቃሲ ኢቻሹ ካታማታ ቦላ ማታ ኢማስ» ያጊስ።

20 «ሄኮ ሄሻንሶይ ዩዲ፣ <ጎዳው፣ ታ ጩርቃን 99ዳ ናጊዳ ኔ ሚሺያ ሃናሹ። 21 አይስ ጊኮ፣ ኔኒ ኔባ ጊዶናባ ኤኬይሳኔ ኔ ዜሮናባ ቡጪያ ኢታ አሲ ጊዲያ ጊሾ ኔው ያያስ» ያጊስ።

22 «ኢያ ጎዳይ ዛሪዲ፣ <ኔኖ ኢታ አይሊያው ኔ ዶናሶ ታ ኔና ፐርዳና። ታ ዎሶናባ ኤኬይሳኔ ዜሮናባ ቡጪያ አሲ ጊዴይሳ ኔ ኤሪኮ፣ 23 ታ ያዳ ታ ሚሺያ ዎዴራ ኤካና ሜላ ዛልዲያ አሳስ አይስ ኢማቢኪ?»

24 «ኢያ ጎዳይ ሄ ቤሳን ኤቂዳይሳታኮ፣ <ኢያራ ዴዒያ ሚሺያ ኤኪዲ ታማ ዎዲሲዳይሳስ ኢሚቴ» ያጊስ።

25 «ኤንቲ፣ <ጎዳው፣ ኢያው ካሴካ ታሙ ሚናኔይ ዴዔስ» ያጊዶሶና።

26 «ጎዳይ፣ ታ ሂንቴው አዳይስ፤ <ዴዒያ ኡባስ ሃራ ጉገፔታና፣ ሺን ባይናይሳፌ ሃራይ አቶ ኢያው ዴዒያራካ ኤኬታና።

27 ጊዶሺን፣ ታ ኤንታ ቦላ ካዎቶና ሜላ ኮዩዳይሳታ ሄ ታ ሞርኬታ ሃ ታ ሲንሴ ኤሂዲ ጎይራቴ» ጊስ» ያጊስ።

19:11 ማቶ 25:14-30 * 19:13 ሚናኔ፣ ሚናኔይ ጊሪኬ ዶና፣ ኢሲ ሚናኔይ ኢሲ ጋላሳ አሳንቸስ ሄሹ አገና ዳሞዜ ጊዴስ። 19:26 ማቶ 13:12፣ ማር 4:25፣ ሉቃ 8:18 19:27 ማቶ 25:14-30

ዮሴፊ ጌታ በንቾን ዮሩሳላሜ ጌሊስ
(ማጥ 21:1-11፤ ማር 11:1-11፤ ዮሃ 12:12-19)

28 ዮሴፊ ሄሳ አዲዳይሳፌ ጉዩ ኤንታፌ ሲንሴ አዲ ሃሙተዲ ዮሩሳላሜ ቢስ። 29 ሻማሆ ዴሪያ † ቦላ ዴዲያ ቤቴፋጌኔ ቢታኒያ ማታቲዳ ዎዴ ባ ታማሬታፔ ናምዓታ ያጊዲ ኪቲስ። 30 «ሂንቴ ሲንሳን ዴዲያ ጉታ ቢቴ፥ ሂንቴ ያ ጋኪያ ዎዴ አኒካ ቶጎና ቃሼቲዲ ዴዲያ ሃሬ ማሪ ዴማና። ኢያ ቢሊዲ ሃ ኤኪ ዩቴ። 31 አኒካ፥ <አይስ ቢሌቲ?> ጊዲ አይቺኮ፥ <ጎዳይ ኢያ ኮዩስ> ያጊቴ» ያጊስ።

32 ኪቴቲዳይሳቲ ቢዲ ኢ ጊዳይሳዳ ሃኒን ቤዲዶሶና። 33 ኤንቲ ሃሬ ማሪ ቢሊሺን ጎዳቲ ቤዲዲ፥ «ሃሬ ማሪ አይስ ቢሌቲ?» ያጊዶሶና።

34 ኤንቲ ዛሪዲ፥ «ጎዳይ ኢያ ኮዩስ» ያጊዶሶና።

35 ያፔ ሃሬ ማሪ ዮሴሳኮ ኤሂዶሶና። ባንታ ማዑዋ ሃሬ ማሪ ዘኮን ዩጊዲ ዮሴሳ ሃሬ ማሪ ቦላ ኡቲሲዶሶና። 36 አሳይካ ኢ ቢያ አጊያ ቦላ ባንታ ማዑዋ ሂዲዶሶና።

37 ሻማሆ ዴሪያ ዱጊሳ ዎዲሲያ አጊያኮ ማቲያ ዎዴ ታይቦን ኪሂ ዳሮ አሳይ ኤንቲ ቤዲዳ ማላሲሲያባን ኡፋይቲዲ ባንታ ቃላ ጵቁ አሲዲ።

38 «ጎዳ ሱንሳን ያ ካዎይ አንጄቲዳይሳ ሳሉዋን ሳሮይ

ኡባፌ ጵቃ ሳሉዋን በንቾይ ያሳስ ጊዶ።»

ያጊዲ ያሳ ጋላቲዶሶና።

39 አሳ ጊዶፌ ኢሲ ኢሲ ፋሪሳዌቲ ዮሴሳኮ፥ «አስታማሪያው፥ ኔ ታማሬታ ሃይዚቴ ጋዳ ሃንቁታ» ያጊዶሶና።

40 ኢ ኤንታኮ፥ «ኤንቲ ሲዲ ጊኮ ሹቻቲ ዋሳና» ያጊስ።

41 ዮሴፊ ዮሩሳላሜ ማቲሼ ካታማ ቤዲዲ ኢያው ዩኪስ።

42 «ኔው ሳሮ ጊዳናይሳ ሃቺ ኔ ኤሪዳባ ጊዲያኮሺን፥ ሃዲ ኔ አይፊያፔ ጌሚስ። 43 ኔ ሞርኬቲ ኔ ዩሹዋ ዲሪዲ ዱማ ዱማ አጊያራ ኔና ቴቂዲ ኡንዔሲያ ዎዴይ ያና። 44 ኔና ኔ ዲርሳ ጋርሳን ዴዲያ ኔ ናይታ ዳይሳና። ኢሲ ኢሲ ሹቹ ዴንሲዲ ሳላና፥ አይስ ጊኮ ያሳይ ኔና አሻናው ያ ዎዲያ ኤራባካ» ያጊዲ ኢው ዩኪስ።

† 19:29 ሻማሆ ዴሪያ፡ ሻማሆይ ዳሮ ዶሊያ ዴሬ ጉሱ። 19:38 ማዘ 118:26

45 ሄሳፌ ጉዮ፥ ዮሱሲ ያሳ ኬሲ ጌሊዲ ዛልዔይሳታ ያፔ ጎዲስ።
 46 ቃሲ፥ «‹ታ ኬሳይ ያሳ ዎሲያ ኬሲ ጊዳና› ጊዲ ፃፌቲስ፥ ሺን ሂንቴ ታ ኬሳ ፓንጋታ ጎንጎሎ አሲዴታ» ያጊስ።
 47 ጋላስ ጋላስ ያሳ ኬሳን ታማርሴስ። ካሂኔታ ሃላቃቲ፥ ሂጌ አስታማሬቲኔ ዴሪያ ጨማቲ ኢያ ዎዳናው አጌ ኮዮሶና።
 48 ጊዶሺን፥ አሳ ኡባይ ኢያ ቲሚርቲያ ባንታ ዎዛና ዮጊዲ ሲዒያ ጊሾ ኤንታው አላናባይ ዳይስ።

20

ዮሱሳ ማታይ አይሁዴታስ አይሾ ጊዲስ (ማቶ 21:23-27፤ ማር 11:27-33)

1 ኢሲ ጋላስ ዮሱሲ ያሳ ኬሳን አሳ ታማርሲሺኒኔ ዎንጌላ ማርካቲሺን፥ ካሂኔ ሃላቃቲ፥ ሂጌ አስታማሬቲኔ ዴሪያ ጨማቲ ኢሲፌ ኢያኮ ዩዲ፥ 2 «ኔኒ ሃይሳታ አይቢ ማታን አሲያኮ ኑስ አዳ። ሃ ማታ ኔው ኢሚዳይ ኦኔ?» ያጊዲ አይቺዶሶና።
 3 ኢ ኤንታኮ፥ «ታካ ሂንቴና ኢሲባ አይቻና፥ አኔ ታው ዛሪቴ።
 4 ፃማቂያ ዮሃኒሳ ፃንቃቴይ ያሳፌዮ አሳፔ?» ያጊስ።
 5 ኤንቲ ዎሊ ጊዶን ያጊዲ ዞሬቲዶሶና፥ «ያሳፌ ጊኮ ያቲን፥ አይስ አማኒቤኬቲ?» ያጋና።
 6 «አሳፔ ጊኮ፥ አሳ ኡባይ ዮሃኒሲ ናቤ ጊዴይሳ አማኒያ ጊሾ ኑና ሹቻን ጫዳና።»
 7 ያኒያ ጊሾ፥ «አጤፔኮ ኑ ኤሮኮ» ያጊዲ ዛሪዶሶና።
 8 ዮሱሲ ዛሪዲ፥ «ሂዛ፥ ታካ አይ ማታን ሃይሳታ አሲያኮ ሂንቴው አዲኬ» ያጊስ።

ጎሻንቾታ ሌሚሱዋ (ማቶ 21:33-46፤ ማር 12:1-12)

9 ሄሳፌ ጉዮ፥ ዮሱሲ ያጊዲ ሃ ሌሚሱዋ አሳስ አዲስ፥ «ኢሲ አሲ ዎይኔ ቶኪስ፥ ጎሻንቾታስ ኬራ ኢሚዲ ዳር ዎዴ ጋምዒዲ ያናው ሃራ ቢታ ቢስ። 10 ዎይኔ አይፊያ ማፂያ ዎዴይ ጋኪን ዎይኒያ አይፊያፔ ኢያው ዮዳና ሜላ ጎሻንቾታኮ ባ አይሊያ ኪቲስ። ሺን ጎሻንቾቲ ሄ አይሊያ አይኪዲ ዋዲዲ ሜላ ኩሼ ዮዲዶሶና። 11 ካሊዲካ ሃራ አይሊያ ኪቲስ። ቃሲ ጎሻንቾቲ ኢያ ዋዲዲ፥ ካወሺዲ ሜላ ኩሼ ዮዲዶሶና። 12 ሃሊካ ዛሪዲ ሄቫንሶ አይሊያ ኪቲስ። ጎሻንቾቲ ኢያካ ማዱንፂሲዲ ዎይኒያ ጊዶፌ ጋፃ ኬሲዲ ዮጊዶሶና።»

13 «ዎይኒያ ጎዳይ፥ <ያቲን ታ አይ አሶ? አኔ ቃሲ ታ ዶሲያ ታ ናዓ ዩዳና፤ አኔ ኤሪ ኤንቲ ኢያ ቦንቾና አጎኮና> ያጊስ።

14 «ሺን ጎሻንቾቲ ኡራ ናዓ ቤዒዳ ዎዴ <ሃይሲ ኢያ ላቴይሳ፥ ሃ ዩቴ ኢያ ዎዳና፥ ያቲኮ ላታይ ኑስ ጊዳና> ያጊዲ ዞሬቲዶሶና።

15 ዎይኒያ ጊዶፌ ጋፃ ኬሲዲ ዎዲዶሶና።

«ያቲን፥ ዎይኒያ ጎዳይ ሄ አሳታ ዋታኔ? 16 ዩዲ ሄ ጎሻንቾታ ዳይሳና፥ ዎይኒያ ቤሳ ሃራ አሳታስ ኢጣና። አሳይ ሄሳ ሲዒዳ ዎዴ <ሺንቻሌ ሄሳ ሜላባ ኤሆፖ> ያጊዶሶና።

17 ዩሱሲ ኤንታ ጫዲ ዩሊዲ፥

«ያቲን <ጊምቤ ኬዒያ አሳቲ ቦሪዳ ሹቻይ፥

ኬሳስ ማላኔ ሚኖቴሲ ኢሚያ ኡባፌ አዲያ ሹቺ ጊዲስ> ጌቴቲዲ ሃፌቲዳይሳ ቢርሼሳይ አይቤ? 18 ሄ ሹቻ ቦላ ኩንዲያ ኡባይ ቆዩታና፥ ሹቻይ ኢያ ቦላ ዎዲያ ኡባይ ሊቃና» ያጊስ።

19 ሂጌ አስታማሬቲኔ ካሂኔ ሃላቃቲ ሃ ሌሚሶይ አዴቲዳይ ኤንታ ቦላ ጊዴይሳ ኤሪዲ ሄ ዎዴ ኢያ አይካናው ኮዩዶሶና፥ ሺን አሳስ ባቢዶሶና።

ጊራባ

(ማቶ 22:15-22፤ ማር 12:13-17)

20 ሄሳ ጊሾ፥ ዩሱሳ ዴሪያ ሃሪያ ሮሜ ካዉዋ ማታስ አሲ ኢጣናው ኮዩዲ ኢያ ዶናፕ ባላ ቃላ ናጎሶና። ሄሳ ፖሊሳናው ዩሎ ዳኒዲ ጨሚያ አሳታ ኢያኮ ኪቲዶሶና። 21 ኪቴቲዲ ቤዳ አሳቲ፥ «አስታማሪያው፥ ኔኒ አዴይሲኔ ታማርሴይሲ ሊኬ ጊዴይሳ፥ ቃሲ ያሳ አጊያ ቱማቴሳን ታማርሴይሳኔ አናካ ሻኮናይሳ ኑ ኤሮስ። 22 ሃኖሺን፥ ሮሜ ካዉዋስ ጊራ ጊራናው ቤሲ ቤሴኔ?» ያጊዲ ኢያ አይቺዶሶና።

23 ሺን ኢ ኤንታ ዎዛና ኢታቴሳ ኤሪዳ ጊሾ 24 «አኔ ታና ኢሲ ሳንቲሜ ቤሲቴ፥ ኢያ ቦላ ዴዒያ ሚሲሌይኔ ሱንሳይ አዴባዩ?» ያጊስ።

ኤንቲ ዛሪዲ፥ «ሮሜ ካዉዋ ቁሳሬይሳ» ያጊዶሶና።

25 ኢ ዛሪዲ፥ «ያቲኮ፥ ቁሳሬይሳ ቁሳሬስ፥ ያሳይሳ ያሳስ ኢሚቴ» ያጊስ።

26 ሄሳ ጊሾ፥ ኢ ዛሪዳ ዛሩዋን አሳ ሲንሳን ባላ ዴማናው ዳንዳሪቦኮና። ኢያ ዛሩዋን ማላሌቲዲ ሲዒ ጊዶሶና።

ሃይቆፕ ዴንዶባ

(ማቶ 22:23-33፤ ማር 12:18-27)

27 ሃይቆፔ ዴንዶይ ባዋ ያጊያ ሳዱቃዊታፔ ኢሶቲ ኢሶቲ ዩሱሳኮ ዩዲ፥ 28 «አስታማሪያው፥ ኢሲ አሲ ማቾ ኤኪዲ ናዓ ዩሎና ሃይቂኮ፥ ኢያ ኢሻይ ሄ ማጫሲው ኤኪዲ ናይታ ዩሊዲ ባ ኢሻስ ዜሬሲ አሻና ሚሳ ሙሴይ ባሬስ፥ 29 ሄኮ ሳፑን ኢሻቲ ዴዎሶና፥ ኮይሮይሲ ማቾ ኤኪዲ ናዓ ዩሎና ሃይቂስ፥ 30 ናምዓንሳይ ኢዮ ኤኪዲ ናዓ ዩሎና ሃይቂስ፥ 31 ሄቫንሳይካ ሄሳሶ ሃኒስ፥ ሳፑናቲ ኡባይ ሄሳዳ ሃኒዲ ኢዮ ኤኪዶሶና፥ ሺን ናዓ ዩሎና ሃይቂዶሶና፥ 32 ወርሴሳን ማጫሲያ ሃይቃሱ፥ 33 ሂዛ፥ ሳፑን አዴይ ኢዮ ኤኪዳ ጊሾ ሃይቆፔ ዴንዲያ ዎዴ ኢያ አዴ ማቾ ጊዳኔ?» ያጊዲ አይቺዶሶና፥

34 ዩሱሲ ዛሪዲ፥ «አሳይ ሃ ዎዲያን ኤኮሶናኔ ጌሎሶና፥ 35 ሺን ሃይቆፔ ዴንዲዲ ያና አላሚያን ዳናው ቤሴይሳቲ ኤኮኮናኔ ጌሎኮና፥ 36 ኤንቲ ኪታንቾ ሜላ ጊዲያ ጊሾ ሲንሳፌ ሃይቆኮና፥ ሃይቆፔ ዴንዲዳ ጊሾ ኤንቲ ዎሳ ናይታ፥ 37 ሙሴይ ጎዳ፥ <አብራሃሜ ጎዳ፥ ዩሳቃ ጎዳ፥ ያይቆባ ጎዳ> ጊዲ ቱሺያ ጊዶን ፀጌቲያ ታማ ታሪኪያ ባሬዳይሳን ሃይቂዳ አሳይ ዴንዴይሳ ቤሴስ፥ 38 ኡባይ ኢያው ዴዎን ዴዴይሳታ ጊዲያ ጊሾ ኢ ዴዎን ዴዴይሳታ ጎዳፔ አቲን ሃይቂዳይሳታ ጎዳ ጊዴና» ያጊዲ ዛሪስ፥ 39 ሂኔ አስታማሪታፔ ኢሶቲ ኢሶቲ፥ «አስታማሪያው፥ ሎዎባ አዳዳሳ» ያጊዶሶና፥ 40 ሄሳፌ ጉዩ፥ ሃራ አይሾ አይቻናው ያዩዶሶና፥

ኪሪስቶሲ አዴ ናዔ
(ማቶ 22:41-46፤ ማር 12:35-37)

41 ኢያፔ ካሊዲ ዩሱሲ ኤንታኮ፥ «አሳይ ኪሪስቶሳ ዋቲዲ ዳዊቴ ናዓ ያናና? 42-43 አይስ ጊኮ፥ ዳዊቴይ ባ ሁዔን ባ ማፃፋን፥ <ዎሳይ ታ ጎዳኮ «ታ ኔ ሞርኬታ ኔ ቶሆይ ዩዲያሶ አሳና ጋካናው ታፔ ኡሻቻ ባጋን ኡታ» ጊስ» ያጊስ፥

44 «ሂዛ፥ ዳዊቴይ ኪሪስቶሳ፥ <ጎዳ ጊዲ ዩጊሼ ኢያው ናዓ ዋኒዲ ጊዲ?» » ያጊስ፥

45 ዴሬይ ኡባይ ሲዲሺን ባ ታማራታኮ፥ 46 «አዳሳ ማዎ ማዲዲ ዩሼ ዶሴይሳታፔ፥ ጊያን ቦንቾ ሳሮሶ፥ አይሁዴ ዎሳ ኪሳን ቦንቾ አይዴ፥ ሞኬቲያ ሶንካ ቦንቾ ቤሲ ኮያ ሂኔ አስታማሪታፔ ናጌቲቴ፥ 47 ኤንቲ አምዔታ ኪሳ ካሎዮሶና፥ ዒሎ አሲ ዳኒዲ ዎሳ አዳሶሶና፥ ኤንቲ ኢታ ፒርዳ ኤካና» ያጊስ፥

21

አምራ ሙፃታ (ማር 12: 41-44)

¹ ዱሬ አሳይ ያሳ ኬሳን ሙፃታ ሳዒኒያን ዩጊሺን ዩሱሲ ደቁ ጊዲ አሳ ቤዒስ። ² ቃሲ ኢሲ ማንቆ አምራያ ናምዑ ሲኪና ዩጊሺን ቤዒዲ። ³ «ታ ሂንቴው ቱማ አዳይስ፤ ሃ ማንቆ አምራያ ኡባፌ አሳዳ ኢማሱ። ⁴ አይስ ጊኮ፤ ሃ አሳ ኡባይ ባንታው ዴዒያባፔ ኢሚዶሶና፤ ሺን ኢያ ባ ፓጩያፔ፤ ባው ዴዒያ አቁዋ ኡባ ኢማሱ» ያጊስ።

ዉርሴሳ ዎዲያ ማላታታ (ማቶ 24: 3-14፤ ማር 13: 3-23)

⁵ ዩሱሲ ታማሬታፔ ኢሶቲ ኢሶቲ ያሳ ኬሳይ ዳሮ ሎዒያ ሹቻኒኔ አሳይ ያሳስ ኢሚዳ ኢሞታን ሎዒዳይሳ አዴቶሶና። ⁶ ሺን ዩሱሲ፤ «ሃ ሂንቴ ቤዒያባይ ኡባይ ላሌቶና፤ ሹቺ ሹቻ ቦላ ጊምቤቲዳ ሜላ አቶና ዎዴይ ያና» ያጊስ።

⁷ ኤንቲካ፤ «አስታማሪያው፤ ሃ ኡባይ ሃናናይ አዉዴ? ቃሲ ሃይሲ ሃናናይሳስ ማላታይ አይቤ?» ያጊዲ አይቺዶሶና።

⁸ ዩሱሲ ያጊዲ ኤንታው ዛሮ ኢሚስ፤ «ባሌቶና ሜላ ናጌቲቱ፤ ዳሮቲ፤ <ታኒ ኪሪስቶሳ፤ ዎዴይ ማታቲስ> ያጊሼ ታ ሱንሳን ያና፤ ሺን ሂንቴ ኤንታ ካሎፊቱ። ⁹ ሂንቴ አላባኔ አሳ ጌላቴሳ ሲዒያ ዎዴ ዳጋሞፊቱ፤ ሄሲ ሲንሳቲዲ ሃናናይሲ አቶናባ ጊዲያ ጊሾ ዎዲያ ዉርሴሳይ ኤሌሲዲ ዩና» ያጊስ።

¹⁰ ካሊዲካ፤ «ዴሬይ ዴሪያ ቦላ፤ ካዎቴሳይ ካዎቴሳ ቦላ ዴንዳና። ¹¹ ጊታ ቢታ ቃይሃ ሃናና፤ ኮሻይኔ ጋዶይ ዱማ ዱማ ቤሳን ዳራና፤ ያሺያባይኔ ጊታ ማላታቲ ሳሎፔ ቆንጫና። ¹² ሺን ሃ ኡባይ ሃናናፔ ሲንሴ ታ ሱንሳ ጊሾ ጊዲ አሳይ ሂንቴና ጎዳናኔ አይካና። አይሁዴ ዎሳ ኬሳኒኔ ቃሾ ኬሳን ሂንቴና ዩጋና። ካዎታ ሲንሴኔ ዴሪያ ሃሬይሳታ ሲንሴ ሂንቴና ኤፋና። ¹³ ሄሲካ ታባ ሂንቴ ኤንታው ማርካታናው ሎዎ አጌ ጊዳና። ¹⁴ ሄሳ ጊሾ፤ ሂንቴ አይሹቲያ ዎዴ ዎይጊዲ ዛሮ ኢማኔ ጊዲ ሂንቴ ዎዛናን ኡንዔቶና ሜላ አኬኪቱ። ¹⁵ አይስ ጊኮ፤ ሂንቴ ሞርኪቲ ሂንቴራ ኤቁታናዉኔ ፓላማናው ዳንዳያና ዶናኔ ጨንጫቴሲ ታ ሂንቴው ኢማና። ¹⁶ ሃሪ አቶሺን፤ ሂንቴና ዩሊዳይሳቲ፤ ሂንቴ ኢሻቲ፤ ሂንቴ ዳቦቲኔ ሳጌቲ ሂንቴና አሲ ኢማና፤ ሂንቴ ጊዶሬ ኢሶታ ኢሶታ ዎዳና። ¹⁷ ታ ሱንሳ ጊሾ አሳ ኡባ ሲንሳን ሂንቴ ኢዪቲዳይሳታ ጊዳና። ¹⁸ ሺን ሃሪ አቶሺን፤ ሂንቴ ቢናናፔ ኢሶይካ ዳዩና። ¹⁹ ፖሎ ዳንዳዓን ሂንቴ፤ ሂንቴ ሽምፑዋ አሻና።»

21:14 ሉቃ 12: 11-12

20 «ዩሩሳሌም ካታማይ ዎታዳሬን ዲሬቲዲ ኡቲዳሺን ሂንቴ ቤዒኮ ኢያው ዳዮይ ማታቲዳይሳ ኤሪቴ። 21 ሄ ዎዴ ዩሁዳን ዴዲያ ኡባይ ዴሪያኮ ባቃቶ፥ ካታማን ዴዴይሳቲ ያፔ ኪዮ፥ ጋፃሪያን ዴዴይሳቲ ካታማ ጊሎፖ። 22 አይስ ጊኮ፥ ሃ ፃፊቲዳባይ ፖሌታና ሜላ ሄሲ ያሳይ ኩሼ ዛሪያ ዎዴ። 23 ሳዓ ባላ ጊታ ሜቶይ ያና፥ ሄሳንካ አሳ ባላ ያሳ ሃንቆይ ያና፥ ሄሳ ጊሾ፥ ቃንሳቲዳይሳታኔ ዳንሴይሳታ አዩ። 24 ኤንቲ ማሻን ሃይቃና፥ አሳ ኡባይ አላጋ ቢታ ዲዔታና። አይሁዴ ጊዶና አሳ ዎዴይ ፖሌታና ጋካናው ዩሩሳሌም ኤንታናን ዩዴቲዳይሳ ጊዳና።

25 «አዋን፥ አገናኒኔ፥ ያሊንቶታ ባላ ማላታቲ ሃኒዲ ቤንታና፥ አባፌኔ ዙሊያ ዴሹዋፔ ዴንዶይሳን ቢታን ዴዲያ አሳይ ኡንዔታናኔ ያርካና። 26 ሳሉዋ ዎልቃቲ ቡቂታና ጊሾ አሳይ ያሻኒኔ ቢታ ባላ አይቢ ሃናንዴሻ ጊዲ ናንን ባንታና ባሌታና። 27 ሄ ዎዴ አሳ ናዓይ ዎልቃኒኔ ጊታ ቦንቆዋን ሻራራ ዩሺን ኤንቲ ቤዓና። 28 ሂንቴ አቶቴሳይ ማታቲዳ ጊሾ ሃ ሃኖቲ ፖሌቴሲ አይኪያ ዎዴ ጊጌቲ ኤቂቴ፥ ሂንቴ ሁዲያ ጶቁ አሲዲ ዌሊቴ» ያጊስ።

29 ካሊዲካ፥ ሃይሳዳ ጊዲ ሌሚሶ አዲስ፡ «ባላሴ ሚሳኔ ሃራ ሚሳታ ኡባ ቤዒቴ። 30 ኤንቲ አጪያ ዎዴ ቶርቆይ ማታቲዳይሳ ሂንቴ ኤሬታ። 31 ሄሳዳ ሃ ሃኖቲ ፖሌቲሺን ሂንቴ ቤዒኮ ያሳ ካዎቴሳይ ማታቲዳይሳ ኤሪቴ።

32 «ታ ሂንቴው ቱማ አዳይስ፤ ሃ ኡባይ ፖሌታና ጋካናው ሃ ዩሌቴሳይ አዴና። 33 ሳሎይኔ ሳዓይ አዳና፥ ሺን ታ ቃላይ አዴና።

34 «ሂዛ፥ ዳሲ ባይና ዴያን፥ ኡሻ ዳሮኒኔ ዱሳባስ ኡንዔቴሳን ሂንቴ ዎዛናይ አይኪቶና ሜላኔ ሄ ቃማይ አኪኮና ዌሄዳ ሂንቴ ባላ ጋከና ሜላ ናጌቲቴ። 35 ሄ ቃማይ ቢታ ኩሜሳን ዴዲያ ኡባ ባላ ጋካና። 36 ሄሳ ጊሾ፥ ያ ኢታፔ አታናዉኔ አሳ ናዓ ሲንሳን ኤቃናው ዳንዳዓና ሜላ ኡባ ዎዴ ሚኒዲ ዎሲቴ» ያጊስ።

37 ጋላስ ጋላስ ዩሱሲ ያሳ ኬሳን ታማርሲሺ፥ ቃማ ቃማ ሻማፀ ዴሪያ ባላ ኬዩዲ አቆስ። 38 አሳይ ኡባይ ኢያ ሲዓናው ዎንታ ጉራ ኢያኮ ያሳ ኬሲ ዮሶና።

21:22 ሆሴ 9:7 21:25 ኢሳ 13:10፤ ሂዝ 32:7፤ ኤር 2:31፤ ዮቆ 6:12
 21:27 ዳኔ 7:13፤ ዮቆ 1:7 21:37 ሉቃ 19:47

22

ዩሁዲ ዮሱሳ አሲ ኢማናው ማቄቲስ

(ማቶ 26:1-5፤ 14፤ 16፤ ማር 14:1-2፤ 10-11፤ ዮሃ 11:45-53)

¹ ሄ ዎዴ <ፋሲካ> ያጊያ ኡይሳ ባሌይ ማቲስ። ² ካሂኔ ሃላቃቲኔ ሂጌ አስታማሬቲ አሳስ ያዩዳ ጊሾ ዋቲዲ ዮሱሳ ባንታ ጊዶፌ ዳይሳኔኮ አጌ ኮዮሶና። ³ ሃላሄይ ታማኔ ናምዓታፔ ኢሱዋ ጊዲዳ አስቆርታ ዩሁዳ ጌቴቴይሳ ጊዶ ጌሊስ። ⁴ ዩሁዲ ካሂኔ ሃላቃታኮኔ ያሳ ኬላ ናጌይሳታ ሃላቃታኮ ቢዲ ዮሱሳ ዋቲ አሲ ኢማኔኮ ኤንታራ ማቄቲስ። ⁵ ኤንቲካ ሄሳን ኡፋይቲዲ ሚሼ ኢማናው ኢያራ ዞሬቲዶሶና። ⁶ ኢካ ዞሬቴላን ጊጊስ። አሲ ኤንታው ኢማናው አሲ ባይና ኢንጄ ዎዴ ናጊሼ ዴዔስ።

ወርሴሳ ካሁዋ

(ማቶ 26:17-25፤ ማር 14:12-21፤ ዮሃ 13:21-30)

⁷ ሄሳፌ ጉዮ፣ ፋሲካ ዶርሳይ ሹኬቲያ ኡይሳ ባሌይ ጋኪስ። ⁸ ዮሱሲ፣ «ፋሲካ ካሁዋ ማና ሜላ ቢዲ ኑስ ጊጊሲቴ» ያጊዲ ጴጊሮሳኔ ዮሃንሳ ኪቲስ። ⁹ ኤንቲ፣ «ኑ አወን ጊጊሳና ሜላ ኔ ኮያይ» ያጊዲ አይቺዶሶና። ¹⁰ ኢ ኤንታኮ፣ «ሄኮ ሂንቴ ካታማ ጌሊሺን ሃላ አቶ ቶኪዳ አዴይ ሂንቴራ ጋሄታና። ኢ ቢዲ ጌሊያ ኬላ ኢያ ካሊዲ ጌሊቴ። ¹¹ ኬላዋኮ አስታማሬይ፣ <ታ ታ ታማሬታራ ዎላ ፋሲካ ካሁዋ ማናው ኢማሳ ኬሲ አወኔ? ያጊስ) ጊቴ። ¹² ኢ ፖቂያ ቦላ ሂዳቲዲ ጊጊዲ ዴዒያ ዳልጋ ኪፊሌ ሂንቴና ቤሳና፣ ያን ጊጊሲቴ» ያጊስ። ¹³ ኤንቲ ቢዲ ዮሱሲ ጊዳይሳዳ ሃኒን ዴሚዶሶና። ፋሲካ ባሌ ካሁዋ ያን ጊጊሲዶሶና።

¹⁴ ሳቴይካ ጋኪዳ ዎዴ ዮሱሲ ሃዋሬታራ ዎላ ካሁዋ ቦላ ኡቲስ። ¹⁵ ኢ ኤንታኮ፣ «ታ ዋዩ ኤካናፔ ሲንሴ ሃ ካሁዋ ሂንቴራ ማናው ዳሮ አዋታስ። ¹⁶ ሂዛ፣ ሲዒቴ! ያሳ ካዎቴላን ሃይሳስ ቢርሼሳይ ፖሌታና ጋካናው ሃ ካሁዋ ዛራዳ ሚኪ» ያጊስ። ¹⁷ ኡሻ ኤኪዲ ጋላቲ ሲሚዲ፣ «ሄዒቴ ሃይሳ ሂንቴ ጊዶን ሻኬቲቴ። ¹⁸ ሲዒቴ! ያሳ ካዎቴላይ ያና ጋካናው ሃቺፌ ዶማዳ ሃ ዎይኔ ኡሻፌ ዛራዳ ኡዩኬ» ያጊስ።

¹⁹ ኡይሳ ኤኪዲ፣ ጋላቲ ሲሚዲ፣ «ሃይሲ ሂንቴው ኢሜቲያ ታ አሹዋ። ሃይሳ አሲሼ ታና ቆፒቴ» ያጊዲ ሜንሲዲ ኤንታው ኢሚስ።

²⁰ ሄሳዳካ፣ ካሁዋፔ ጉዩ ኡሻ ኤኪዲ፣ «ሃ ኡሻይ ሂንቴው ጉኪዳ ታ ሱሳን ጊዲያ አራሳ ጫቁዋ። ²¹ ጊዶሺን፣ ታና አሲ

ኢማና ኡራ ኩሼይ ታራ ኢሲፌ ጋይታና። 22 አሳ ናዓይ ኢያው ጌቱቶይሳ ሜላ ሃይቃናው ዴዔስ። ሺን ኢያ አሲ ኢሚያ ኡራ አዩ» ያጊስ። 23 ኤንቲ ባንታ ጊዶን። «ሃይሳ አኒ አሳኔ» ጊዲ ዎሊ አይቺዶሶና።

24 ቃሲ ኤንታ ጊዶን ጊታ ጊዳናይ አኔ ጊያ ፓላሚ ሜዴቲስ።

25 ዩሱሲ ኤንታኮ። «ዴሪያ ካዎቲ ባንታ አሳ ዎልቃን ሃሮሶና፤ ባንታ ዴሪያ ቦላ ጎዳቴይሳታስካ ባንታና። (ሎዎ አሴይሳታ) ያጊዲ ዪጎሶና። 26 ሺን ሂንቴ ጊዶን ሄሳ ሜላ ጊዶፓ። ሂንቴ ጊዶን ባይራቴይ ካሎዳ ሃኖ፤ ካሌሴይሲ ካሌይሳዳ ሃኖ። 27 ሃኖሺን። ሞኬይሳፌሬ፤ ሞኬቴይሳፌ አዉሲ አዲ? ሞኬቴይሳ ጊዴኔዩ? ሺን ታኒ ሂንቴ ጊዶን ሞኬይሳ ሜላ።

28 «ሂንቴካ ታ ሜቱዋን ታፔ ሻኪቶና ታራ ሚኒዲ ኤቂዳይሳታ። 29-30 ሂንቴ ታ ጋይታፔ ማና ሚላ። ኡያና ሜላኔ አራታታ ቦላ ኡቲዲ ታማኔ ናምዑ ኢስራዴሌ ሸሻታ ቦላ ፐርዳና ሜላ ታ አዋይ ታና ሹሚዳይሳዳ ታካ ሂንቴና ታ ካዎቴሳን ሹማና» ያጊስ።

31 ካሊዲካ ዩሱሲ። «ሲሞና። ሲሞና። ባላሄይ ሂንቴና ጊስቴዳ ሃርቃናው ዎሲስ። 32 ሺን ታኒ ኔ አማኖይ ዳዮና ሜላ ኔው ጋናታስ። ኔካ ሲሚዳ ዎዴ ኔ ኢሻታ ሚንሳ» ያጊስ።

33 ሲሞኒ። «ጎዳው። ታኒ ኔራ ቃሼታናውኔ ሃይቃናው ጊጌታስ» ያጊስ።

34 ዩሱሲ ጳጊሮሳኮ። «ታ ኔው አዳይስ፤ ሃቺ ኩቶይ ዋሳናፔ ሲንሴ ኔ ታና ሄዥ ቶሆ ካዳና» ያጊስ። 35 ካሊዲካ። ዩሱሲ ኤንታኮ። «ታኒ ሂንቴና ኮሮጆይ። ካርጊቴይ ካሮሚ ባይና ኪቲዳ ዎዴ ሂንቴው ፓጩዳባይ ዴዒ?» ያጊዲ አይቺስ።

ኤንቲ ዛሪዲ። «አይኮይካ ፓጩቤና» ያጊዶሶና።

36 ኢ ኤንታኮ። «ሃዲ ኮሮጆይ ካርጊቴይ ዴዔይ አይኮ፤ ማሺ ባይናይ ባ አፊላ ባይዚዲ ማሻ ሻሞ። 37 ሃ ሲዒቲ! (ጌላታራ ታይቤቲስ) ጌቱቲዲ ገፌቲዳይሲ ታናን ፖሌታናው ቤሴስ። ኤ። ታ ጊሾ ገፌቲዳባይ ፖሌቴይሲ ተማቲስ» ያጊስ።

38 ኢያ ታማሬቲ። «ጎዳው ሃይሳን ናምዑ ማሺ ዴዔስ» ያጊዶሶና።

ኢ። «ጊዳና» ያጊስ።

22:21 ማዘ 41:9 22:24 ማቶ 18:1፤ ማር 9:34፤ ሉቃ 9:46 22:25 ማቶ 20:25-27፤ ማር 10:42-44 22:26 ማቶ 23:11፤ ማር 9:35 22:27 ዮ.ቆ 13:12 22:29-30 ማቶ 19:28 22:35 ማቶ 10:9-10፤ ማር 6:8-9፤ ሉቃ 9:3 22:37 ኢሳ 53:12

ዮሱሲ ሻማሆ ዴሪያ ቦላ ዎሲስ
(ማቶ 26:36-46፤ ማር 14:32-42)

39 ዮሱሲ ካሴ ሜዜቲዳይሳዳ ዴንዲዲ ሻማሆ ዴሪያ ቦላ ኬዩስ። ኢያ ታማሬቲ ኢያ ካሊዶሶና። 40 ሄ ቤሳ ጋኪዳ ዎዴ «ፓጩን ጌሎና ሜላ ዎሲቴ» ያጊስ። 41 ኤንታፊ ሹቺ ሆሊን ጋኪያ ሶ ሜላ ሃኪዲ ጉልባቲዲ ዎሲስ። 42 «ታ አዋው፥ ኔ ሸኔ ጊዲኮ ሃ ሜቱዎ ታፕ አላ። ሺን ታ ሸኔ ጊዶፖ ኔ ሸኔይ ሃኖ» ያጊዲ ዎሲስ። 43 ኪታንቾይ ሳሎፕ ቆንጫዲ ሚንሱስ። 44 ዳሮ ኡንጫቲዲ ሚንሱዲ ዎሴስ። ኢያ ጫዋይካ ሱሱ ያኪያዳ ሳዓን ያኪስ። 45 ዮሱሲ ዎሳ ጠርሲዲ ባ ታማሬታኮ ዩስ። ኤንቲ፥ አዛጊያፕ ዴንዶይሳን ዳቡሪዲ ዲስኪዳሺን ዴሚዲ፥ 46 «አይስ ዲስኬቲ? ፓጩን ጌሎና ሜላ ዴንዲዲ ዎሲቴ» ያጊስ።

ዮሱሲ አይኪቲስ
(ማቶ 26:47-56፤ ማር 14:43-50፤ ዮሃ 18:3-11)

47 ኢ ቡሮ አዳ ቦላ ዴዲሺን ዳሮ አሳቲ ዩዶሶና። ታማኔ ናምዓታፕ ኢሶይ ዩሁዳ ጌቴቴይሲ ኤንታና ካሌሴስ። ኢ ዮሱሳ ዩራናው ማቲ ሸቂስ። 48 ሺን ዮሱሲ፥ «ዩሁዳ፥ አሳ ናዓ ዩራዳ አላ ኢማኔ?» ያጊስ።

49 ዮሱሳ ታማሬቲ ሄ ሃኑዎ ቤዲዲ፥ «ጎዳው ማሻን ሾጩኖ?» ያጊዶሶና። 50 ኤንታ ጊዶፊ ኢሶይ ካሂኔ ሃላቃ አሳንቸዎ ሾጩዲ ኡሻቻ ሃይላ ቃንጊዲ ዩጊስ።

51 ሺን ዮሱሲ፥ «አጋ! ዲጎፊቴ» * ያጊስ። ኡራ ሃይላ ቦቺዲ ፓሱስ።

52 ሄሳፊ ጉዩ፥ ዮሱሲ ባና አይካናው ዩዳ ካሂኔ ሃላቃታኮ፥ ዎሳ ኬላ ናጌይሳታ ሹማታኮኔ ጩማታኮ፥ «ፓኖ አይኪያ አሳዳ ማሸኔ ሃምዓ አይኪዲ ዩዴቲ?» 53 ኡባ ጋላስ ዎሳ ኬላን ታ ሂንቴራ ዴዲያ ዎዴ ታ ቦላ ኩሼ ዎሱቤኬታ። ሺን ሃይሲ ዲማ ካዎቴሳይ ሃሪዳ ዎዴኔ ሂንቴ ዎዴ» ያጊስ።

ዲጊሮሲ ዮሱሳ ካዲስ

(ማቶ 26:57-58፤ 67-75፤ ማር 14:53-54፤ 66-72፤ ዮሃ

18:12-18፤ 25-27)

54 ሄሳፊ ጉዩ፥ ዮሱሳ አይኪዲ ካሂኔ ሃላቃ ዛባ ኤፊዶሶና። ዲጊሮሲ ሃዎን ዮሱሳ ካሌስ። 55 አሳቲ ካሂኔ ሃላቃ ዛባን ታማ

* 22:51 አጋ! ዲጎፊቴ፡ ዮሱሲ ሃ ቤሳን አጋ ያጊዳይ ኢያ አሻናው ጊዲ አሳቲ ኡራ ሃይላ ቃንጊደላ አጋ ቃንጊፋ ጊዳይሳኔ፥ ሃራቲ ኢያ አይካናው ዩዳይሳታ ዲጎፊቴ ሃዲ ኤንታ ዎዴ ያጊዳይሳ ናምዑ ቆፋታ ዎሊ ጋሱዲ አይኪስ። 22:53 ሉቃ 19:47፤ 21:37

ኤሲዲ ዎላ ኡቲዳሺን ጳጊሮሲ ኤንታራ ኢሲፌ ኡቲስ።⁵⁶ ኢሲ አይሊያ ጳጊሮሲ ታማ ማታን ኡቲዳይሳ ጫዳ ዓላዳ፣ «ሃ ኡራይ ኢያራ ዴዔስ» ያጋሱ።

⁵⁷ ሺን ጳጊሮሲ፣ «ሃ ማጫሴቴ ታ ሄ ኡራ ኤሪኬ» ያጊዲ ካዲስ።

⁵⁸ ጉሳ ዎዴፕ ጉዬ ኢሲ ሃራ አዴይ ኢያ ቤዒዲ፣ «ኔካ ኤንታፌ ኢሱዋ» ያጊስ።

ሺን ጳጊሮሲ፣ «ሃ አዲያው ታና ጊዲኬ» ያጊስ።

⁵⁹ ኢሲ ሳቴ ሜላ ጋምዒዳፕ ጉዬ ኢሲ ሃራ አዴይ ቲሊሲዲ፣ «ሃ ኡራይ ጋሊላፕ ጊዲያ ጊሾ ሲዴይ ባይና ኢያራ ዴዔስ» ያጊስ።

⁶⁰ ሺን ጳጊሮሲ፣ «ሃ አዲያው፣ ኔ ጌይሳ ታ ኤሪኬ» ያጊስ። ኢ ሄ አዳ አንጎና ዴዒሺን ኩቶይ ዋሲስ።

⁶¹ ጎዳይ ጉዬ ሲሚዲ ጳጊሮሳ ዓሊስ። ጳጊሮሲ፣ «ሃቺ ኩቶይ ዋሳናፕ ሲንፍ ኔ ታና ሄዥ ቶሆ ካዳና» ያጊዲ፣ ጎዳይ አዲዳ ቃላ አኬኪስ። ⁶² ጳጊሮሲ ካሬ ኬዩዲ ዳሮ ኮኮሪዲ ዩኪስ።

⁶³ ዩሱሳ ናጊያ አሳቲ ኢያ ሌቂሶኔ ዴሼሊ አይኪዶሶና። ⁶⁴ ኢያ አይፊያ ጎዚዲ «አኔ ቲንቢቴ አዳ፤ ኔና ዴቺዳይ አኔ?» ያጊዲ አይቾሶና። ⁶⁵ ሃራ ዳሮ ጫሼ ጫዩዲ ካዉሾሶና።

ዩሱሲ ጲላዎሳ ሲንፍኔ ሄሮዲሳ ሲንፍ ሺቂስ
(ማቶ 26: 59-66፤ ማር 14: 55-64፤ ዮሃ 18: 19-24)

⁶⁶ ሳዒ ዎንቲያ ዎዴ አይሁዴ ቢታ ጨማቲ፣ ካሂኔ ሃላቃቲኔ ሂጌ አስታማሬቲ ሺቂዲ፣ ዩሱሳ ባንታ ሲንፍ ሺሺዶሶና።

⁶⁷ ኤንቲ፣ «ኔኔ ኪሪስቶስ? አኔ ኑስ አዳ?» ያጊዲ አይቺዶሶና።

ዩሱሲ፣ «ታ አዲያኮ አማኔኬታ። ⁶⁸ ታ አይቺያኮ ዛሬኬታ።

⁶⁹ ሺን አሳ ናዓይ ሃይሳፌ ጌዴ ባጋን ዎልቃማ ዎሳ ኡሻቻ ባጋን ኡታና» ያጊስ።

⁷⁰ ሄ ዎዴ ኡባይ፣ «ያቲን፣ ኔኔ ዎሳ ናዔ?» ያጊዶሶና።

ኢ፣ «ታ ዎሳ ናዓ ጊዴይሳ ሂንቴ ጊዴታ» ያጊስ።

⁷¹ ኤንቲ፣ «ሂዛ፣ ሃራ ማርካ አይ ኮሺ? ኢ ባ ኢንፃርሳን አዲሺን ኑ ሲዒዳ» ያጊዶሶና።

23

ዩሱሲ ጲላዎሳ ሲንፋን
(ማቶ 27: 1-2፣ 11-14፤ ማር 15: 1-5፤ ዮሃ 18: 28-38)

¹ ሄ ቤሳን ሺቂዳ ሻንጎቲ ኡባይ ዴንዲዲ ዩሱሳ ጲላዎሳኮ ኤፊዶሶና። ² «ሃ ኡራይ ኑ አሳ ባሌሲሺን፣ ካዉዋስ ጊራ ጊሮና

ሜላ ዲጊሺኒኔ ቃሲ፥ <ታኒ ኪሪስቶስ ሂንቴ ካወዋ> ያጊሺን ዴሚዳ» ያጊዲ ሞቲዶሶና።

3 ጲላዎሲ ዮሱሳ፥ «ኔኒ አይሁዴታ ካዎዩ?» ያጊዲ አይቺስ። ዮሱሲ፥ «ኤ፥ ኔ ጊዳይሳ ሜላ» ያጊስ።

4 ጲላዎሲ ካሂኔ ሃላቃታኮኔ አሳኮ፥ «ሃ ኡራ ቦላ ታኒ ኢሲ ባላካ ዴማቢኬ» ያጊስ። 5 ሺን ኤንቲ፥ «ሃ ኡራይ ጋሊላፔ ዶሚዲ ሃይሳ ጋካናው ዩሁዳ ኩሜሳ ኢታባስ ዴንፎፎስ» ያጊዲ ሚንሴ አዲዶሶና።

6 ጲላዎሲ ሄሳ ሲዒዳ ዎዴ ዮሱሲ ጋሊላ አሴኮ ኤራናው ኮዩዲ ኢያ አይቺስ። 7 ዮሱሲ ሄሮዲሳ ቢታፊ ዩዳ አሲ ጊዴይሳ ጲላዎሲ ኤሪዳ ዎዴ ሄሮዲሲ ሄ ዎዴ ዮሩሳላሜን ዴዒያ ጊሾ ኢያኮ ዮዲስ።

8 ሄሮዲሲ ዮሱሳ ቤዓናው ዳሮ ዎዴፔ ኮዩሽ ዴዒያ ጊሾ ኢያ ቤዒዳ ዎዴ ዳሮ ኡፋይቲስ። አይስ ጊኮ፥ ኢያባ ሲዒዳ ጊሾ ማላሊሲያባ አሲን ቤዓናው አሞቲሼ ዴዒስ። 9 ሄሮዲሲ ዮሱሳ ዳሮ አይሾታ አይቺስ፥ ሺን ኢ አይኮካ ዛሪቤና። 10 ካሂኔታ ሃላቃቲኔ ሂጌ አስታማሬቲ ያን ኤቂዲ ሚንሴዲ ኢያ ሞቶሶና። 11 ሄሮዲሳራኔ ኢያ ዎታዳሬታራ ዮሱሳ ካዲዶሶናኔ ሌቂሲዶሶና። ቦንቾ አሬላ ማይዚዲ ጲላዎሳኮ ዛሪዲ ዮዲዶሶና። 12 ሄሮዲሳራኔ ጲላዎሳራ ካሴ ሞርኬሺን ሄ ጋላስ ዎላ ጊጊዶሶና።

13 ጲላዎሲ ካሂኔ ሃላቃታ፥ አሳ ሃሪይሳታኔ አሳ ያጊዲ፥ 14 «ሃ ኡራይ አሳ ጊላቴሳስ ዴንፎፎስ» ጊዲ ታኮ ኤሂዴታ። ታካ ሂንቴ ሲንሳን ፒልጋዳ ሂንቴ ሺሺዳ ሞቱዎስ አይቢ ባላካ ዴማቢኬ። 15 ሄሮዲሲ፥ ሄሳሶ አይቢ ባላካ ኢያ ቦላ ዴሚቦና ጊሾ ኑኮ ዮዲስ። ቱማካ ሃ ኡራይ ሃይቆስ ጋሊያ አይቢ ባላካ አሲቤና። 16 ሄሳ ጊሾ፥ ኢያ ጋራፋዳ ቢላ ዮዳና» ያጊስ። 17 ሄሳ ኢ ጊዳይ ፋሲካ ባሴ ዎዴ ኢሲ አሲ ኤንታው ቢላናይቢ ኢያው አቶናባ ጊዲያ ጊሾሳ።

18 ዴሬይ ኡባይ ኢሲ ቦላ፥ «ሃ ኡራ ጌዴ ዲጋ፥ ኑስ ባርባና ቢላ» ያጊዲ ሞሲዶሶና። 19 ባርባኒ ካታማ ጊዶን አሳ ኢታባስ ዴንፎፎዲ አሴ ዎዲዲ ቃሼቲዳ አሲ።

20 ጲላዎሲ ዮሱሳ ቢላናው ኮዩዲ አሳስ ዛሪ አዲስ። 21 ጊዶሺን፥ አሳይ፥ «ካቃ! ካቃ!» ያጊዲ ሞሲዶሶና። 22 ጲላዎሲ ሄቫንሶ፥ «ሃ ኡራይ ቆሂዳባይ አይቤ? ዎዶስ ጋሊያ ባላ ታ ዴማቢኬ። ሄሳ ጊሾ፥ ጋራፋዳ ዮዳ አጋና» ያጊስ።

23 ኤንቲ ባንታ ቃላ ዶቁ አሲዲ፥ «ካቂታናው ቤሴስ» ጊዲ ሚንሴ ሞሲዶሶና። ኤንታ ሞሶይካ ያኒስ። 24 ኤንታ አይሻ ጊሾ ጊዲ ጲላዎሲ ኢያ ቦላ ፒሮዲስ። 25 አሳ ኢታባስ ዴንፎፎይሳኔ አሴ

ዎዲዲ ቃሼቲዳይሳ ቢላና ሜላ ዎሲዳ፤ ሄ ኡራ ኤንታው ቢሊስ።
ሺን ዩሱሳ ኤንቴ ኮዩዳባ አላና ሜላ ኤንታው አሲ ኢሚስ።

ዩሱሳ ካቂዶሶና

(ማቶ 27:31-44፤ ማር 15:21-32፤ ዮሃ 19:17-27)

26 ዩሱሳ አይኪዲ ኤፊሺን ሲሞና ጊያ ቁሬና ቢታ አዴይ ጋፃሬፔ ዩሺን፤ ዴሚዲ ማስቃሊያ ቶሲዲ ዩሱሳ ካሊዲ ባና ሜላ ኡንዴሲዶሶና። 27 ዳሮ አሳይኔ ባንታ ቲራ ኢጩሼ ዩኪያ ማጫሳቲ ኢያ ጉዩያራ ካሎሶና።

28 ሺን ዩሱሲ ኤንታኮ ጉዩ ሲሚዲ፤ «ሂንቴኖ፤ ዩሩሳላሜ ማጫሳቶ፤ ሂንቴ ሁዔሲኔ ሂንቴ ናይታስ ዩኪቴፔ አቲን ታው ዩኮሬቴ። 29 <ሄኮ ማይንሳቲ፤ ዩሎና ኡሎቲኔ ዳንሶና ዳንሳቲ አንጄቲዶሶና> ሂንቴ ያጋና ጋላሳይ ያና። 30 ሄ ዎዴ ዴሬታ፤ <ኮ ቦላ ኩንዲቴ፤ ዙማታካ፤ <ኮና ካሚቴ> ያጋና። 31 ሂዛ፤ ቃዩ ሚሳ ሄሳሶ አሲኮ ሜላ ሚሳ ዋታንዴሻ?» ያጊስ።

32 ኢያራ ዎዳናው ሃራ ናምዑ ዎራንቭታ ኤፊዶሶና። 33 ቁራኒዮ * ጌቲቲያ ቤሳ ጋሲዲ ካቂዶሶና። ዎራንቭታፔ ኢሱዋ ኡሻቻ ባጋራ ሃንኩዋ ሃዲርሳ ባጋራ ካቂዶሶና። 34 ዩሱሲ፤ «ታ አዋው፤ ኤንቴ አይ አሲያኮ ኤሮና ጊሾ ኔኔ ኤንታው አቶ ያጋ» ያጊስ።

ኤንቴ ኢያ አፊላ ቦላ ሳማ ዩጊዲ ሻኬቲዲ ኤኪዶሶና።

35 አሳይ ኤቂዲ ዪሎሶና፤ ሺን ዴሪያ ሃራይሳቲ፤ «ሃራታ አሺስ፤ ያሳይ ዶሪዳ ኪሪስቶሲ ኢያ ጊዲኮ አኔ ባና አሾ» ያጊዲ ሌቂሲዶሶና። 36 ዎታዳሬቲ ኢያኮ ሺቂዲ፤ ሜላ ዎይኔ ኡሻ ኢሚዶሶና። 37 ያቲዲ፤ «ኔኔ አይሁዴታ ካዎ ጊዲኮ ኔ ሁዲያ አሻ» ያጊዲ ሌቂሲዶሶና።

38 ኢያው ሁዔ ባጋራ፤ «ሃይሲ አይሁዴታ ካዎ» ያጊያ ፀፊይ ዴዔስ። 39 ካቂቲዳ ዎራንቭታፔ ኢሶይ ሜሼ ሳፃራ ጎቺሼ፤ «አኔ ኔኔ ኪሪስቶሳ ጊዲኮ፤ ኔናካ ኑናካ አሻ» ያጊስ።

40 ሺን ሃንኮ ዎራንቭይ፤ «ኔኔ ሃይሳ ሜላ ፒርዳን ዴዓሼ ሃሪ አቶሺን፤ ያሳስ ያዩኪ? 41 ኑኔ ኑ ባላስ ቤሲያ ፒርዳ ኤኮስ፤ ሺን ሃ ኡራይ ኢሲ ኢታባካ አሲቤና» ያጊዲ ሃንቂቲስ።

42 ቃሲካ፤ «ዩሱሳ፤ ኔ ኔ ካዎቴሳራ ያ ዎዴ ታና ቆፓ» ያጊስ።

23:30 ሆሴ 10:8፤ ዮቆ 6:16 * 23:33 ቁራኒዮ፤ ቁራኒዮ ጊይሲ ጊሪኬ ዶና፤ አራማይኬ ዶናን <ጎልጎታ> ዎይኮ «ሁዔ ጉጌ» ጉሱ። ቁራኒዮ ጊያ ሱንሳይ ኢሜቲዳይ ዩሱሲ ካቂቲዳይ አሳ ሁዔ ጉጌ ዳኒያ ቤሳን ጊዲያ ጊሾሳ፤ ሄ ቤሳይ ሮሜ ካዎቴሳይ ዎራንቭታ ካቂያ ቤሲ። (ማቶ 27: 33፤ ማር 15:22፤ ዮሃ 19:17) 23:34 ማዝ 22:18 23:35 ማዝ 22:18፤ ማዝ 22:7 23:36 ማዝ 69:21

43 ዮሴፍ፡ «ታ ኔው ቱማ አዳይስ፤ ሃቺ ነኒ ታራ ጋናቴን ጊዳና» ያጊስ።

44-45 ሄ ጋላስ ኡሱፑን ሳቴፕ ቢዲ ኡዱፉን ሳቴ ጋካናው አዋይ ፖውዋ ዲጊዳ ጊሾ ቢታ ኡባ ቦላ ዲማ ጊዲስ። ያሳ ኬሳ ማጋራጃይ ዳኬቲዲ ናምዓን ቫኬቲስ። 46 ዮሴፍ፡ ቃላ ዶቁ አሲዲ፡ «ታ አዋው፡ ታ ታ ሽምፒው ኔ ኩሼን ሽዳይስ» ያጊዲ ሃይቂስ።

47 ማቶ ሃላቃይ፡ ሃኒዳይሳ ቤዲዲ፡ «ሃይሲ ኡራይ ቱማካ ሂሎ» ያጊዲ ያሳ ጋላቲስ። 48 ሃ ሃኒያባ ቤዓናው ሄ ቤሳ ሸቂዳ አሳ ኡባይ ሃኒዳባ ቤዲዳ ዎዴ ባንታ ቲራ ኢጨሼ ባንታ ሶ ሲሚዶሶና። 49 ጊዶሺን፡ ዮሴሳ ማታን ኤሪያ አሳ ኡባይ፡ ሄሳዳካ ጋሊላፕ ካሊዲ ዩዳ ማጫሳቲ ሄሳ ቤዲሼ ሃሆን ኤቂዶሶና።

50-51 አይሁዴ ሻንጎታፕ ኢሶይ፡ ዮሴፋ ጌቴቲያ ኡራይ ዴዔስ። ኢ አርማቲያሳ ጌቴቲያ ዩሁዳ ካታማፕ ዩስ። ኢ ሎዶኔ ሂሎ አሲ ጊዲያ ጊሾ ያሳ ካዎቴሳ ዩሳ ናጌስ። ሻንጎታፕ ኢሱዋ ጊዲሼ ኤንታ ዞሬቴሳኒኔ አሱዋን ዴና። 52 ሄ ኡራይ ጲላዎሳኮ ቤዲ፡ ዮሴሳ አሃ ሞጋናው ታው ኢማ ጊዲ ዎሲስ። 53 ጲላዎሲ ኤካ ያጊን፡ ዮሴሳ አሃ ዎዲሲዲ አፊላራ ሃኒስ። ዛላፌ ዎጨዲ ኬሲዳ ሃራ አሲ ሞጌቶና ኦራሳ ዱፎን ዎሲስ። 54 ሳምባቲ ጌላና ሃኒያ ጊሾ ሄ ጋላሳይ ጊጌቴሳ ቃማ።

55 ጋሊላፕ ዴንዲዲ ዮሴሳ ካሊዲ ዩዳ ማጫሳቲ ዮሴፋራ ቤዲ ኢያ አሃ ዋቲ ሞጊያኮ ዱፉዋ አኬኪዲ ቤዲዶሶና። 56 ያፕ ሲሚዲ ሺቶኔ ቂባቲያ ጊጊሲዶሶና። ሂጌይ ኪቴይሳ ሜላ ሳምባታ ጋላስ ሽምፒ ፕዲዶሶና።

24

ዮሴፍ ሃይቆፕ ዴንዲስ

(ማቶ 28:1-10፤ ማር 16:1-8፤ ዮሃ 20:1-10)

1 ሳሚንታፌ ኮይር ጋላስ፡ ዎጋ ዎዴ ዎንታ ዳሮ ጉራ፡ ማጫሳቲ ባንታ ጊጊሲዳ ሸቱዋ ኤኪዲ ዱፉዋ ቤዶሶና። 2 ኤንቲ ያ ጋኪያ ዎዴ ዱፉዋ ዶናን ዴዲያ ሹቻይ ጎንዴሬቲዲ ኪቾይሳ ዴሚዶሶና። 3 ኤንቲ ዱፉዋ ጋሲ ጌሊዶሶና፡ ሸን ጎዳ ዮሴሳ አሃ ዴሚሶኮና። 4 ኤንቲ ያን ኤቂዲ አይቢ ሃኒዴ ጊዲ ቆፒሺን አኪኮና ዳር ጲሊያ አፊላ ማዲዳ ናምዑ አሳቲ ኤንታ ማታን ኤቂዶሶና። 5 ማጫሳቲ ያሽቴዲ ባንታ ሁዲያ ሳዓን ዜቂ አሲዲ ዴዲሺን፡ አሳቲ ኤንታኮ፡ «ዴዎን ዴዔይሳ ሃይቆታ ጊዶን አይስ ኮዩቲ?»

23:44-45 ኬሳ 26:31 23:46 ማዝ 31:5 23:49 ሉቃ 8:2 23:56 ኬሳ 20:10፤ ዛሬ 5:14

6-7 ኢህይዳን ዴና፤ ሃይቆፕ ዴንዲስ፡፡ <አሳ ናዓይ ናጋራንቾታ ኩሼን አዲ ኢሜታና፤ ኤንቲካ ኢያ ካቃና። ኢህዳን ቃማን ሃይቆፕ ዴንዳና> ያጊዲ፡፡ ኢህንቴራ ጋሊላን ዴዲሼ ህንቴው አዲዳ ቃላ ቆፒቴ» ያጊስ።

8 ማጫሳቲ ሄ ዎዴ ኢያ ቃላ ቆፒዶሶና።

9 ማጫሳቲ ዱፉዋፕ ሲሚዲ ሃኒዳባ ኡባ ታማኔ ኢሶታሲኔ ሃራታሲካ አዲዶሶና። 10 ሄሳ ሃዋሬታስ አዲዳይ ማግዴላ ማይራዋ፡፡ ዮሃና፡፡ ያይቆባ አዬው ማይራዋኔ ኤንታራ ዴዲያ ሃራ ማጫሳታ። 11 ሺን ኤንታው ማጫሳቲ አዲዳይሲ ኤልዋ ዳኒን አማኒቦኮና። 12 ሺን ጳዲሮሲ ዴንዲ ዎዲዲ ዱፎ ቢስ። ሄ ቤሳ ጋኪዲ ሆኪ ጋሲ ያሊያ ዎዴ ዋን አፊላ ሃላላ ቤዲስ። ሃኒዳባን ማላሌቲሼ ባ ሶ ሲሚስ።

ኤማሁሴ አጊያ ቦላ

(ማር 16:12-13)

13 ሄ ጋላስ ካሊያ ታማሬታፕ ናምዓቲ ዩሩሳላሜፕ ታማኔ ኢሲ ኪሎ ሚቲሬ ሃኪያ ኤማሁሴ ጉታ ቦሶና። 14 ኤንቲ ዎላ ሃኒዳባ ኡባ አዲቶሶና። 15 ኤንቲ ሄ ሃኖታባ ቆፒሼኔ አዴቲሼ ቢያ ዎዴ ዩሱሲ ባ ሁዔን ሺቂዲ ኤንታራ ቤስ። 16 ሃኖሺን፡፡ ኤንቲ ኢያ ኤሮና ሜላ ኤንታ አይፌይ አይኬቲስ።

17 ኢ፡፡ «ህንቴ ዎላ አጌ ቦላ ዴዲሼ አዴቲይሲ አይቤ?» ያጊስ። ኤንቲ አዛኒዲ ሲዲ ጊዲ ኤቂዶሶና። 18 ኤንታፌ ኢሶይ ቆሊዮጳ ጌቴቲይሲ፡፡ «ሃ ቃማታ ጊዶን ዩሩሳላሜን ሃኒዳባ ኤሮናይሲ፡፡ ኔ ቢታስ ኢማሴዮ?» ያጊስ።

19 ኢ ዛሪዲ፡፡ «ኢ ሃኒዳይሲ አይቤ?» ያጊዲ አይቺስ።

ኤንቲ፡፡ «ዎሳ ሲንሳኒኔ አሳ ሲንሳን አሶኒኔ አዳን ሚኖ ናቤ ጊዲዳ ናዘሬቴ ዩሱሳባ። 20 ኢያ ካሂኔ ሃላቃቲኔ ኑና ሃሬይሳቲ ሃይቆ ፒርዳስ አሲ ኢሚዲ፡፡ ካቂዶሶና። 21 ኑኒ ኢስራዔሌ አሳ ዎዛንዴ ጊዲ ኡፋይቲዲ ናጊዳሺን ሃይሲ ሃኒን ሃቺ ሄዳንሶ ቃማ። 22 ቃሲ ኑ ጊዶፌ ኢሲ ኢሲ ማጫሳቲ ኑና ማላሊሲዶሶና። ኤንቲ ሃቺ ዎንታ ጉራ ዱፉዋ ቢዶሶና። 23 ኢያ አሃ ዳዩዳ ዎዴ ሲሚ ዩዲ፡፡ <ኢ ፓፃ ዴዔስ> ያጊያ ኪታንቾቲ ቆንጩን ቤዲዳ ያጊዲ አዲዶሶና። 24 ኑ ጊዶፌካ ኢሶቲ ኢሶቲ ዱፉዋ ቢዲ ማጫሳቲ አዲዳይሳሶ ሃኒን ቤዲዶሶና። ሺን ኢያ ቤዲቦኮና» ያጊስ።

25 ኢ ኤንታኮ፡፡ «ህንቴኖ፡፡ አኪኮና አሳው፡፡ ህንቴ ዎዛናይ ናቤቲ አዲዳባ ኡባ አማናናው ጋምዔይሳቶ፡፡ 26 ኪሪስቶሲ ሃ ሜቱዋ ኤካናውኔ ባ ቦንቹዋን ጌላናው ቤሴኔ?» ያጊስ። 27 ሙሴፕኔ

24:6-7 ማቶ 16:21፤ 17:22-23፤ 20:18-19፤ ማር 8:31፤ 9:31፤ 10:33-34፤ ሉቃ 9:22፤ 18:31-33

ናቤታ ኡባፌ ዴንዲዲ ጌሻ ማፃፋን ኢያባይ ፃፌቲዳይሳ ኡባ ኤንታው ቆንጨሲስ።

28 ኤንቲ ቢያ ጉታኮ ማታቲዳ ዎዴ ዮሱሲ አዲዲ ሃሆ ሶ ቢያ ዳኒን፤ 29 ኤንቲ፤ «ሳዓይ ቃሚዳ ጊሾ ኑራ አቃ» ያጊዲ ሚንሲዲ ዎሲዶሶና። ሄሳ ጊሾ፤ ኤንታራ አቃናው ጌሊስ።

30 ኤንታራ ኢሲፌ ጋይታ ቦላ ኡቲዲ፤ ኡይሳ ዴንሲዲ፤ ሚንሲ አንጂዲ ኤንታው ኢሚስ። 31 ሄ ዎዴ ኤንቲ ኤራና ሚላ ኤንታ አይፌይ ዶዮቲስ። ኤንቲካ ኤሪዶሶና። ሺን ኢ ኤንታፌ ጌሚስ። 32 ኤንቲ፤ «ኑ አጊያ ቦላ ዴዲሺን ኢ ኑስ ጌሻ ማፃፋ ቢርሺሺኒኔ ኑና ሃሳዩሲሺን ኑ ዎዛናይ ፀጌቲቤኔ?» ያጊዶሶና።

33 ሄ ዎዴ ዴንዲዲ ጉዬ ዮሩሳላሜ ዩዶሶና፤ ታማኔ ኢሶቲኔ ሃራቲ ኢሲ ቦላ ሺቁዲ ዴዲሺን ዴሚዶሶና። 34 ኤንቲ፤ «ሳዳይ ቱማ ዴንዲስ፤ ሲሞናስ ቆንጨስ» ያጊዶሶና።

35 ሄ ናምዑ ታማሬቲ ኤማሁሴ አጊያ ቦላ ዴዲሺን ሃኒዳይሳኔ ኡይሳ ሚንሲዳ ዎዴ ዋቲ ኢያ ኤሪዳኮ ኤንታው አዲዶሶና።

ዮሱሲ ባ ታማሬታስ ቆንጨስ
(ማቶ 28:16-20፤ ማር 16:14-18፤ ዮሃ 20:19-23፤ ሃ.አ 1:6-8)

36 ናምዑ ታማሬቲ ሄሳ አዳ ቦላ ዴዲሺን፤ ዮሱሲ ኤንታ ጊዶን ኤቂዲ፤ «ሳሮይ ሂንቴው ጊዶ» ያጊስ።

37 ጊዶሺን፤ ኤንቲ ዳጋሚዲ፤ ሞይቲሌ ቤዒዳ ዳኒን ያዩዶሶና።

38 ኢ ኤንታኮ፤ «አይስ ባቢዴቲ? አይስ ሲዴይ ሂንቴ ዎዛናን ጌሊዴ? 39 ታ ኩሺያኔ ታ ቶሁዋ ቤዒቲ፤ ታኒ ታና፤ ቃሲ አይኪዲ ቤዒቲ፤ ታናን ሂንቴ ቤዒይሳዳ፤ ሞይቲሌስ አሾይኔ ሜቄሲ ባዋ» ያጊስ። 40 ያጊዲ፤ ባ ቶሁዋኔ ባ ኩሺያ ኤንታ ቤሲስ። 41 ኤንቲ ኡፋይሳፌ ዴንዶይሳን አማኖና ማላሌቴሳን ዴዲሺን፤ ዮሱሲ ኤንታኮ፤ «ሃይሳን ሂንቴው ሚያባይ ዴዲ?» ያጊስ። 42 ኤንቲ ኢሲ ጫጩቲዳ ሞሎ ኢያው ኢሚዶሶና። 43 ኢ ኤኪዲ ኤንታ ሲንሳን ሚስ።

44 ኢ፤ «ታ ሂንቴራ ጋምዒዳ ዎዴ ኡባን ሙሴ ማፃፋታን፤ ናቤታ ማፃፋታኒኔ ማዝሙሬ ማፃፋታን፤ ታ ጊሾ ፃፌቲዳባይ ኡባይ ፖሌታናው ቤሴስ ያጋዳ ታ ሂንቴው አዲዳ ቃላይ ሃይሳ» ያጊስ።

45 ሄ ዎዴ ጌሻ ማፃፋታ አኪካና ሚላ ዎዛና ኤንታ ዶዩስ።

46 ሄሳዳካ፤ «ኪሪስቶሲ ዋዩ ኤካና፤ ሄቫንሶ ቃማን ሃይቆፕ ዴንዳና ያጊዲ ፃፌቲስ። 47 ዮሩሳላሜ፤ ዴንዲዲ አሳ ኡባስ ናጋራፕ ማርቴሳይኔ አቶቴሳይ ኢያ ሱንሳን ማርካታና። 48 ሂንቴ ሄሳስ

ማርካታ። 49 ሄኮ፣ ታካ ታ አዋይ ኢሚዳ ኡፋይሳ ሂንቴው
ዮዳና። ሂንቴ ሳሎፕ ዎልቃ ማዳና ጋካናው ዩሩሳላሜ ካታማን
ጋምዲቴ» ያጊስ።

ዮሱሲ ዴንዲስ
(ማር 16:19-20፤ ሃ.አ 1:9-11)

50 ሄሳፌ ጉዮ፣ ቢታኒያ ካታማ ኤንታና ኤኪዲ ቢስ። ባ ኩሺያ
ዴንሲዲ አንጂስ። 51 ኤንታና አንጂሼ ኤንታፌ ሻኬቲዲ ፑዴ
ሳሎ ኤኬቲስ። 52 ኤንቲ ዜጊ ጎይኒዲ ዳሮ ኡፋይሳን ዩሩሳላሜ
ሲሚዶሶና። 53 ያሳ ኡባ ዎዴ ጋላቲሼ ያሳ ኬሳን ጋምዲዶሶና።

አራሳ ጫቁዋ ጎፋሳ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

